

Kityi nu ngwa'an Mateo sa ña'an ngwa cha' 'in Jesús

Ayman kula 'in Jesucristo

¹ Nde nda'aän sa ña'an nin nchga nten nu ngwa ayman 'in Jesucristo, cha' nten ta'a ayman David lka yu. Kwi' ngwaña'an lka yu nten ta'a ayman Abraham, ni siya s'ni 'a mdi'in yu kula kan'.

² Ayman Abraham kan' ngwa sti Isaac;
lo'o ayman Isaac kan' ngwa sti Jacob;
lo'o ayman Jacob kan' ngwa sti Juda lo'o nchga ta'a ngula yu;

³ lo'o ayman Juda kan' ngwa sti Fares lo'o Zara, lo'o Tamar ngwa naan jya'an ne' kan' bra kan'.

Lo'o ayman Fares kan' ngwa sti Esrom;
lo'o ayman Esrom kan' ngwa sti Aram;

⁴ lo'o ayman Aram kan' ngwa sti Aminadab;
lo'o ayman Aminadab kan' ngwa sti Naasón;
lo'o ayman Naasón kan' ngwa sti Salmón;

⁵ lo'o ayman Salmón kan' ngwa sti Booz, lo'o Rahab ngwa naan jya'an Booz kan' bra kan'.
Lo'o ayman Booz kan' ngwa sti Obed, lo'o Rut ngwa naan jya'an Obed kan' bra kan'.

Lo'o ayman Obed kan' ngwa sti Isaí;

⁶ lo'o ayman Isaí kan' ngwa sti ree David;
lo'o ayman ree David ngwa sti Salomón, lo'o jya'an Salomón kan' ngwa nu kuna'an nu ngwa kwilyo'o ayman Urías ti kulo la bra kan'.

⁷ Lo'o ayman Salomón kan' ngwa sti Roboam;
lo'o ayman Roboam kan' ngwa sti Abías;

- lo'o ayman Abías kan' ngwa sti Asa;
⁸ lo'o ayman Asa kan' ngwa sti Josafat;
 lo'o ayman Josafat kan' ngwa sti Joram;
 lo'o ayman Joram kan' ngwa sti Uzías;
⁹ lo'o ayman Uzías kan' ngwa sti Jotam;
 lo'o ayman Jotam kan' ngwa sti Acaz;
 lo'o ayman Acaz kan' ngwa sti Ezequías;
¹⁰ lo'o ayman Ezequías kan' ngwa sti Manasés;
 lo'o ayman Manasés kan' ngwa sti Amón;
 lo'o ayman Amón kan' ngwa sti Josías;
¹¹ lo'o ayman Josías kan' ngwa sti Jeconías lo'o ta'a
 ngula yu bra kan'.
 Kan' ndyaa lo'o ne' Babilonia 'in ne' Israel presu
 la kichen tyi ne' tjiyu'; ni' ña'an chkwan 'in ne'
 Babilonia ndyaa ka'an 'a ne' Israel bra kan'.
¹² Nde kichen tjiyu' kan' ngula Salatiel sñi' ayman
 Jeconías kan' bra kan';
 lo'o ayman Salatiel kan' ngwa sti Zorobabel;
¹³ lo'o ayman Zorobabel kan' ngwa sti Abiud;
 lo'o ayman Abiud kan' ngwa sti Eliaquim;
 lo'o ayman Eliaquim kan' ngwa sti Azor;
¹⁴ lo'o ayman Azor kan' ngwa sti Sadoc;
 lo'o ayman Sadoc kan' ngwa sti Aquim;
 lo'o ayman Aquim kan' ngwa sti Eliud;
¹⁵ lo'o ayman Eliud kan' ngwa sti Eleazar;
 lo'o ayman Eleazar kan' ngwa sti Matán;
 lo'o ayman Matán kan' ngwa sti Jacob.
¹⁶ Lo'o sñi' ayman Jacob ni, kan' ngwa Se nu ngwa
 kwilyo'o Liya jya'an Jesús bra kan'. Kwi'
 ngwaña'an, Krixtu naan Jesús kan'.
¹⁷ Ngwaña'an naan ayman kan', tii lkwa ta nten
 wa mdijin ne' xa nu ti lu'u Abraham sa ña'an bra

nu ngula ayman David. Lo'o xka tyii lkwa ta nten mdijin ne' xa nu ti lu'u ayman David, sa ña'an bra nu yaa lo'o ne' xka la'a tsu' 'in ne' Israel nde kichen tyi ne', msu'wa ne' kan' 'in ne' Israel ni' ña'an chkwan nde kichen Babilonia bra kan'. Lo'o mdijin xka tyii lkwa ta nten, kan' ngula nu lka Krixtu bra kan'.

Sa ña'an ngwa bra nu ngula Jesucristo

¹⁸ Nde nda'aän sa ña'an ngwa bra nu ngula Jesucristo. Wa mskan' cha' 'in Liya kan', cha' kaja kwilyo'o lo'o Se nu lka sñi' Jacob kan'. Ja ya tyi'in Liya se'en ndi'in Se lo'o mgii ti' Liya kan', cha' wa nsu'wi sñi'; kan' lka tñan nu wa y'ni Tyi'i Ndiose ykwi', cha' ngwa tnan Liya kan'.

¹⁹ Se kan' ni, t'nan ti' yu 'in Liya, chañi cha' nsu'wi tiye yu 'in nu kuna'an kan'. Bra wa ynan yu cha' kan', ja ngwa ti' yu ta yu cha' jyu'u 'in Liya, ni siya ja kaja kwilyo'o yu lo'o si'ya sñi', mda'an cha' tiye yu; tyii cha' 'in yu lo'o ngwaña'an ti, nka tiye yu, cha' ja ngwa ti' yu xtya yu ki'ya 'in nu kuna'an kan' tu' na'an tñan.

²⁰ Bra nu mda'an cha' tiye yu, ni cha' ngwa ngwaña'an, bra kan' mdo'o tukwa ska angajle se'en ndi'in yu, ykwi' sla yu bra kan'. Ykwi' angajle kan' lo'o yu:

—Se —ndukwin angajle kan' 'in yu—, ne' ta'a ayman David lka nu'win —ndukwin—. Ja kutseen kaja kwilyo'oo lo'o Liya, cha' kan Liya tyi'in na'an tyii. Si'i tñan kuxi y'ni Liya siya' ti, tñan nu y'ni Tyi'i Ndiose lka cha' tyi'in sñi' Liya ni.

²¹ Bra nu kala sñi' nu kuna'an kan', kuwi' ki'yu kala 'in. Lo'o xa nu tyijin nin kuwi' kan', bra kan' ka naan kuwi' Jesús. Lo'o Jesús ni, kan' lka

nu kulaa 'in nten chalyuu nu ndi'in cha' 'in lo'o Ndiose, cha' ka katin ki'ya nu ndukwi ne' kan'.

²² Kwi' ngwaña'an ngwa cha' kan', sa ña'an nu wa ykwi' Ndiose lo'o nten nu ngwa ti s'ni sa ña'an ka cha' kan'. S'ni kan' ayman nu ykwi' cha' 'in Ndiose lo'o nten, ngwa'an ne' cha' kan' lo kityi. Lo'o nde lka cha' nu ngwa'an ne':

²³ Ka tnan ska nu kuna'an kune' nu ti ji xu'wi ki'yu 'in, lo'o bra kan' tyi'in ska kuwi' ki'yu 'in;

Emanuel chkwi' ne' 'in kuwi' kan'. Ngwaña'an ndukwa cha' lo kityi, kan' cha' ngwaña'an ngwa 'in Liya bra kan'. Nu nchkwi' ne' Emanuel ni, nde lka cha' kan' cha'tñan: Su'wa ndi'in Ndiose lo'oan.

²⁴ Bra nu mxaa ti' Se, mdo'o yu ndyaa yu se'en ndi'in Liya cha' kaja kwilyo'o yu lo'o, sa ña'an nu wa ykwi' angajle kan' lo'o yu. Bra kan' mdiyan lo'o yu 'in Liya na'an tyi yu,

²⁵ lo'o ja yija' yu lo'o sa ña'an bra nu wa ngula sñi!. Bra wa ngula kuwi', bra kan' ngwa naan yu Jesús.

2

Mdiyan snan nten nu tiya 'a, nu mdo'o tijyu'

¹ Ti kwi' bra nu ngula Jesús nde kichen Belén, ska yu kula nu naan Herodes ngwa ndloo la 'in nasiyun kan'. La lo yuu 'in Judea, la kan' ndi'in kichen Belén kan'. Lo'o mdiyan chin' nten nu tiya 'a nde Judea kan'; mdo'o ne' tiya kan' nde kichen tijyu', nde se'en ndyo'o tukwa kwichaa, mdiyan ne' kichen Jerusalén bra kan'. Ykwi' ne' tiya kan' lo'o nten nu ndyukwa ta'a ne' tuwiin:

² —¿La nde ya' ndi'in kuwi' nu ngula nu ngwa xkan' ti a? —ndukwin ne'—. Ree 'wan ne' judío lka kuwi' kan' —ndukwin ne'—. Wa na'an ba kwii kulasiin tlyu nu tka ndukwi ti ni' kwan cha' 'in kuwi' kan', kan' cha' mdiyan ba nde re cha' ku'ni tnun ba 'in kuwi'.

³ Lo'o ree Herodes ni, ytsen 'a yu bra nu ynan yu cha' nu ykwi' ne' tiya kan', cha' ku'ni tnun ne' 'in xka ree, mske' ti' yu. Kwi' ngwaña'an nchga ne' kichen Jerusalén, ytsen 'a ne' sa ña'an ku'ni ree Herodes bra kan'.

⁴ Lo'o kan' msi'ya ree Herodes kan' 'in nchga sti jo'o nu lka ndloo la, lo'o 'in mstru nu ndu'u cha' jo'o ni' lyaa, cha' kan ne' se'en ndi'in yu. Mnicha' ree kan' 'in ne' bra kan':

—¿Ja jlyo ti' wan la nde nchkwi' kityi cha' kala Krixtu a? —ndukwin ree 'in ne'.

⁵ —Kala Ni nde kichen Belén nde lo yuu 'in Judea re —ndukwin ne' 'in ree—. Nde ndiya cha' nu ndukwa lo kityi 'in Ndiöse:

⁶ Kichen xuwe ti lka Belén nu ndiya se'en ndlo Judea tñan, ndukwin Ndiöse.

Kichen tyi ska nten nu tnun 'a cha' ka 'in, ka kichen kan', ni siya kichen xuwe ti lka ni, ndukwin Ni.

Ka yu ki'yu kan' ska nu tyuun loo la ti, lo'o ña'ansiin yu 'in ne' Israel 'ñañ.

Ngwaña'an ndukwa cha' lo kityi kan'.

⁷ Bra wa ynan ree Herodes cha' kan', bra kan' mnan ti msi'ya yu 'in ne' tiya kan', cha' kan ne' se'en ndi'in yu cha' chkwi' yu lo'o ne'. Mnicha' ree 'in ne' kan' bra kan', sa ña'an bra na'an ne' mdo'lo tukwa kwii kulasiin kan' nde ni' kwan.

⁸ Bra wa ytsa' ne' cha' kan' 'in ree, bra kan' ykwi' ree lo'o ne' cha' tsaa ne' nde kichen Belén.

—Yaa lya wan —ndukwin ree 'in ne' tiya kan'—, yaa na'an wan nde ndukwa na'an tyi sti kuwi' kan' —ndukwin—. Bra nu tyija na'an kan' 'wan, bra kan' tyaan wan se'en ndi'iin xiya' cha' ka biya' tiän' la nde ya' ndiya kuwi' kan'. Lo'oün tsa'aän ku'ni tnuün 'in kuwi' kan', lka tiyeën.

⁹ Mdo'o ne' ndyaa ne' bra wa ynan ne' cha' nu ykwi' ree lo'o ne' bra kan'. Xiya' na'an ne' kwii kulasiin kan' laja nu ndyaa ne' tuwiin cha' tsaa ne' nde kichen Belén, ti kwi' kwii tlyu nu na'an ne' ti kulo nde se'en ndyo'o tukwa kwichaa. Ngwa'u kwii kulasiin kan' 'in ne' la nde ndukwa na'an se'en ndi'in kuwi', ndyaa tukwi kwii tlyu kan' se'en ndukwa na'an kan'.

¹⁰ Su'we 'a ngwa tiye ne' cha' na'an ne' kwii kulasiin kan' xiya'.

¹¹ Yten ne' ni' ña'an kan' bra kan', na'an ne' kuwi' lo'o Liya jya'an kuwi'. Bra ti mduun xtyin' ne' tiya kan' se'en nskwa kuwi' cha' ku'ni tnun ne' 'in. Lo'o mxiti' ne' yu'wa 'in ne' cha' ta ne' lomstan 'in kuwi' kan'; mda ne' oro 'in kuwi' kan', mda ne' ynan nu ka'an 'a nga'an, lo'o mda ne' mirra nu lka sete xi tyi'i 'in kuwi' kan'.

¹² Bra nu ndyaa yija' ne', ykwi' sla ne' bra kan'; ykwi' Ndiose lo'o ne' cha' ja tsaa 'a ne' se'en ndi'in ree Herodes kan' xiya', cha' kwiñi 'a yu. Kan' cha' msñi ne' xka tuwiin cha' ndyaan ne' kichen tyi ne' xiya'.

Msnan Se lo'o Liya nde Egipto

¹³ Bra nu wa mdo'o ne' tiya kan' ndyaa ne' kichen tyi ne', bra kan' ykwi' sla Se. Mdo'o tukwa ska angajle laja sla yu, ykwi' lo'o yu bra kan':

—Xaa tii' —ndukwin angajle kan' 'in Se—. Ty-ituun, xnaan lyaa —ndukwin—, tsa'a lo'oo 'in jya'an kuwi' tijyu' la lo yuu 'in Egipto. Tyi'in wan nde kwa sa ña'an bra nu katsaän' 'iin cha' ka tyaan wan nde nasiyun re xiya'. Tlá 'a ree Herodes kan'; wa kan ti yu kichen re cha' kunaan yu 'in kuwi' 'wan, cha' kujwi yu 'in kuwi' 'wan, nchka ti' yu.

¹⁴ Bra ti mxaa ti' Se, ndyaa lo'o 'in kuwi' lo'o jya'an kuwi' xa nu ti tla; ndyaa ne' nde Egipto bra kan'.

¹⁵ Nganun ne' la kan' sa ña'an bra nu ngujwi Herodes, nu ree tlá kan'. Lo'o nde lka ti kwi' cha' nu wa ykwi' ayman kula lo'o nten chabiya' 'in Ndiose nu ngwa s'ni: “Si'yaän 'in Sñiën' cha' tyo'o lo yuu nu kwenta 'in Egipto, cha' tyaan yu kichen tyi yu xiya'” ndukwin Ndiose nu nka X'naan. Kan' cha' ngwaña'an ngwa 'in ne' bra kan', cha' ndyaa ne' nde Egipto.

Yjwi Herodes 'in nchga yu xuwe kune'

¹⁶ Lo'o ree Herodes kan' ni, msin' 'a ti' yu bra nu mgii ti' yu cha' ja mdijin 'a ne' tiya kan' xiya' se'en ndi'in yu. Ngulo ree kan' tñan 'in msu 'in yu bra kan', cha' tsa'a ne' kujwi ne' 'in nchga kuwi' ki'yu nu nsu'wi kichen Belén, nchga kuwi' nu ja ya tyii snan yijan; kwi' kujwi ne' 'in nchga kuwi' ki'yu nu ndi'in kichen xuwe kwi' se'en ti. Wa jlyo ti' ree cha' kuwi' kan' ja ya tyii snan yijan, cha' wa ytsa' ne' tiya kan' cha' sa kwa bra na'an ne' kwii kulasiin kan'.

17 Ti kwi' ti cha' ykwi' ayman Jeremías nu ykwi' lo'o nten cha' 'in Ndiose nu ngwa s'ni. Nde ndiya cha' ngwa'an yu lo kityi:

18 Lye 'a ngi'ni xi'in nten kichen Rama; msi'ya 'a ne', nganan 'a ne', cha' ngujwi sñi' Raquel.

Nganan 'a nu kuna'an kan', cha' wa ngujwi sñi' ne'.

Lo'o ja tukwin 'a ngwa ku'ni cha' ka tiin cha' nganan nu kuna'an kan'.

Ngwaña'an lka cha' ngwa'an yu kan' lo kityi s'ni, ni siya ja ya ka cha' kan' nu ti lu'u ayman kan'. Kan' cha' ngwaña'an ngwa 'in ne' Belén, nganan 'a ne' cha' ngujwi sñi' ne'.

19 Chun' ndi'in la, ngujwi ree Herodes kan' bra kan'. Kan' mdo'o tukwa ska angajle se'en ndi'in Se laja sla yu, cha' ti ndi'in Se lo yuu 'in Egipto:

20 —Xaa tii' —ndukwin angajle 'in yu—, tyituun lya wan, cha' tyaa wan lo'o kuwi' lo'o jya'an kuwi' nde nasiyun Israel xiya' —ndukwin—, cha' wa ngujwi yu tlá nu ngwa ti' kujwi 'in kuwi' nu ngwa xkan'.

21 Bra kan' mdyituun Se, ndyaa lo'o kuwi' lo'o jya'an kuwi' ngala ne' nde nasiyun Israel xiya'.

22 Kan' ynan yu cha' sñi' ayman Herodes ngulo tñan nde Judea, ti kwi' sñi' yu nu naan Arquelao lka yu kan'; kan' cha' ytsen chin' Se bra kan'. Xiya' ykwi' sla yu sa ña'an ku'ni yu, kan' cha' ndyaa ne' nde lo yuu 'in Galilea,

23 ngala ne' kichen Nazaret bra kan'. Ti kwi' ti cha' ykwi' ayman nu ykwi' lo'o nten cha' 'in Ndiose nu ngwa s'ni, bra nu ykwi' ne' cha' ne' Nazaret ka nu lka Krixtu. Ngwaña'an ykwi' ayman

kan' nu ngwa s'ni, kan' cha' ngwaña'an y'ni ne' lo'o Jesús bra kan'.

3

Ngwa'u Xuwa 'in nten nu mdiyan ni' kixin' se'en ndi'in yu

¹ Wa mdiya ya' mdyisnan Xuwa ngwa'u yu 'in nten nu mda'an se'en ndi'in yu ska ti yu ni' kixin'; mdukwatya yu 'in ne' bra kan'. Ti kwi' lo yuu 'in Judea ndi'in yu; wtyi 'a yuu se'en ndi'in Xuwa kan', ndi'in 'a kee, lo'o ja tukwin ndi'in nde kwa.

² —Ka jyu'u ti' wan —ndukwin Xuwa 'in ne'—, kulaa ya' wan cha' kuxi nu ngi'ni wan —ndukwin yu—. Wa tyisnan ti cha' ka Ndiose ndloo la ni' kasiya 'in nten chalyuu.

³ Lo'o Xuwa, lka yu ska nten nu wa ykwi' ayman kula Isaías s'ni cha' 'in. Nde ndiya cha' nu ngwa'an yu kula lo kityi:

Kwen xi'ya ska nten ni' kixin':

“Slaa lya wan ska tuwiin se'en kan nu nka X'naan, xñi su'we wan tuwiin se'en tyijin yu” ndukwin nten kan'.

Ngwaña'an ngwa'an ayman kan' cha' 'in Xuwa.

⁴ Lo'o Xuwa kan' ni, lku' yu ska te' kichan' camello, lo'o nchkan' kijin si' yu; nchku yu sku' lo'o kwiña' kwitun.

⁵ Lo'o bra kan' ndyo' ti'in ka'an nten se'en ndi'in yu; mdiyan ne' kichen Jerusalén nde kwa, lo'o ne' nchga kichen xuwe nu kwenta 'in Judea kan', lo'o ne' nu ndi'in kwi' se'en ti tu'wa chku Jordán, ta'a ne' mdiyan ne' se'en ndi'in yu.

⁶ Mdukwatya Xuwa 'in ne' kan' lo tyi'a chku Jordán bra kan', mdukwatya yu 'in nchga nten nu nchkwi' cha' ngwa jyu'u ti' 'in cha' kuxi nu ngi'ni.

⁷ Ngwa ska tsan na'an Xuwa 'in tyun ne' fariseo lo'o ne' saduceo bra kan'; kti 'a ngi'ni ne' kan' lo'o Ndiose, nxke' ti' ne', lye 'a ngi'ni siye' ne' lo'o ta'a nten ne'. Lo'o chin' ne' kan' mdiyan ne' cha' tukwatya Xuwa 'in ne', lo'o ja ndiya ti' Xuwa cha' ngwaña'an ngi'ni ne' kan'.

—Sa ña'an lka kunan tlá, kwi' ngwaña'an lka wan —ndukwin Xuwa 'in ne' kan'—. ¿Ta wa mxitsen ne' 'wan sikwa a? ¿Ti ka nu ndukwin ra 'wan cha' lyaa wan 'in nu ti'í nu ndijyan xa nu tyii chalyuu a? —ndukwin yu—.

⁸ Su'we sikwa, kwa'u wan 'wa si chañi cha' wa ngulaa ya' wan cha' kuxi nu ndi'in 'wan.

⁹ Ja xke' 'a ti' wan cha' ka su'we 'wan tloo Ndiose si xkwi' ndyu'wi ti' wan 'in ayman kula 'wan, ña'an ti' ayman kula Abraham kan'. Ja talo Ndiose 'in cha' kuxi nu ngi'ni wan siya' ti, ni siya nten ta'a ayman Abraham lka wan, nchkwi' wan. Nan kwiñi wan. Si nchka ti' Ndiose, ka 'in Ni kwiñan Ni xka ta nten lo'o kee ndi'in tu'wa chku re, cha' ka ne' ta'a ayman Abraham; ka 'in Ni si nchka ti' Ni. Lo'o ja tukwa Ndiose cha' 'wan bra kan'.

¹⁰ Sa ña'an nduun ska nten lo'o chkwan yka 'in yu cha' suwi yu lo yka kwiñii 'in yu, ngwaña'an lka Ndiose; si'yu yu kan' 'in nchga yka nu ja nda nan su'we, cha' tikin yu 'in ran lo kii', kwi' ngwaña'an ta Ndiose nu ti'í 'in nten nu ja xlyaa kulaa ya' cha' kuxi nu ngi'ni ne'.

¹¹ Lo'oũn ni, ndukwatyaän 'wan lo'o tyi'a chku re, si chañi cha' wa ngwa jyu'u ti' wan 'in ki'ya nu

ndukwi wan; lo'o wa kan ti xka nu tnun la cha' nchka 'in ke na'. Lo'o'ũn, ku'ni tnuũn 'in yu kan'; su'we 'a ka tiyeẽn, ni siya xtiĩn' tiãn ti ndukwa snan yu kan'. Lo'o yu kan' ni, ja tukwatya yu 'in nten lo'o tyi'a ti; ku'ni yu cha' kanun Tyi'i Ndiose ni' kasiya 'in nten xa nu tukwatya yu 'in ne'. Kwi' ngwaña'an, ku'ni luwi yu kasiya 'in ne' lo'o xaa 'in yu.

¹² Sa ña'an ngi'ni nten bra nu nxo' ti'in ne' nskwa' ni' ju'wa, lo'o nxo' ne' lka' tla' xka se'en cha' skin ran lo kii', ngwaña'an suwi Ndiose 'in nten, xa nu su'wa Ni 'in nten xa'an cha' skin lo kii' se'en ja tsaa tii 'a cha' nchkin.

Ngwaña'an ngwa'u Xuwa 'in nten nu ndya'an se'en ndi'in yu.

Mdukwatya Xuwa 'in Jesús

¹³ Ti mdi'in Xuwa tu'wa chku Jordán, bra kan' mdo'o Jesús lo yuu 'in Galilea mdiyan se'en ndi'in Xuwa, cha' lo'o Jesús nchka ti' cha' tukwatya Xuwa 'in.

¹⁴ Lo'o ngwa ti' Xuwa cha' ja tukwatya yu 'in Jesús.

—Ja su'we tukwatyaän 'iin. Su'we la nu'win tukwatyaä 'ñaän —ndukwin Xuwa 'in Jesús.

¹⁵ Ykwi' Jesús lo'o yu bra kan':

—Su'we tukwatyaä 'ñaän ni —ndukwin Jesús 'in Xuwa—, cha' ngwaña'an su'we ku'nian nchga tñan nu nchka ti' Ndiose cha' ku'nian.

Bra nu ynan Xuwa cha' nu ykwi' Jesús lo'o yu, mdukwatya yu 'in Jesús bra kan'.

¹⁶ Xa wa ngwa cha' kan', mdo'o Jesús lo tyi'a, kan' ngalaa nde ni' kwan. Lo'o bra kan' na'an Jesús cha' ngwi'ya Tyi'i Ndiose chun' yu; sa ña'an

ndi'ya ska kiñi cha kuun lo yuu, ngwaña'an ngwi'ya Tyi'i Ndiose chun' Jesús.

¹⁷ Ynen ykwi' Ndiose nde se'en ndi'in Ni nde ni' kwan bra kan'. Nde ña'an ndukwin Ni:

—Nu nde lka Sñiën' —ndukwin Ni—. Ndiya 'a tiän' 'in yu, cha' su'we 'a nsu'wi tiyeën ña'aän 'in yu.

4

Ngwa ti' kune' xa'an kwiñi lyo'o 'in Jesús

¹ Lo'o bra kan' ndyaa lo'o Tyi'i Ndiose 'in Jesús ni' kixin' se'en wtyi 'a yuu, se'en ja ndi'in nten, cha' tyukwa ta'a yu lo'o kune' xa'an nde kan'. Ngwa ti' yu kan' tyijin lyo 'in Jesús.

² Tu'wa tsan tu'wa tla ja yku Jesús siya' ti, ngite' 'a ti' yu bra kan'.

³ Lo'o bra kan' mdo'o tukwa kune' xa'an kan', cha' kwiñi lyo'o 'in Jesús:

—Si chañi cha' lkaa ska ti nu lka Sñi' Ndiose —ndukwin kune' xa'an 'in Jesús—, xñii ska kee re sikwa, cha' kwiñaan tyaja lo'o ran cha' kuan.

⁴ Mxkwen Jesús 'in kune' xa'an bra kan':

—Ndukwa ska cha' lo kityi 'in Ndiose —ndukwin Jesús 'in yu—. Nde ña'an nchkwi' cha' kan': “Si'i nan ku'u nten chalyuu cha' nchku ne' tyaja ti; xa nu kuan ne' nchga cha' nu nchkwi' Ndiose, kan' chañi cha' tyi'in su'we ne'.” Ngwaña'an nchkwi' cha' nu ndukwa lo kityi.

⁵ Lo'o bra kan' ndyaa lo'o kune' xa'an 'in Jesús nde kichen Jerusalén, ti kwi' kichen nu ndiya 'a ti' Ndiose; mchkwen ne' ndyaa ne' la ke laa tnun 'in kichen kan', kwan 'a mduun ne' bra kan'.

⁶ —¿Ta chañi cha' nu'win lkaa ska ti nu lka Sñi' Ndiose a? —ndukwin kune' xa'an 'in Jesús—. Su'we si xtyuu loo lo yuu sikwa, cha' ndukwa ska cha' lo kityi 'in Ndiose nu nchkwi':

Kulo Ndiose tñan 'in angajle 'in Ni cha' ña'ansiin 'iin, ndukwin kityi.

Kwi' ngwaña'an ndukwa xka cha':

Lo'o ya' ti angajle 'in Ni xituun 'iin, cha' ja ka ti'í kiyaa' se'en tyukwa kee kiyaa'.

Ngwaña'an ndukwa cha' lo kityi —ndukwin kune' xa'an.

⁷ Mxkwen Jesús 'in kune' xa'an bra kan':

—Kwi' ngwaña'an, ndukwa xka cha' lo kityi 'in Ndiose: “Ja kwiñi lyo'o wan 'in Ndiose nu lka X'nan wan” ndukwin kityi kan'.

⁸ Bra nu mdyii ykwi' ne', xiya' ndyaa lo'o kune' xa'an 'in Jesús ska lo ki'ya nu kwan 'a. Ngwa'u kune' xa'an nchga nasiyun ña'aan chalyuu 'in Jesús bra kan', cha' su'we 'a ña'an chalyuu kan'.

⁹ Ykwi' biya' kune' xa'an kan' lo'o Jesús xiya' bra kan':

—Taän chabiya' kaa ndloo la 'in nchga chalyuu nu ña'aan nde kwa —ndukwin kune' xa'an 'in Jesús—, ska ti si tyuun xtyiin' tloñ, si ku'nii tnun 'ñaän, kaa ndloo la bra kan'.

¹⁰ Lo'o mxkwen Jesús 'in kune' xa'an bra kan':

—Tyo'o tsuu' se'en ndi'iin, Satanás —ndukwin Jesús—. Yaa lyaa, chun' ndukwa ska cha' lo kityi 'in Ndiose nu nchkwi': “Ska ti Ndiose nu lka X'nan wan ku'ni tnun wan 'in Ni, siya' ti kunan wan cha' nu nchkwi' Ndiose xa nu ndi'in wan lo chalyuu” ndukwin kityi.

11 Mdo'o kune' xa'an ndyaa bra kan'. Kan' mdo'o tukwa angajle cha' taya' 'in Jesús, cha' talo la yu ti chin' se'en ndi'in yu bra kan'.

Mdyisnan Jesús ngi'ni tñan 'in Ndiose nde lo yuu 'in Galilea

12 Chun' ndi'in la mdo'o Jesús ndyaa, cha' wa ynan yu cha' wa msñi ne' 'in Xuwa; wa ndyaa lo'o ne' 'in Xuwa kan' ni' ña'an chkwan. Bra kan' ndyaan Jesús nde lo yuu 'in Galilea xiya', ndyaan yu kichen Nazaret.

13 Lo'o ja nganun yu kichen Nazaret kan'; mxa'an yu se'en ndi'in yu, ndyaa yu kichen Capernaum tu'wa tiyu'. Ndi'in kichen kan' laja lo yuu 'in Zabulón lo'o yuu 'in Neftalí.

14 Ti kwi' ti cha' mda'an ayman kula Isaías nu ykwi' lo'o nten cha' 'in Ndiose nu ngwa s'ni:

15 Yuu nu ndi'in kwenta 'in Zabulón lo'o yuu nu kwenta 'in Neftalí nde xka la'a tsu' chku Jordán, tyijian lo yuu kan', kalaan tu'wa tujo'o bra kan';

kan' lka yuu 'in Galilea, se'en ndi'in nten nu ja lka judío.

16 Wa yten ska xaa tlyu ni' kasiya 'in ne' kan'; nu ngwa xkan' xi'in 'a ti' ne', ntsen ne' si kaja ne', lye 'a ngwa tla ni' kasiya 'in ne' kan' bra kan', si'ya cha' kuxi.

Bra ni wa ndi'in xaa ni' kasiya 'in ne' kan', wa kaja ti chalyuu nu ja tsa tii 'a 'in ne' kan'.

Ngwaña'an ykwi' ayman kan', kan' cha' lo yuu kan' mdi'in Jesús bra kan'.

17 Lo'o mdyisnan ykwi' Jesús lo'o ne' nu nda'an se'en ndi'in yu bra kan':

—Ka jyu'u ti' wan —ndukwin Jesús 'in ne'—, kulaa ya' wan nchga cha' kuxi nu ngi'ni wan, cha' wa tiya ti bra cha' ka Ndiose ndloo ni' kasiya 'wan.

Msi'ya Jesús 'in jakwa nten nu ndyaa kuta kula, cha' tsaa ne' lo'o yu

¹⁸ La xka tsan nda'an Jesús tu'wa tiyu' Galilea kan', na'an yu 'in Simón lo'o Ndre ta'a ngula Simón bra kan', nduguun ne' katan lo tyi'a cha' xñi ne' kula, cha' kan' lka tñan nu ngi'ni ne' kan' nchga tsan. Ti kwi' Simón kan' lka nu mstyá Jesús xka nin cha' ka naan yu Tyu.

¹⁹ Lo'o bra kan' ykwi' Jesús lo'o ta'a tyukwaa yu ki'yu kan':

—Tsaá wan lo'oũn ni —ndukwin Jesús 'in ne' kan'—. Sa ña'an mjwi kula 'wan xa nu mda'an wan kuta kula, ngwaña'an kaja xka tñan 'wan ni chabiya' 'ñaän; kwa'uũn 'wan sa ña'an nu tsaá naan wan 'in nten chalyuu re nu ja ya kunan cha' su'we, cha' ka ne' nten 'ñaän.

²⁰ Bra ti mxnun ti'in ne' katan 'in ne', ndyaa ña'an ne' 'in Jesús bra kan'.

²¹ Nde loo la chin' na'an Jesús 'in Santiago sñi' Zebedeo lo'o Xuwa ta'a ngula yu; ndukwa ne' ni' yka na'an xuwe 'in ne' lo'o sti ne', nxu'wa ne' katan 'in ne' bra kan'. Kan' msi'ya Jesús 'in ne' kan', cha' tsaa ne' lo'o.

²² Bra ti mxnun ti'in ne' yka na'an 'in ne' lo'o sti ne', ndyaa ne' lo'o Jesús bra kan'.

Ngwa'u Jesús 'in ka'an 'a nten

²³ Ndyaa ne' nchga kichen nde lo yuu 'in Galilea lo'o Jesús bra kan'. Nchga kichen se'en mda'an yu ngwa'u yu 'in nten ni' lyaa 'in ne' judío; ykwi' yu

lo'o ne' sa ña'an lka cha' su'we 'in Ndiose, cha' wa ndla ti ka Ndiose ndloo la ni' kasiya 'in ne'. Kwi' ngwaña'an, y'ni yu jo'ó 'in nchga nu ti'í, nchga kicha nu ndi'in 'in ne' y'ni Jesús cha' nchkaa ne'.

²⁴ Bra kan' ynen cha' 'in Jesús nchga kichen nde lo yuu 'in Siria; kan' cha' mdiyan lo'o ne' 'in nchga nu ti'í se'en ndi'in yu, cha' ku'ni yu jo'ó 'in ne'. Ndiyyan lo'o ne' 'in nu ti'í, lo'o nu nsu'wi kicha 'in; lo'o nu nsu'wi kwi'in kuxi 'in, lo'o nu n'ni lyo'o kwi'in 'in, lo'o nu nchkun' ña'aan tyukwin nsu'wi, lo'o nu mtyi ska la'a ya', y'ni Jesús cha' nchkaa nchga nu ti'í kan'.

²⁵ Kan' cha' ka'an 'a nten mdo'o ña'an 'in Jesús, lo'o ne' Galilea, lo'o ne' nchga kichen nde Decápolis, lo'o ne' kichen Jerusalén, lo'o ne' xka la kichen nde lo yuu 'in Judea, lo'o ne' kichen xka la'a tsu' chku Jordán. Ka'an 'a kichen mdo'o ne' ndyaa ña'an ne' 'in Jesús bra kan'.

5

Sa ña'an cha' ngwa'u Jesús 'in ne' nu ndukwa lo nten

¹ Na'an Jesús cha' ka'an 'a nten ndiyyan se'en ndi'in yu, kan' cha' mskwen yu ndyaa la yu nde si' ki'ya, ndyaa tukwa yu chin' nde kan'. Lo'o ndyo' ti'in ne' nu ngi'ni xa'an cha' 'in yu nde se'en ndi'in yu.

² Mdyisnan Jesús ngwa'u yu 'in ne' kan' bra kan'. Nde lka cha' nu ykwi' yu lo'o ne':

Nten nu chañi cha' su'we lka tiye

³ —Ka su'we nka tiye nten si jlyo ti' ne' cha' ja ka 'in ne' ku'ni ne' ska cha' su'we, si ja lo'o Ndiose

—ndukwin Jesús—. Ka Ndiose ndloo la ni' kasiya 'in ne' kan' bra kan'.

⁴'Kwi' ngwaña'an, ka su'we nka tiye nten ni siya xi'in ti' ne' ni, si'ya ki'ya nu ndi'in 'in ne'; ku'ni Ndiose cha' ka su'we ka tiye ne' kan' chun' ndi'in la.

⁵'Kwi' ngwaña'an, ka su'we nka tiye nten nu ja nchka ti' tyijin lyo 'in ta'a nten, cha' nde se'en ndi'in Ndiose ndiya cha' su'we nu ta Ni 'in ne' kan' bra kan'.

⁶'Kwi' ngwaña'an, ka su'we nka tiye nten nu xlyaa ku'ni nchga cha' su'we, nchga cha' nu ñi; taya' Ndiose 'in nten kan', cha' ka ku'ni ne' nchga tñan nu nchka ti' Ni.

⁷'Kwi' ngwaña'an, ka su'we nka tiye nten nu nchka t'nan ti' 'in ta'a nten, cha' ngwaña'an chka t'nan ti' Ndiose 'in ne' kan' chun' ndi'in la.

⁸'Kwi' ngwaña'an, ka su'we nka tiye nten nu luwi kasiya 'in, cha' wa lka nda Ndiose chabiya' 'in ne' kan', cha' ña'an ne' 'in ykwi' Ni nde loo la.

⁹'Kwi' ngwaña'an, ka su'we nka tiye nten nu ndaya' 'in ta'a nten cha' ka tiin cha' 'in ne' lo'o nu nxuun lo'o ne'. “Sñiën!” nchkwin Ndiose 'in nten nu ngi'ni cha' ki'ya tla' tiye ne' lo'o ta'a nten ne'.

¹⁰'Kwi' ngwaña'an, ka su'we nka tiye nten nu talo tyi'in lo'o ta'a nten ne', ni siya na'an ti'í nten kan' 'in ne', chun' ngi'ni ne' cha' su'we cha' 'in Ndiose. Ka su'we nka tiye ne', cha' ngwaña'an Ndiose lka ndloo la ni' kasiya 'in ne'.

¹¹'Kwi' ngwaña'an, ka su'we nka tiye wan ni siya xtyi lyo'o ne' 'wan chun' ndyaa ña'an ti' wan 'ñaän, ni siya ku'ni liye' ti' ne' 'wan, ni siya kwiñi lyo'o ne' 'wan, ni siya chkwi' 'a ne' kwentu 'wan si'ya cha' 'ñaän.

12 Ka su'we nka tiye wan bra kan', su'we 'a tyi'in wan cha' wa lka ndi'in ska cha' su'we nu tlyu chin' nu ta Ndiose 'in nchga wan nde se'en ndi'in Ni. Kwi' ngwaña'an ngwa tí'í 'a ti' ayman s'ni 'in ayman nu ykwi' lo'o nten cha' 'in Ndiose bra kan'.

Sa ña'an lka teje', sa ña'an lka xaa, ngwaña'an tyi'in wan lo chalyuu

13 'Sa ña'an nu nnanjo'o 'a teje' 'ñaan cha' tiyen' ran, cha' ku'ni xun' ran skwa, ngwaña'an lka wan lo chalyuu; nnanjo'o 'a wan 'in Ndiose cha' ku'ni wan tñan 'in Ni. Si wa mnu'un teje' 'ñaan, ja ka 'a kunanjo'o ran 'ñaan bra kan'; su'we la si xkwaan 'in teje' kan' tu'wa tuwiin se'en ndijin nten bra kan'. Ja n'ni cha' ni siya lyo'o su'wa nten chun' teje' mnu'un kan'. Sa ña'an ngi'ni nten lo'o teje' mnu'un kan', ngwaña'an ngi'ni Ndiose lo'o nten nu ja nnan cha' nchkwi' Ni.

14 'Sa ña'an lka ska xaa, ngwaña'an lka wan, cha' ka kwa'u wan tuwiin 'in Ndiose 'in nchga nten chalyuu. Ska kichen nu ndi'in lo ki'ya ni, ja ka tyi'in kan' mnan ti; ña'an nchga nten 'in kichen kan'.

15 Kwi' ngwaña'an, bra nu mxkin ne' ska kii' kityee, ja su'wa kutsi' ne' 'in kii' kan' ni' kajun bra kan'; kwan xtya ne' kityee kan', cha' ki'ni xaa ña'aan ni' ña'an kan'.

16 Kwi' ngwaña'an 'wan ni, ku'ni wan cha' ka wan xaa nu kwa'u tuwiin 'in nten, xkwi' cha' su'we ku'ni wan cha' ña'an nchga nten ña'aan cha' su'we nu ngi'ni wan, cha' lka wan sñi' Ndiose. Bra kan' tyaa yu'wi ti' ne' 'in Stian Ndiose, ku'ni tnun ne' 'in Ni nu ndi'in ni' kwan bra kan'.

Ngwa'u Jesús cha' 'in tñan nu ngulo Ndiose 'in ayman s'ni

¹⁷ 'Ja tya'an cha' tiye wan cha' ndijyaän lo chalyuu re cha' ku'ni tyiïn cha' kula 'ñaan; ni siya nchga cha' nu ykwi' Ndiose lo'o ayman Moisés, ni siya nchga cha' nu ngwa'an ayman nu ykwi' lo'o nten cha' 'in Ndiose nu ngwa s'ni, ja ku'ni tyiïn cha' kan'. Wa ndijyaän cha' nu kwa'uün ñi 'in nten sa ña'an lka nchga cha' nu ndukwa lo kityi kula kan'.

¹⁸ Chañi cha' nchkwii'n' lo'o wan ni, cha' ja ska cha' nu ngwa'an ayman s'ni cha' 'in Ndiose, ja ka ku'ni tyii nten cha' kan' sa ña'an bra nu tsaa tii chalyuu; chañi cha' ka nchga cha' nu ndukwa lo kityi 'in Ndiose nu ngwa s'ni.

¹⁹ Kan' cha' ni, ja ta Ndiose se'en tyi'in nten lo'o Ni, xa nu ja tukwa ne' nchga tñan nu ngulo Ndiose 'in ne' cha' ku'ni ne', xa nu lo'o kwa'u ne' 'in ta'a nten ne' cha' ja ndi'in cha' tukwa ne' tñan kan'. Ta Ndiose se'en tyi'in nten lo'o Ni xa nu tukwa ne' nchga cha' nu nchkwi' Ni, xa nu lo'o kwa'u ne' tñan kan' 'in ta'a nten ne'.

²⁰ Nde ndiya cha' nu chkwii'n' lo'o wan ni: Cha' kaja chalyuu nu ja tsaa tii 'a 'wan, ndi'in cha' ka su'we la tñan nu ku'ni wan, si'i sa ña'an nu ngi'ni ne' kti kwa, ne' fariseo kwa lo'o mstru nu ndu'u cha' jo'o kwa.

Ndu'u Jesús 'in ne' cha' tsaa tii cha' wsuun 'in ne' lo'o ta'a nten ne'

²¹ 'Wa ynan wan sa ña'an nu ngulo Ndiose tñan 'in ayman nu ngwa s'ni. Nchkwi' Ni cha' re: “Ja kujwi wan 'in ta'a nten wan” ndukwin Ndiose. “Bra nu kujwi ne' 'in ta'a nten ne', ndi'in cha' tsaa

ne' ni' ña'an chkwan cha' ku'ni biya' wse 'in ne' bra kan'."

²² Lo'o ni, ka'an la cha' chkwiiñ' lo'o wan: Ni siya na'an ti'í ti ne' 'in ta'a nten ne', ndi'in cha' tyijin ne' nu ti'í bra kan'; ni siya chkwi' ne' ska cha' kuxi 'in ta'a nten ne', bra kan' ndi'in cha' tsaa ne' nde se'en ndukwa nu lka ndloo la nde kichen Jerusalén, cha' ka biya' cha' 'in ne' nde kwa bra kan'. Kwi' ngwaña'an, bra nu msin' 'a ti' ne' nchkwi' ne' lo'o ta'a nten ne': ¡Tintu 'a nu'win!, ja chan tsaa ne' kan' lo jwlyaa, se'en ja tsaa tii 'a cha' nchkin kii' bra kan'.

²³ 'Kwi' ngwaña'an, si tyaa yu'wi ti' wan cha' ndiya cha' wsuun 'in ska nten lo'o wan, bra nu wa tsaa ti wan ni' lyaa cha' ta wan lomstan 'in Ndiose,

²⁴ kan' su'we la xitukwi wan tyaan wan lo'o lomstan 'wan tu' na'an tyi wan xiya', tsaa wan jñan wan cha' tlyu ti' 'in ta'a wan ti kulo bra kan'. Xiya' tsaa y'ya wan lomstan kan', tsaa lo'o wan 'in ran ni' lyaa xiya'.

²⁵ Nde lka sa ña'an ku'ni wan bra nu ndiya nten nu xtya ki'ya 'wan tu' na'an tñan: bra ti ku'ni wan cha' tlyu ti' 'in ta'a wan kan', nu ti ji tiya wan se'en ndukwa yu wsiya cha' ku'ni biya' ne' cha' wsuun kan'. Kuxi la cha' si ka tlá 'a yu wsiya, kan' xi'ya yu 'in ne' policía cha' su'wa ne' 'wan ni' ña'an chkwan bra kan'.

²⁶ Chañi nchkwiñ' lo'o wan, cha' kee' 'a tyo'o luwi wan tloo nten kan', cha' ndi'in cha' ta wan nchga tñi siya' ti nu jñan yu wsiya 'wan cha' tyo'o wan bra kan'.

Ykwi' Jesús ska cha' 'in nten nu ngi'ni cha' kuxi lo'o kwilyo'o xka nten

²⁷ 'Wa ynan wan sa ña'an tñan ngulo Ndiose 'in ayman ta'aan s'ni. Nchkwi' Ni cha' re: “Ja ku'ni wan cha' kuxi lo'o kwilyo'o xka nten” ndukwin Ndiose bra kan'.

²⁸ Lo'o ni, ka'an la cha' chkwiin' lo'o wan: Ni siya ña'an kwi'ya ska yu ki'yu 'in ska nu kuna'an, lo'o bra kan' xitukwi ti' yu 'in nu kuna'an kan', su'wa ndi'in cha' kan' lo'o yu sa ña'an si wa lka y'ni yu ska cha' nu kuxi lo'o nu kuna'an kan', ni siya tiye ti yu nsu'wi cha' kuxi kan'.

²⁹ 'Bra nu ndiya ska cha' kuxi nu ña'an wan lo'o kiloo wan, lo'o ndiya 'a ti' wan cha' kuxi kan', ndi'in cha' kulaa ya' wan cha' kuxi kan' bra ti. Ña'an ti' si kulo wan ska la'a kiloo wan, kanun kwityiin' wan bra kan', ja tyukwi wan bra kan'; ngwaña'an ka kasiya 'wan ni, ka luwi kasiya 'wan si kulaa ya' wan cha' kuxi kan', ni siya xi'in ti' wan ti chin'. Chun' ndi'in la ja tsaa wan lo jwlyaa si'ya cha' kuxi kan' 'wan, se'en lye nchkin kii' bra kan'.

³⁰ Bra nu ndiya ska cha' kuxi nu ngi'ni wan lo'o ya' wan, lo'o ndiya 'a ti' wan cha' kuxi kan', ndi'in cha' kulo chun' wan cha' kuxi kan' bra ti. Ña'an ti' si si'yu wan ska la'a skun wan, kanun chku' ya' wan bra kan', ja tyukwi wan bra kan'; ngwaña'an ka kasiya 'wan ni, ka luwi kasiya 'wan si kulaa ya' wan cha' kuxi kan', ni siya xi'in ti' wan ti chin'. Chun' ndi'in la ja tsaa wan lo jwlyaa si'ya cha' kuxi kan' 'wan, se'en lye nchkin kii' bra kan'.

Ykwi' Jesús ska cha' 'in nten nu kulaa ti'in 'in kwilyo'o

³¹ 'Nde ndiya xka cha' nu ykwi' ayman s'ni: “Bra nu nchkwi' ska yu ki'yu lo'o kwilyo'o yu cha' tyaa

se'en ndi'in sti lo'o jya'an xiya', chun' nchka ti' yu kulaa ti'in yu 'in kwilyo'o yu, kan' ndi'in cha' kulo yu ska kityi cha' 'in nu kuna'an kan' bra kan'. Kityi kan' katsa' cha' ja lka 'a nu kuna'an kan' kwilyo'o yu ni.”

³² Lo'o ni, ka'an la cha' chkwiin' lo'o wan: Cha' kuxi ngi'ni ska yu ki'yu lo'o kwilyo'o yu bra nu kulaa ti'in yu 'in kwilyo'o yu, lo'o ja ndukwi nu kuna'an kan' ki'ya. Chun' ndi'in bra nu kaja kwilyo'o nu kuna'an kan' lo'o xka nten, ngi'ni yu kan' cha' ndukwi nu ngwa kuna'an 'in yu ki'ya bra kan'. Kwi' ngwaña'an, lo'o xka nten kan' ndukwi ki'ya, cha' kwilyo'o xka yu ki'yu kan' lka nu kuna'an kan', ni siya tlyu la ki'ya ndukwi yu ki'yu kan' nu ngwa kwilyo'o ti kulo.

Ja su'we chkwi' ne' ska cha' nu tnun 'a laja nu nskan' ne' cha' lo'o nten

³³ 'Xka cha' ni, wa ynan wan sa ña'an tñan nu ngulo Ndiose 'in ayman s'ni. Nchkwi' Ni cha' re: “Ja su'we chkwi' wan lo'o Ndiose cha' ku'ni wan ska tñan, lo'o cha' kwiñi nchkwi' wan. Ndi'in cha' ku'ni ji wan sa ña'an nu ndukwin wan 'in Ndiose cha' ku'ni wan.”

³⁴ Ni ni, ka'an la cha' chkwiin' lo'o wan: Ja su'we siya' ti skan' wan ska cha' lo'o nten cha' nchkwi' wan ska cha' nu tnun 'a; ni siya chkwi' wan cha' 'in nchga nan nu nsu'wi ni' kwan, ja skan' wan cha' lo'o nten ngwaña'an, cha' la kan' ndi'in Ndiose ykwi';

³⁵ ni siya chkwi' wan cha' 'in nan nu nsu'wi lo chalyuu re, ja chkwi' wan cha' nu tnun 'a ngwaña'an, cha' cha' 'in Ndiose lka chalyuu re; ni siya chkwi' wan cha' 'in kichen Jerusalén, ja

chkwi' wan cha' nu tnun 'a ngwaña'an, cha' la kan' lka Ndiose ndloo la.

³⁶ Ti kwi' ti cha', ja skan' wan cha' lo'o nten bra nu nchkwi' wan cha' 'in ke wan ti ykwi' ti wan, cha' ska ti Ndiose ngwiñan Ni 'wan, lo'o ja ka 'wan ku'ni wan cha' ka kichan' ke wan, ni siya kichan' ngata, ni siya kichan' ngaten. Ja su'we nka tiye Ndiose siya' ti cha' chkwi' wan ska cha' laja ti bra nu skan' tsaan wan cha' lo'o nten.

³⁷ Sa kan' ti cha' chkwi' wan “Chañi”, si cha' nu ñi lka; kwi' ngwaña'an chkwi' wan “Si'i”, si cha' kwiñi lka. Nchga la cha' nu chkwi' wan xa nu nchkwi' wan ska cha' tnun, cha' 'in kune' xa'an lka kan'.

Ngwa'u Jesús sa ña'an cha' su'we ku'ni nten lo'o nu nxuun lo'o ne'

³⁸ 'Lo'o wa ynan wan cha' re nu ykwi' ayman s'ni: “Ska nten xa'an ni, bra nu mchu yu kiloo ta'a yu, ndi'in cha' kulo ne' wsiya kiloo ykwi' yu cha' ka tiin ki'ya 'in yu bra kan'. Kwi' ngwaña'an, bra nu mstun yu ska li'ya ta'a yu, bra kan' ndi'in cha' kulo ne' wsiya li'ya ykwi' yu, cha' ka tiin ki'ya nu ndukwi yu.” Ngwaña'an ykwi' ne' nu ngwa s'ni.

³⁹ Lo'o ni, ka'an la cha' chkwiin' lo'o wan, cha' ja xuun ta'a wan lo'o nten nu y'ni cha' kuxi lo'o wan. Bra nu jwi'in ne' ndukun' ne' tloo wan la'a se'en kwin, ta wan chabiya' jwi'in ne' ndukun' xka la'a tloo wan bra kan', si nchka ti' ne'.

⁴⁰ Bra nu nchka ti' ska nten xa'an kulaa ykan' 'wan, bra ti ta wan ran 'in yu bra kan'; lo'o ta wan chin' xka la te' 'in yu, cha' kanun su'we ka tiye yu bra kan'.

41 Kwi' ngwaña'an, ska yu nu lka ndloo la, si kulo yu tñan 'wan cha' tsaa lo'o wan yu'wa 'in yu ska se'en, bra ti tsaa lo'o wan yu'wa kan' 'in yu; su'we ti ka tiye wan tsaa lo'o wan 'in ran la tijyu' la chin', si ngwaña'an nchka ti' yu.

42 Bra nu jñan ska nten ya ña'an ti nan 'wan, ta wan nan kan' 'in yu; kwi' ngwaña'an, si jñan ne' ska nan jñi' ti 'wan, su'we ti chkwi' wan lo'o ne' bra kan'.

Ngwa'u Jesús cha' xu'wi su'we tiye ne' lo'o nu ti'í ti' 'in ne'

43 'Wa ynan wan cha' re nu ykwi' ayman s'ni: "Su'we ku'ni wan lo'o ta'a wan, lo'o ña'an ti'í wan 'in nten nu nxuun lo'o wan."

44 Lo'o ni, ka'an la cha' chkwiñ' lo'o wan: Su'we 'a xu'wi tiye wan ña'an wan 'in nu ti'í ti' 'wan; kwi' ngwaña'an, su'we chkwi' wan lo'o nten nu su'wa kwentu 'wan, su'we ku'ni wan lo'o nten nu liye' ti' 'wan; chkwi' wan lo'o Ndiose cha' 'in ne' kan', ni siya na'an ti'í ne' 'wan, ni siya nxyti lyo'o ne' 'wan.

45 Ka xu'wi lyo nten 'wan cha' lka wan sñi' Ndiose nu ndi'in ni' kwan bra kan'. Su'wa nda Ndiose xaa kwan lo'o se'en ndi'in nten kuxi, lo'o se'en ndi'in nten su'we; su'wa nda Ndiose tyoo ki'ya se'en ndi'in nten su'we lo'o se'en ndi'in nten xa'an. Kan' cha' su'we la bra nu su'wa ku'ni wan cha' su'we lo'o nchga nten.

46 Ti kwi' ti cha', ja su'we si xkwi' su'we nsu'wi tiye wan lo'o nten ta'a su'we ndi'in wan. Si'i nan su'we la kunan Ndiose cha' nchkwi' wan si ngwaña'an ngi'ni wan, cha' kwi' ngwaña'an ngi'ni ya ña'an ti nten; ni siya nten su'we, ni siya nten xa'an, lo'o ne' nu ndlo tñi 'wan cha' 'in ne' xka

la'a tsu', nchga nten kan' ngi'ni su'we ne' lo'o ta'a su'we ndi'in ne'.

⁴⁷ Bra nu chkwi' su'we wan ska ti lo'o ta'a su'we nsu'wi wan, ja su'we kan', cha' kwi' ngwaña'an ngi'ni nchga nten; lo'o nten nu ja ndi'in cha' 'in lo'o Ndiose, lo'o nten kan' nchkwi' su'we lo'o ta'a su'we ndi'in ne'. Ti ka'an la cha' su'we ku'ni wan, nchka ti' Ndiose.

⁴⁸ Stian Ndiose nu ndi'in nde ni' kwan ni, xkwi' cha' su'we, xkwi' cha' nu ñi, xkwi' cha' nu luwi ngi'ni Ni. Sa ña'an ngi'ni Ndiose, ngwaña'an ndi'in cha' ku'ni wan xkwi' cha' su'we lo'o nchga nten, si chañi cha' sñi' Ndiose lka wan.

6

Ngwa'u Jesús 'in ne' sa ña'an taya' ne' 'in nten nu ti'i

¹ 'Nde ndiya xka cha' chkwiin' lo'o wan ni: Ja ta wan ska xu'we 'in ne' ti'i bra nu ña'an xka ta nten 'wan. Ja ndi'in cha' ña'an nten sa ña'an cha' su'we nu ngi'ni wan cha' 'in Ndiose. Ja ta Stian Ndiose ska cha' su'we 'wan nde se'en ndi'in Ni, xa nu ña'an xka la nten 'wan cha' ngi'ni wan cha' su'we kan'.

² Bra nu taya' wan 'in ne' ti'i, ja ndi'in cha' katsa' wan cha' kan' 'in xka la nten. Ja ku'ni wan sa ña'an nu ngi'ni nten nu tukwa cha' nsu'wi tiye ne', nu nchka 'a ti' cha' ña'an xka la nten 'in ne'; bra nu taya' ne' kan' 'in ne' ti'i, ni siya ni' lyaa 'in ne' judío ta'aan, ni siya tu'wa tuwiin ti, ska ti cha' nchka ti' ne' kan', cha' su'we 'a chkwi' nten cha' 'in ne', ti ykwi' ti ne'. Ja ku'ni wan ngwaña'an. Chañi cha' nchkwiin' lo'o wan: Nchga cha' su'we nu kaja 'in ne' kan' nde loo la se'en ndi'in Ndiose, wa lka mjwi

cha' kan' 'in ne' kan', cha' wa na'an xka la nten 'in ne'.

³ Lo'o 'wan ni, bra nu ta wan ska xu'we 'in ne' ti'i, ta wan ran mnan ti, cha' ja ka biya' ti' xka la nten; ni siya ne' ta'a wan, ja ka biya' ti' ne' sa ña'an tñan ngi'ni wan.

⁴ Ska ti Stian Ndiose, ka biya' ti' Ni sa ña'an cha' su'we nu ngi'ni wan mnan ti, lo'o bra kan' ta Ndiose cha' su'we nu tlyu chin' 'wan nde loo la.

Ngwa'u Jesús 'in ne' sa ña'an chkwi' ne' lo'o Ndiose

⁵ Xka cha' ni: Bra nu chkwi' wan lo'o Ndiose, ja ku'ni wan sa ña'an nu ngi'ni nten nu tukwa cha' nsu'wi tiye. Nduun ne' kwiñi kan' se'en ndi'in nten ni' lyaa 'in ne' judío ta'aan, cha' nchka ti' ne' chkwi' ne' lo'o Ndiose bra nu ña'an nten 'in ne'; ti kwi' ti cha', nduun ne' jlu'we tuwiin cha' chkwi' ne' lo'o Ndiose. Chañi cha' nchkwiin' lo'o wan: Nchga cha' su'we nu kaja 'in ne' kan' nde loo la se'en ndi'in Ndiose, wa lka mjwi cha' kan' 'in ne' lo chalyuu ni, cha' wa na'an nten chalyuu 'in ne'.

⁶ Lo'o 'wan ni, bra nu chkwi' wan lo'o Ndiose, tsaa wan ska se'en nu ka tyi'in wan ska ti wan. Nu ndi'in wan ni' ña'an bra kan', tukun' wan tuna'an, cha' ngwaña'an ku'ni tnun wan ska ti wan 'in Stian Ndiose bra kan'; ndi'in Ni ti kwi' se'en ndi'in wan, ni siya ja ndi'in xka la nten se'en ndi'in wan. Ska ti Stian Ndiose nchka biya' ti' Ni sa ña'an cha' su'we nu ngi'ni wan ska ti wan, kan' nu ta cha' su'we 'wan nde loo la.

⁷ Bra nu chkwi' wan lo'o Ndiose, ja chkwi' wan ti kwi' ti cha' ka'an 'a ya', lo'o ja chkwi' wan ka'an 'a cha' nu ja nchka biya' ti' wan ti ykwi' ti wan,

sa ña'an nu ngi'ni nten nu ja ndi'in cha' 'in lo'o Ndiose siya' ti. Nxke' ti' ne' kan', cha' su'we la kunanjo'o cha' kan' 'in ne' bra nu ka'an 'a cha' chkwi' ne', ngwaña'an lka tiye ne' kan'.

⁸ Ja chkwi' wan ngwaña'an lo'o Ndiose, cha' jlyo ti' Stian Ndiose nchga cha' nu lyiji 'wan, ni siya ja ya jñan wan cha' kan' 'in Ni.

⁹ Nde lka sa ña'an nu su'we la chkwi' wan lo'o Ndiose sikwa:

Ndiose Sti ba nu ndi'in nde ni' kwan, ska ti nu'win ngi'ni tnun nten chalyuu 'iin.

¹⁰ Kan nu'win lo chalyuu re cha' ka ndloo la 'wa. Ku'nii cha' ka nchga cha' nu nchka tii' cha' ka lo chalyuu re;

sa ña'an nu ngi'nii nde se'en ndi'iin nde ni' kwan, ngwaña'an ka lo yuu re bra kan'.

¹¹ Taa nan ku ba tsan ni.

¹² Ku'nii cha' tlyu ti' 'wa 'in nchga cha' kuxi nu y'ni ba, cha' ngwaña'an wa y'ni ba cha' tlyu ti' 'in xka la nten nu y'ni cha' kuxi lo'o ba.

¹³ Ja taa chabiya' cha' jwakii cha' kuxi 'wa, kuloo 'wa ya' kune' xa'an bra kan'.

Nu'win ndloo tñan nchga cha';

nchga chabiya' nu nsu'wi lo chalyuu, nchga chabiya' nu nsu'wi nde ni' kwan, nu'win ndiya nchga chabiya' kan' 'iin.

Ja taa tii 'a cha' tlyu la ti nu'win. Ngwaña'an ka cha'.

Ngwaña'an chkwi' wan lo'o Ndiose.

¹⁴ 'Bra nu ku'ni wan cha' tlyu ti' 'in xka la nten nu wa y'ni cha' kuxi lo'o wan, lo'o Stian nu ndi'in nde ni' kwan, ku'ni Ni cha' tlyu ti' 'wan bra kan';

15 bra nu ja ku'ni wan cha' tlyu ti' 'in ta'a nten wan, lo'o Stian Ndiose, ja ku'ni Ni cha' tlyu ti' 'wan 'in ki'ya nu ndi'in 'wan bra kan'.

Ngwa'u Jesús cha' 'in tsan kti xa nu ngi'ni ku'nan nten

16 'Xka cha' ni: Bra nu tiya tsan 'wan cha' ja ku wan chun' ngi'ni tnun wan 'in Ndiose, ja su'we si xkwi' cha' xi'in tiye wan, sa ña'an ngi'ni nten nu tukwa cha' nsu'wi tiye. Nchka ti' ne' kan', cha' ña'an nten 'in ne' cha' xkwi' ngi'ni kti ne', chun' ja nchku ne' tsan kan'. Chañi cha' nchkwii'n lo'o wan: Wa lka mjwi cha' 'in ne', sa kwa ti cha' su'we nu ta Ndiose 'in ne' nde loo la.

17 'Wan ni, bra nu tiya ska tsan nu ku'ni ku'nan wan cha' su'we la ku'ni tnun wan 'in Ndiose, jya'an wan tloo wan, ta'an wan chku ke wan bra kan',

18 cha' ja ka biya' ti' xka la nten cha' ja yku wan tsan kan'. Ska ti Stian Ndiose nchka biya' ti' Ni sa ña'an cha' su'we nu ngi'ni wan ska ti wan. Lo'o bra kan' xnun Ni cha' su'we nu kaja 'wan nde loo la.

Cha' su'we nu kaja 'in ne' se'en ndi'in Ndiose

19 'Xka cha' ni: Ja xo' ti'in wan ka'an 'a cha' su'we cha' 'wan ti ykwi' ti wan xa nu ndi'in wan lo chalyuu re. Ndla ti ñu'un cha' su'we kan' ngwa ti ña'an; ndiya bra nchku tña' 'in ran, ta nchku kusun' 'in ran, ku'ni ñu'un i' 'in ran bra kan'. Kwi' ngwaña'an, ku'ni ne' kunan cha' su'we nu nsu'wi 'wan, kana' cha' kan' 'wan bra kan'.

20 Su'we la cha' ta Ndiose cha' su'we nu tnun chin' 'wan nde se'en ndi'in Ni; ja ku tña' cha' su'we kan', ja ka ñu'un ran, lo'o ja ka ku'ni ne' kunan cha' su'we kan'.

²¹ Nganun kasiya 'wan nde se'en ndiya ska cha' nu nchka la ti ti' wan, ni siya ska cha' su'we nu xo' ti'in wan lo chalyuu, ni siya ska cha' su'we nu ndi'in cha' kaja 'wan nde se'en ndi'in Ndiose.

Nu lka xaa 'ñaan tyukwi ña'aan

²² 'Kiloan ni, kan' lka nu nda xaa 'ñaan tyukwi ña'aan. Xa nu ti su'we ti kiloan, ka ña'aan nchga lo tñan nu ti ndiya cha' ku'nian, ka ku'nian xkwi' cha' su'we bra kan'.

²³ Xa nu ti'í kiloan, ja ka ku'nian tñan, cha' ja ndyukwi 'a xaa 'ñaan bra kan'. Kwi' ngwaña'an ka ni' kasiya 'wan, bra nu ja ndyukwi xaa 'wan chun' ndi'in cha' kuxi 'wan, 'siya' ti ja ka 'a xu'wi xaa ni' kasiya 'wan bra kan'! Tla 'a kanun tyukwi ña'aan wan lo'o kasiya 'wan bra kan'.

Sa ña'an nchkwi' Ndiose cha' 'in tñi

²⁴ 'Ja ska nten ka xu'wi tukwa x'nan ne' ska bra ti. Ja ka kunan wan cha' nchkwi' Ndiose bra nu lye 'a nda'an cha' tiye wan cha' 'in tñi. Si ngwaña'an ngi'ni wan, wa lka nsu'wi tukwa x'nan wan bra kan'. Ja chan ña'an ti'í wan 'in ska x'nan wan, lo'o ka su'we tiye wan ña'an wan 'in xka x'nan wan bra kan'. Kwi' ngwaña'an, kunan su'we wan cha' nchkwi' nu ngwa x'nan wan ti kulo kan', lo'o kanun kuxi wan lo'o xka bra kan'.

Ña'ansiin su'we Ndiose 'in sñi'

²⁵ 'Nduwe 'a ti' Ndiose 'wan, kan' cha' ja ndi'in cha' tya'an 'a cha' tiye wan sa ña'an ka ku'u wan lo chalyuu, nan ka ku wan, nan ka ko'o wan se'en ndi'in wan. Ja tya'an 'a cha' tiye wan la nde kaja ste' wan. Ya' la ni cha' lu'uun tian, ni siya ja ka'an

'a nan kuan; ya' la ni cha' su'we ti tyukwi ña'aan, ni siya ja su'we 'a stean'.

²⁶ Tya'an chin' cha' tiye wan sa ña'an nchka 'in kiñi nu ndukwi kwan: ja ntya i' nskwa', ja nextun i' tya, ja ññan i' ju'wa se'en xo' ti'in i' nan ku i'; Stian Ndiose nu ndi'in nde ni' kwan, nda Ni nan ku i' ngwa ti ña'an. Lo'o 'wan ni, ¿ta chin' la nsu'wi lyo wan ke ska kiñi se'en ndi'in Ndiose a? ¡Si'i! Ka'an la nsu'wi lyo wan cha' 'in Ndiose.

²⁷ Lo'o xka cha' 'wan, ja ka kaluu la wan sa jlu'we metro kwan la, ni siya ka'an 'a cha' tya'an tiye wan.

²⁸ 'Kwi' ngwaña'an ste' wan, ¿ni cha' ndya'an 'a cha' tiye wan cha' 'in ran? Tya'an chin' cha' tiye wan xa nu ña'an wan keé nu ndukwa laja kixin' kwa. Su'we ti ngaluu ran, ja ngi'ni ran tñan, ja nchka 'in ran kwiñan te' ku' ran.

²⁹ Ayman Salomón nu ngwa ree kuliya' 'a nu ngwa s'ni ni, su'we 'a ña'an ste' yu kula kan'; lo'o ja su'wa ña'an ste' yu lo'o keé kwa, cha' su'we la ña'an keé kwa siya' ti.

³⁰ Su'we 'a ngwiñan Ndiose keé kwa, cha' nda Ni ska lo cha' ndi'ya 'in keé kan', ni siya ska ti tsan talo keé kwa, kan' nchkin ran ndi'in bra; kwi' ngwaña'an, ta Ndiose te' ku' wan, ni siya chin' 'a ndyaa ña'an ti' wan 'in Ni.

³¹ Kan' cha' ja ndi'in cha' tya'an 'a cha' tiye wan sa ña'an cha' kuxi nu tyukwa wan nde loo la. Ja chkwi' lye wan: “¿La nde kaja nan ku ba a?” Ja chkwi' wan: “¿La nde kaja tyi'a ko'o ba a?” Ja chkwi' wan: “¿La nde kaja ste' ba a?”

³² Kwi' ngwaña'an nda'an 'a cha' tiye nten nu ja ndyaa ña'an ti' 'in Ndiose. Jlyo ti' Stian Ndiose nu

ndi'in nde ni' kwan cha' lyiji cha' kan' 'wan,

³³ kan' cha' si'i cha' kan' tsaa naan wan. Su'we la si ta wan chabiya' 'in Ndiose cha' ka Ni ndloo ni' kasiya 'wan, su'we la si ku'ni wan nchga cha' nu nchka ti' Ndiose cha' ku'ni wan lo chalyuu re; bra kan' ta Ni nchga nan nu lyiji chin' 'wan.

³⁴ Kwi' ngwaña'an, ja ndi'in cha' tya'an cha' tiye wan cha' 'in sa ña'an nu ka 'wan la tyaa. Xka tsan lka kan'. Ska ti 'in tsan ni tya'an chin' cha' tiye wan sa ña'an ku'ni wan cha' tyijin lyo wan 'in cha' kuxi nu tyukwa wan ni.

7

Ja su'we xtya ne' ki'ya 'in ta'a nten ne'

¹ Xka cha' ni: Ja xtya wan ki'ya 'in ta'a nten wan, cha' ja chan xtya Ndiose ki'ya 'wan xa nu ku'ni wan ngwaña'an.

² Sa ña'an nchkwi' wan cha' kuxi 'in xka ta'a nten wan bra nu msin' ti' wan, kwi' ngwaña'an ku'ni biya' Ndiose 'wan. Sa ña'an biya' nu nchkwi' wan 'in ta'a nten wan, ti kwi' biya' kan' ku'ni Ndiose lo'o wan.

³ ¿Ni cha' ndla 'a nchkwi' wan 'in ska cha' kuxi nu nsu'wi 'in xka ta'a nten wan? Ña'an ti' si lka ran ska yuu kata ti nu wa yten kiloo ne'. Ja nduwe ti' wan cha' tnun 'a cha' kuxi nu ngi'ni ykwi' wan, sa ña'an si lka ran ska mti tnun nu nsu'wi kiloo wan, ti ykwi' ti wan.

⁴ ¿Ni cha' lka tnun 'a tiye wan cha' chkwi' wan cha' re lo'o nten kan': “Taa chabiya' kuloñ yuu nu nsu'wi kiloo” a? Ngwaña'an nchkwi' wan lo'o nten kan', lo'o ja ña'an wan mti nu nsu'wi kiloo ykwi' wan.

⁵ ¡Ne' kwiñi lka wan! Kulo la tyo'o mti tnun nu nsu'wi kiloo ykwi' wan, bra kan' ka ña'an su'we wan cha' kulo wan yuu kata nu nsu'wi kiloo ta'a nten wan.

⁶ 'Cha' su'we nu ykwi' Ndiose ni, ja su'we si tsa chkwí' wan cha' su'we kan' lo'o nten xa'an nu ja nchka ti' kuan cha' kan' siya' ti, cha' ña'an ti' xne', ngwaña'an nchka ti' nten kan'. Ta wan cha' kasin' ti' 'in ne' xa'an kan', ka liye' ti' ne' 'wan bra kan'. Kwi' ngwaña'an, ja su'we xtya wan ska kee xaa nu ka'an 'a nsu'wi lyo 'wan se'en ndi'in kuwe', cha' bra ti lyo'o su'wa i' 'in nan su'we kan'.

Sa ña'an nu su'we la jñaan ska cha' 'in Ndiose

⁷ 'Xka cha' ni: Jñan wan ska cha' 'in Ndiose, lo'o ta Ni cha' kan' 'wan bra kan'; tsa naan wan 'in Ndiose, lo'o tyija lyo Ni 'wan bra kan'; tyukwi ti tiye wan chkwí' wan lo'o Ndiose, kuan Ni cha' nu chkwí' wan lo'o Ni bra kan'.

⁸ Nchga nten nu jñan ska cha' 'in Ndiose, kaja cha' kan' 'in ne' bra kan'; nchga nten nu tsa naan 'in Ndiose, tyija lyo Ni 'in ne' bra kan'; kwi' ngwaña'an, nchga nten nu tyukwi ti tiye ne' chkwí' ne' lo'o Ndiose, kuan Ni cha' nu chkwí' ne' lo'o Ni bra kan'.

⁹ 'Ja ska wan ta wan ska kee ku sñi' wan bra nu jñan nu xuwe jaxlya ku. ¿Ta ta wan kee ku a?

¹⁰ Ja nsu'wi nten nu ta ska kuan ku sñi' bra nu jñan nu xuwe kula ku. ¿Ta ku'ni wan ngwaña'an a?

¹¹ Kan' cha' sikwa, cha' nu jlyo ti' wan sa ña'an ta wan nan su'we 'in sñi' wan, ni siya xa'an tiye wan, kwi' ngwaña'an jlyo la ti' Stian Ndiose nu ndi'in nde ni' kwan sa ña'an nu ta Ni nan su'we 'in nten nu njñan ska cha' 'in Ni.

12 'Ndi'in cha' ku'ni wan cha' su'we lo'o xka la nten si nchka ti' wan cha' su'we ti ku'ni ne' lo'o wan. Ti kwi' tñan kan' ngulo Ndiose lo kityi nu ngwa'an ayman Moisés, ti kwi' ti cha' ngwa'an xka la ayman nu ykwi' cha' 'in Ndiose lo'o nten nu ngwa s'ni; ska ña'an ndyo'o ti cha' nu ykwi' nchga ne' kan' lo kityi.

Tu lo'oo lu'wi ti

13 'Xka cha' ni: Ndi'in cha' tyijin wan tu lo'oo lu'wi ti. Tnun 'a tu lo'oo, kwi' xiin 'a tuwiin se'en tsa'a ne' lo jwlyaa. Su'we 'a ña'an tuwiin kan', nxke' ti' ne', kan' cha' ka'an 'a nten nda'an tuwiin kan'.

14 Lu'wi 'a tu lo'oo, lti ti tuwiin se'en tsa'a ne' nu mjwi chalyuu nu ja tsa'a tii 'a 'in ne'; chin' ti nten ndyija lyo tuwiin kan' 'in ne'.

Ka jlyo tian' ni yka lka yka kan' bra nu ña'aan nan nu ndyo'o lo ran

15 'Xka cha' ni: Cha' tiya ti ti' wan ku'ni wan lo'o nten nu kwiñi, nu nchkwi' cha' chabiya' 'in Ndiose ndu'u ne' 'wan, nchkwi' ne'. Ska 'ni su'we lka sly'a, ja tlá i'; lo'o ne' kwiñi kan', nchka ti' ne' kwiñi lyo'o ne' 'wan cha' nten su'we lka ne', cha' lka ne' ña'an ti' sly'a'. Su'we 'a ngi'ni ne' lo'o wan, lo'o nde ni' kasiya 'in ne' kan', xa'an 'a ne'. Kwiñi 'a ne' kan'. Ja lka ne' kan' ña'an ti' sly'a'; ña'an ti' nguo'o nu tlá 'a, ngwaña'an lka ne' kan'.

16 Ka xu'wi lyo wan 'in ne' kwiñi kan' xa nu ña'an wan sa ña'an tñan ngi'ni ne', ni siya cha' su'we, ni siya cha' kuxi ngi'ni ne'. Ja ndyo'o mta chi kutun 'in kiche' stya', lo'o ja nda yka kiche' nan xi kuan.

17 Lo nchga yka kwiñi ndyo'o nan nu kunanjo'o 'ñaan; yka nu tlá ni, ja ka kuan nan nu ndyo'o lo ran.

18 Ja tyo'o nan nu ja su'we nchku 'in ska yka kwiñii; ngwaña'an ska yka nu tlá, ja su'we nan nu ndyo'o lo ran.

19 Si'yu ne' yka nu tlá kan', cha' ja ka kunanjo'o ran 'ñaan; tikin ne' yka kan' bra kan'.

20 Nchka biya' ti' wan sa ña'an lka ska yka bra nu ña'an wan nan nu ndyo'o lo ran; kwi' ngwaña'an, ka biya' ti' wan si kwiñi ne' kan' bra nu ña'an wan sa ña'an tñan nu ngi'ni ne'.

Si'i nchga nten nu sten se'en lka Ndiose ndloo la

21 'Nsu'wi 'a nten nu nchkwi' lo'oŭn: “X'naän, X'naän” ndukwin ne' 'ñaän; si'i nchga ne' kan' nu sten se'en lka Ndiose ndloo la. Nten nu kunan cha' nu nchkwi' Stiin nu ndi'in nde ni' kwan, sa kan' ti nten lka nu sten se'en nu lka Ndiose ndloo la.

22 Bra nu tiya bra cha' ku'ni biya' Ni 'in nchga nten chalyuu, bra kan' tyo'o tukwa ka'an nten nu chkwi' lo'oŭn: “X'naän, X'naän” nchkwin ne' 'ñaän, “lo'o ba re, wa ykwi' ba lo'o nten chabiya' 'iin. Chabiya' 'iin wa ngulo ba 'in kwi'in kuxi nu msñi 'in nten, lo'o wa y'ni ba xka la cha' tnun chabiya' 'iin” nchkwin ne' kan' 'ñaän.

23 Lo'o bra kan' nde lka cha' nu ndi'in cha' xkweën 'in ne' kan': “Ja nsu'wi lyoŭn 'wan siya' ti. jYaa lya wan cha' ne' xa'an lka wan!”

Tukwa lo na'an mñan ne'

24 'Nchga nten nu kunan su'we cha' nu nchkwiin' re, nchga nten nu tukwa cha' nu nchkwiin', lka ne' kan' sa ña'an lka ska nten nu ngi'ni su'we

kwenta xa nu ti ji kwiñan yu na'an 'in yu. Kan' mñan yu kan' na'an 'in yu chun' ska kee jaa'.

²⁵ Lo'o kan' ngwi'ya 'a tyoo, sa ña'an ya' nu ndiya tyi'a yuu la kiya' na'an nu ndukwa chun' kee kan'. Kwi' lye 'a ngwa kwi'in, lo'o ja mlyuu na'an kan', cha' su'we 'a se'en ndukwa ran chun' kee kan'.

²⁶ Kwi' ngwaña'an, nchga nten nu kunan cha' nu nchkwiiñ' lo'o ne', lo'o ja tukwa 'a ne' cha' kan', lka ne' kan' ña'an ti' ska nten tintu nu ja y'ni su'we kwenta bra nu ngwiñan yu na'an 'in yu lo ysiin ti.

²⁷ Ngwi'ya 'a tyoo bra kan', sa ña'an ya' mxlyuu tyi'a yuu 'in na'an kan', lo'o lye 'a ngwa kwi'in. Ja mdalo na'an kan' bra kan', mlyuu ran bra kan'. ¡Mdyii ran ngu'un ran bra kan'! Lo'o nten nu ja xlyaa kunan cha' nu nchkwiiñ, ¡tyii cha' 'in ne' kan' siya' ti!

²⁸ Bra wa mdyii ngwa'u Jesús nchga cha' re 'in ne', yuwe 'a ti' nten ka'an kan' ni ña'an cha' ndu'u yu 'in ne' bra kan'.

²⁹ Mske' ti' ne' cha' tnun 'a chabiya' nsu'wi 'in yu xa nu nchkwii' yu lo'o ne', ja ngi'ni yu sa ña'an ngi'ni mstru nu ndu'u cha' jo'o 'in ne'.

8

Y'ni Jesús jo'ó 'in ska yu ti'í nu mtsu' kuna' yu

¹ Ngwi'ya Jesús lo ki'ya kan' bra kan'. Ka'an 'a nten nda'an 'in yu.

² Lo'o bra kan' mdo'o tukwa ska yu ti'í se'en ndi'in Jesús. Mduun xtyin' yu se'en ndi'in Jesús, cha' nchka ti' yu jñan yu 'in Jesús cha' ku'ni jo'ó 'in yu, cha' nu msñi kicha mtsu' kuna' yu kan'.

—X'naän —ndukwin yu ti'í kan' 'in Jesús—, ku'nii jo'ó 'ñaän. Jlyo tiän' cha' nchka 'iin ku'nii cha' ka luwi kunaän'.

³ Kan' mstyá ya' Jesús chun' yu ti'í kan', mstyá ya' se'en mtsu' kuna' yu.

—Ku'niin jo'ó 'iin —ndukwin Jesús 'in yu ti'í kan'—. Kanun luwi kuna' ni —ndukwin bra kan'. Bra ti nchkaa yu ti'í kan', ngwa luwi kuna' yu.

⁴ Xiya' ykwi' Jesús lo'o yu bra kan':

—Yaa lyaa se'en ndi'in sti jo'o —ndukwin—. Nde kwa taa lomstan nu ykwi' ayman Moisés cha' taan 'in Ndiöse bra nu nchkaan 'in ska kicha nu nsu'wi 'ñaan. Ja katsaa' 'in xka la nten. Ka biya' ti' nten cha' wa nchkaa, bra nu kunan ne' cha' wa msñi sti jo'o lomstan nu ndaa.

Y'ni Jesús jo'ó 'in msu 'in x'nan sndaru

⁵ Lo'o mdiyan Jesús tu'wa kichen Capernaum bra kan'. Kichen kan' ndyukwa ta'a yu lo'o ska capitán 'in sndaru romano, kwi' nu mjñan 'in Jesús cha' ku'ni jo'ó 'in ska nu ti'í:

⁶ —X'naän —ndukwin capitán kan' 'in Jesús—, ti'í 'a msu 'ñaän. Nan nskwa ti yu na'an tyiin cha' nchkun' ña'aan tyukwin nsu'wi 'in yu, ti'í 'a yu kwa ni.

⁷ Ykwi' Jesús lo'o yu bra kan':

—Tsa'aän. Ku'niin cha' chkaa yu —ndukwin Jesús 'in yu capitán kan'.

⁸ Bra ti mxkwen capitán 'in Jesús bra kan':

—X'naän —ndukwin capitán 'in Jesús—, ja su'we tsaá nde na'an tyiin, cha' si'i nten su'we lkaän. Sa kan' ti cha' nchka tiän', cha' kuloo tñan cha' katin kicha 'in yu; jlyo tiän' cha' chkaa msu 'ñaän bra kan', ni siya tijyu' ti tyuun chkwii'.

9 X'nan sndaru lkaän, na' lkaän ndloo 'in ska siyentu sndaru; kwi' ngwaña'an, ndiya nu lka ndloo la 'ñaän. Si kuloün tñan re 'in ska sndaru 'ñaän: “Yaa lyaa”, bra ti tsaa yu, cha' nchka tiän' cha' tsaa yu. Ngwaña'an si chkwiin' lo'o xka yu: “Kaan nde re”, bra ti kan yu se'en ndi'iin bra kan'. Ngwaña'an si kuloün tñan 'in msu 'ñaän: “Ku'nii tñan re 'ñaän”, chkwiin' lo'o yu, bra ti ku'ni yu tñan kan' 'ñaän —ndukwin capitán 'in Jesús—. Kan' cha' ni, jlyo tiän' cha' ka 'iin kuloo tñan cha' katin kicha kan' 'in msu kan' 'ñaän.

10 Nduwe 'a ti' Jesús bra nu ynan cha' nu ykwi' capitán kan'. Bra kan' ykwi' Jesús lo'o nchga nten nu nda'an ña'an 'in:

—Chañi 'a cha' nchkwiin' lo'o wan ni —ndukwin Jesús 'in ne'—. Ja ya ña'aän ska nten nu su'we la ndyaa ña'an ti' 'in Ndiose, sa ña'an nu ndyaa ña'an ti' capitán re; ña'aan nasiyun Israel re, ja nsu'wi nten nu ndyaa ña'an ti' 'in Ndiose ngwaña'an.

11 Chañi cha' nde loo la kala ka'an 'a nten tijyu', lo'o nten lo yuu nde se'en ndyo'o tukwa kwichaa, lo'o nten lo yuu nde se'en ndyaa kwichaa, tsaa ne' cha' tyukwa ne' tu'wa msaa se'en lka Ndiose ndloo ni' kwan; su'wa ti tyitukwa ne' tu'wa msaa kan' lo'o ayman Abraham lo'o ayman Isaac lo'o ayman Jacob.

12 Kwi' ngwaña'an, ndiya xka ta nten nu lka sñi' Ndiose, ndukwin ne', lo'o ja kala 'a ne' kan' se'en ndi'in Ndiose. Kulo Ndiose tñan 'in angajle 'in Ni cha' tsaa xkwaan 'in ne' kan' nde se'en ndi'in tla; kanan 'a ne' kan' la kan', kasin' 'a ti' ne' sa ña'an ya' ku li'ya ne' cha' msin' ti' ne'.

13 Xiya' ykwi' Jesús lo'o capitán bra kan':

—Yaa lyaa na'an tyii sikwa —ndukwin Jesús—. Wa ndyaa ña'an tii' 'ñaan, kan' cha' nchkaa yu ni; ngwa tiin kicha kan' 'in yu —ndukwin Jesús 'in capitán.

Ti kwi' bra kan' nchkaa msu kan'.

Y'ni Jesús jo'ó 'in jya'an laa Tyu

¹⁴ Chun' ndi'in la ndyaa Jesús nde na'an tyi Tyu. Lo'o na'an Jesús cha' nskwa ti jya'an laa Tyu lo ki'yan, cha' lye 'a nsu'wi tikee' 'in bra kan'.

¹⁵ Mstyaa ya' Jesús chun' ya' ne' kula kan'. Bra ti mdo'o tikee' 'in; mdyituun ne' kula kan' bra kan', y'ni kuwe ti' cha' kee' chin' nan ku Jesús lo'o ta'a nda'an.

Y'ni Jesús jo'ó 'in tyun ne' ti'í

¹⁶ Bra wa msiin, mdiyan ka'an 'a nten se'en ndi'in Jesús, mdiyan lo'o ne' 'in ne' kicha nu nsu'wi kwi'in kuxi 'in bra kan'. Kan' ngulo Jesús tñan 'in kwi'in kuxi kan', cha' tyo'o tsu' ran 'in ne' ti'í kan'; nchkaa ne' kan' bra kan'. Kwi' ngwaña'an, y'ni Jesús jo'ó 'in nchga ne' ti'í nu mdiyan se'en ndi'in yu.

¹⁷ Ngwaña'an ngwa, cha' mdo'o tukwa ti kwi' ti cha' nu ngwa'an ayman Isaías lo kityi nu ngwa s'ni. Nde lka cha' nu nchkwi' kityi kan': “Wa jlyo ti' Ndiose nchga se'en ti'í 'ñaan, jlyo ti' Ni sa ña'an kicha nu nsu'wi 'ñaan kwenta skaan; y'ni tyii Ndiose nchga kicha kan', nchkaan bra kan'.” Ngwaña'an ndukwa cha' lo kityi, kan' cha' ngi'ni Jesús jo'ó 'in nten nu ti'í.

Nten nu ngwa ti' tya'an lo'o Jesús

¹⁸ Ngwa xka tsan na'an Jesús cha' ka'an 'a nten nda'an se'en ndi'in yu, kan' cha' ngulo yu tñan 'in

ta'a nda'an yu cha' tsaa lo'o ne' 'in yu ni' yka na'an la xka la'a tsu' tiyu' kan'.

¹⁹ La wa tsaa ti ne', bra kan' mdiyan ska mstru nu ndu'u cha' jo'o cha' chkwi' lo'o Jesús:

—Mstru —ndukwin mstru kan' 'in Jesús—, lo'o'ün nchka tiän' tya'aän lo'oo nchga se'en tsaa.

²⁰ Mxkwen Jesús 'in mstru kan' bra kan':

—Nu lka kuta' ni, ni' tukee 'in i' xu'wi i'; kwi' ngwaña'an kiñi xuwe, ndiya se'en xkwa i'. Lo'o na' ni, wa msu'wa Ndiose 'ñaän ndijyaän lo chalyuu re cha' kaän nten, lo'o ja ndiya se'en kajaän', ja ndiya se'en tyukwaän xitñaän'.

²¹ Lo'o kan' ykwi' xka yu ki'yu nu mda'an lo'o Jesús:

—Yu kula —ndukwin yu 'in Jesús—, taa chin' chabiya' 'ñaän cha' nu tya'aän tu'wa na'an tyiän, tya'aän cha' ku'niän kwentaän 'in stiän sa ña'an ya' kaja stiän, cha' tsaa ytsiän' 'in stiän kulo ndukwa. Tsa'aän lo'oo bra kan'.

²² Kan' mxkwen Jesús 'in yu:

—Su'we la kaan ña'aan 'ñaän bra ti —ndukwin Jesús 'in yu—. Ti ndiya chin' xka la nten ta'a wan nu ka kutsi' 'in nten 'iin nu wa ngujwi.

Ngulo Jesús tñan 'in kwi'in lo'o kuloo' lo tiyu'

²³ Chun' ndi'in la yten Jesús ni' yka na'an xuwe lo'o ne' nu ngi'ni xa'an 'in yu, mdo'o ne' ndyaa ne' bra kan'.

²⁴ Kan' lye 'a ngwa kwi'in, lye 'a ngatsa tyi'a lo tiyu', wa sten ti yka na'an kan' ni' tyi'a si'ya kuloo'. Laja' Jesús nsu'wi ni' yka na'an kan' bra kan'.

²⁵ Mlyo ne' sla Jesús bra kan':

—¡Yu kula! —ndukwin ne' 'in Jesús—, ¡kulaa lyaa 'wa se'en kuxi re! Wa sten ti yka na'an re ni' tyi'a, lo'o kajaan bra kan'.

²⁶ Lo'o mxkwen Jesús 'in ne' kan' bra kan':

—¿Ni cha' ngitsen 'a wan? —ndukwin 'in ne'—. ¡Chin' 'a ndyu'wi ti' wan 'in Ndiose, chun' ja ndyaa ña'an ti' wan 'in Ni cha' ka kulaa Ni 'ñaan!

Kan' mdyituun Jesús, ykwi' lo'o kwi'in lo'o kuloo' cha' ka tiin ran; bra ti ngwa tiin ran bra kan'.

²⁷ Yuwe 'a ti' ne' kan' bra kan', chun' ngwa tiin kuloo' lo'o kwi'in siya' ti.

—¿Ti lka ra yu kula re? —ndukwin ne' 'in ta'a ne'—. Ynan kuloo' cha' nu ykwi' yu, kwi' ngwaña'an ynan kwi'in cha' nu ykwi' yu kula re lo'o ran.

Y'ni Jesús jo'ó 'in ne' Gadara nu nsu'wi kwi'in xa'an

²⁸ Chun' ndi'in la mdi'in ne' la xka la'a tsu' tiyu' nde lo yuu 'in ne' Gadara. Kan' ndyukwa ta'a Jesús lo'o tukwa yu ti'í; nsu'wi kwi'in xa'an 'in ta'a tyukwaa ne' kan', kan' cha' tlá 'a yu ti'í kan'. Ndi'in ne' ni' lyo'oo 'in jyo'o, lo'o ja nda ne' chabiya' tyijin xka la nten tuwiin kan' bra kan'.

²⁹ Lo'o y'ni kwi'in xa'an kan', cha' kwen 'a nxi'ya yu ti'í kan':

—Jesús, ¿ni cha' nda'aan se'en ndi'in ba? —ndukwin yu ti'í kan'—. Nu'win lkaa ska ti nu lka Sñi' Ndiose. ¿Ta taa nu ti'í 'wa, nchka tii' a? Ja ya tiya bra tiyan nu ti'í 'wa.

³⁰ Nde kwa la chin' ndi'in ska ta ka'an 'a kuwe', nda'an naan i' nan ku i' bra kan'.

³¹ Lo'o y'ni kwi'in xa'an kan', cha' mjñan yu ti'í chabiya' 'in Jesús cha' 'in kwi'in kan':

—Jlyo ti' ba cha' nchka tii' kuloo kwi'in nu nsu'wi 'wa, cha' ku'ni jo'ó 'wa —ndukwin ne' kan' 'in Jesús—. Kan' cha' taa chin' chabiya' 'in kwi'in cha' tsa'a ran xu'wi ran 'in kuwe' nu nda'an kwa.

³² Kan' nu mda Jesús chabiya' 'in kwi'in kan':

—Yaa lya wan —ndukwin Jesús 'in kwi'in kan'.

Bra ti mdo'o tsu' kwi'in xa'an 'in ta'a tyukwaa yu ti'í kan', ndyaa kwi'in kan' msñi 'in kuwe' bra kan'. Msnan nchga kuwe' kan', mdiyuu i' ska tu' kwa'an kwan tu'wa tiyu' yten i' ni' tyi'a, ngujwi nchga kuwe' kan' bra kan'.

³³ Bra nu na'an ne' nu nsu'wi kwan 'in kuwe' kan' sa ña'an nu ngwa 'in i', ytsen 'a ne' bra kan'. Msnan ne' nde lo kichen cha' katsa' ne' 'in ta'a kichen tyi ne' sa ña'an nu ngwa 'in yu ti'í nu yu'wi kwi'in xa'an 'in, kwi' ytsa' ne' 'in ne' sa ña'an nu ngwa 'in kuwe' kan' bra kan'.

³⁴ Bra wa ynan ne' kichen cha' kan', mdo'o ne' ndyaa ne' se'en ndi'in Jesús. Bra nu ndyukwa ta'a ne' lo'o Jesús, bra kan' lye 'a mjñan ne' kan' 'in yu cha' ja kanun 'a yu lo yuu 'in kichen tyi ne'; tyaa yu xka se'en, nchka ti' ne' bra kan'.

9

Y'ni Jesús jo'ó 'in ska nu ti'í nu nchkun' ña'aan tyukwin yu

¹ Chun' ndi'in la xiya' yten Jesús ni' yka na'an, cha' tyijin yu lo tiyu' tyaan yu kichen tyi yu.

² Bra nu ngala yu kichen kan', bra kan' mdiyan lo'o nten 'in ska nu ti'í nu nchkun' ña'aan tyukwin yu; ndijyan ne' se'en ndi'in Jesús cha' ku'ni yu jo'ó 'in yu ti'í kan'. Nsu yu ti'í kan' ska ni' katan. Jlyo

ti' Jesús cha' ndyaa ña'an ti' ne' kan' 'in, kan' cha' ykwi' yu lo'o yu ti'í kan':

—Chkaa su'wee, sñiën' —ndukwin Jesús 'in yu ti'í—. Wa y'niñn cha' tlyu ti' 'in ki'ya nu ndukwii.

³Lo'o ni, mda'an 'a cha' tiye mstru nu ndu'u cha' jo'o nu nduun kwi' se'en ti: “Cha' kuxi nchkwi' yu ki'yu re cha' 'in Ndiose” mske' ti' ne'.

⁴Lo'o mgii ti' Jesús nchga loo cha' nu nda'an tiye ne' kan'.

—¿Ni cha' kuxi 'a nda'an cha' tiye wan lo'oñn ni? —ndukwin Jesús 'in mstru kan'—.

⁵Ja ndiya ti' wan cha' nu ykwiñn' lo'o yu ti'í re: “Wa y'niñn cha' tlyu ti' 'in ki'ya nu ndukwii.” ¿Ta chkwiiñn' lo'o yu ti'í: “Tyituun, tyo'oo ta'aan ni” su'we la sikwa a? —ndukwin Jesús—.

⁶Ndi'in cha' ka biya' ti' wan cha' nda Ndiose chabiya' 'ñañn cha' ku'niñn cha' tlyu ti' 'in ki'ya nu ndukwi nten chalyuu, cha' wa msu'wa Ndiose 'ñañn ndijyañn cha' kañn nten. Ka biya' ti' wan bra nu ña'an wan cha' chkaa yu ti'í re.

Bra kan' xiya' ykwi' Jesús lo'o yu ti'í kan':

—Tyituun —ndukwin Jesús 'in yu—, chkwaan katan 'iin, cha' tyaa lo'oo 'in ran nde na'an tyii.

⁷Bra ti mdyituun yu ti'í kan', ndyaa yu na'an tyi yu.

⁸Ka'an 'a nten na'an cha' kan', ytsen 'a ne' bra kan'. Y'ni tnun ne' 'in Ndiose bra kan', cha' wa nda Ni chabiya' 'in nten chalyuu cha' ku'ni cha' tnun ngwaña'an, mske' ti' ne'.

Ngulo suwi Jesús 'in Mateo

⁹Mdo'o Jesús ndyaa, lo'o wa tyijin ti yu tu'wa na'an se'en ndukwa Mateo nu ndlo tñi 'in ne' cha'

'in ne' xka la'a tsu'. Ykwi' Jesús lo'o Mateo kan' bra kan':

—Tyo'oo ña'aan 'ñaän —ndukwin Jesús 'in yu.

Bra ti mdyituun Mateo, ngulaa ti'in yu tñan 'in yu, ndyaa ña'an yu 'in Jesús bra kan'.

¹⁰ Chun' ndi'in la mdi'in Jesús na'an tyi Mateo, ndukwa yu tu'wa msaa cha' nchku yu bra kan'. Lo'o mdiyan ka'an 'a nten se'en ndi'in Mateo cha' ku ne' lo'o yu. Ndi'in ne' ta'a ngi'ni tñan lo'o Mateo, lo'o xka ta nten nu ndukwin ne' kichen 'in cha' ja su'we nten kan', lo'o ne' nu ngi'ni xa'an cha' 'in Jesús; su'wa ti nchku nchga ne' kan' lo'o bra kan'.

¹¹ Na'an ne' fariseo cha' ndukwa Jesús nchku yu lo'o ne' kan', kan' cha' bra ti ykwi' ne' lo'o ne' nu ngi'ni xa'an cha' 'in yu:

—¿Ni cha' su'wa ti nchku x'nan wan lo'o nten nu ja su'we kwa, lo'o nten nu lka msu 'in ne' xka la'a tsu', kwi' nu nda'an ndlo ka'an 'a tñi kwiñi ti 'in ne' ta'a kichen tyian? —ndukwin ne' fariseo kan'.

¹² Ynan Jesús cha' nu nchkwi' ne' kan' lo'o ta'a nchku yu, kan' cha' ykwi' yu lo'o ne' fariseo bra kan':

—Nten nu ja ti'í ni, ja ndi'in cha' ka jo'ó 'in —ndukwin Jesús 'in ne'—. Nu ti'í ndi'in cha' ka jo'ó 'in.

¹³ Yaa lya wan kunan su'we wan cha' re nu ngwa'an ayman lo kityi s'ni: “Nchka la tiän' cha' chka t'nan ti' wan 'in ta'a nten wan, ndukwin Ndiose. Kan' nu su'we la, ni siya ja ta wan ka'an 'a lomstan 'ñaän; kwi' ngwaña'an, ja ndi'in cha' ta wan 'ni skun' wan cha' ka lomstan 'ñaän.” Ngwaña'an ndukwa cha' lo kityi. Lo'o na' ni, ja ndi'jyaän lo chalyuu cha' chkwiin' lo'o nten nu su'we

'a ti ykwi' ti, nxke' ti' ne'; wa ndijyaän lo chalyuu cha' chkwiïn' lo'o nten nu jlyo ti' cha' ndiya cha' kuxi tiye ne', cha' ka jyu'u ti' ne' bra kan'. Kulaa ya' ne' cha' kuxi kan' bra kan'.

Mnicha' ne' judío 'in Jesús ni cha' ja ku'ni ktiyu 'in tsan nu ngi'ni ku'nan ne'

¹⁴ Chun' ndi'in la mdiyan xka ta nten se'en ndi'in Jesús, kwi' nu ngi'ni xa'an cha' 'in Xuwa nu ndukwatya 'in ne' lka nten kan'. Ykwi' ne' kan' lo'o Jesús bra kan':

—Ndiya tsan nu ngi'ni ku'nan bare —ndukwin ne'—, kwi' ndiya tsan nu ngi'ni ku'nan ne' fariseo. Bare ngi'ni kti ba tsan kan', lo'o ne' nu ngi'ni xa'an cha' 'iin, lo'o ykwii', nchga tsan nchku wan. ¿Ni cha' nchku wan ya ña'an ti tsan bra nu ngi'ni ku'nan bare?

¹⁵ Mxkwen Jesús 'in ne' kan' bra kan':

—Bra nu kaja kwilyo'o nten, nchku ne' nu nda'an lo'o yu ki'yu; ja xi'in ti' ne' tsan nu ndi'in ne' lo'o nu ki'yu nu mjwi kwilyo'o kan' —ndukwin Jesús 'in ne' bra kan'—. Bra nu tiya tsan cha' tyaa lo'o nten 'in yu ki'yu kan', ku'ni ku'nan ne' nu ta'a su'we nsu'wi yu ki'yu kan', cha' ka xi'in ti' ne' bra kan'. Kwi' ngwaña'an, su'we nka tiye ta'a su'we nsu'wiïn ni, lo'o ka xi'in ti' ne' chun' ndi'in la —ndukwin Jesús.

¹⁶ 'Xka cha' chkwiïn' lo'o wan: Ja tukwin ku'ni xu'we ska te' kusun 'in ne' lo'o sa yu'we te' tiji, cha' bra nu wa ngaten te' kan', ndyi'iin te' tiji kan'; kati' se'en nchkwon te' kan' bra kan'.

¹⁷ Ti kwi' ti cha', ja xu'wi ne' xalyu nu tka mdo'o ti ni' chka' kula. Bra nu su'wa ne' 'in ran ni' chka' kula, ndla ti katsu si' chka' kan'; tyii chka' kan'

lya'a bra kan', tyii xalyu kalu bra kan'. Ni' chka' tiji xu'wi xalyu nu tka mdo'o ti; ngwaña'an talo ta'a tyukwaa nan, lo'o xalyu lo'o chka' bra kan'. (Ngwaña'an ngwa'u Jesús 'in ne' cha' ka biya' ti' ne' cha' ja su'we xtiyaa' ne' cha' kwi nu ndu'u yu cha' 'in Ndiose lo'o cha' kula nu mxnun ayman kula cha' ku'ni ne'.)

Sñi' Jairo, lo'o nu kuna'an nu yla' ste' Jesús - tukwa loo cha' tnun nu y'ni Jesús

¹⁸ Bra nu ti nchkwi' Jesús lo'o ne', kan' mdiyan ska ne' judío nu lka ndloo la; mduun xtyin' yu kula tloo Jesús, cha' jñan ska cha' tlyu ti' 'in yu bra kan':

—Tka ngujwi ti ska nu kuna'an lyu' ti, sñiën' —ndukwin yu kula kan' 'in Jesús—. ¿Ja tsaá chin' se'en ndi'iin cha' xtyaa yaa' chun' nu lyu' ti kan' a? —ndukwin—. Jlyo tiän' cha' ka 'iin ku'nii cha' tyu'u nu lyu' ti kan' xiya'.

¹⁹ Kan' cha' mdo'o Jesús lo'o ne' nu ngi'ni xa'an cha' 'in yu, ndyaa ne' lo'o yu kula kan'.

²⁰ Tuwiin se'en ndyaa ne' ndyukwa ska nu kuna'an ti'í 'in Jesús, mdiyan nde chun' yu cha' kala' kiya' ste' yu; wa tii tyukwa yijan ti'í nu kuna'an kan', cha' ngalu tnen ne' kula kan'.

²¹ “Nu kalaän' tiän' ste' Jesús, bra kan' chkaän.” Ngwaña'an mda'an cha' tiye ne' kula kan'.

²² Kan' mxituun Jesús, na'an 'in nu kuna'an kan': —Ku'nii xu'wee tiyee, sñiën' —ndukwin Jesús—. Ndyaa ña'an tii' 'ñään, kan' cha' nchkaa ni.

Lo'o bra ti nchkaa ne' kula kan' bra kan'.

²³ Chun' ndi'in la ndiya Jesús na'an tyi nu lka ndloo la kan', na'an yu cha' wa mdiyan ne' muska

nde kwa cha' nskwa angajle; nganan 'a nten ndi'in na'an tyi yu kula kan'.

²⁴ Ykwi' Jesús lo'o ne' bra kan':

—Tyaa wan su'we la —ndukwin—. Nan laja' ti nu lyu' re, si'i nan ngujwi re.

Mstyí lyo'o 'a ne' 'in Jesús bra kan'.

²⁵ Ngulo Jesús 'in ne' cha' kaja se'en sten ykwi' yu ni' ña'an se'en nskwa nu lyu' ti nu ngujwi kan'. Lo'o msñi yu ya' nu lyu' ti kan', mxituun yu nu lyu' ti bra kan'.

²⁶ Ngwaña'an ngwa cha' nganen cha' kan' nchga kichen se'en ndi'in nten la kwa.

Y'ni Jesús jo'ó 'in tukwa yu kwityiin'

²⁷ Chun' ndi'in la mdo'o Jesús ni' ña'an kan' ndyaa yu, kan' mda'an ña'an tukwa yu kwityiin' 'in yu. Msi'ya yu 'in Jesús bra kan':

—¡Chka t'nan tii' 'wa, yu kula! Nu'win lkaa nten ta'a ayman David —ndukwin ne' 'in yu.

²⁸ Bra wa mdiyan Jesús ni' ña'an, lo'o yu kwityiin' kan' mdiyan ne' se'en ndi'in yu. Ykwi' Jesús lo'o ne' bra kan':

—¿Ta ndyaa ña'an ti' wan cha' ka ñaän ku'niin cha' chkaa wan a? —ndukwin yu 'in ne'.

—Ndyaa ña'an ti' ba 'iin, yu kula —ndukwin yu kwityiin' kan' 'in yu.

²⁹ Kan' yla' Jesús kiloo ta'a tyukwaa yu kwityiin' kan'.

—Chkaa wan sikwa. Ngwaña'an ka 'wan cha' ndyaa ña'an ti' wan 'ñaän —ndukwin Jesús 'in yu kwityiin' kan' bra kan'.

³⁰ Bra ti nchkaa kiloo ne', ña'an su'we ne' bra kan'. Kwi' lye ykwi' Jesús lo'o ne' kan':

—Ja siya' katsa' wan cha' re 'in nten, cha' ja ka biya' ti' ne' ni ña'an ngwa cha' nchkaa kiloo wan —ndukwin Jesús 'in ne' kan'.

³¹ Mdo'o ne' ndyaa ne' bra kan', lo'o ytsa' ne' 'in nchga nten sa ña'an ngwa cha' tnun nu y'ni Jesús lo'o ne'; kan' cha' nganen cha' kan' ña'aan lo yuu kwa.

Y'ni Jesús jo'ó 'in ska yu ku'un

³² Ti kwi' bra nu wa tyo'o ti ne' kan' tyaa ne', bra kan' mdiyan xka ta nten, yan lo'o ne' 'in ska yu ku'un; nan ku'un yu si'ya kwi'in kuxi nu nsu'wi 'in yu.

³³ Bra nu ngulo Jesús kwi'in kuxi 'in yu ti'í kan', ngwa ykwi' yu ti'í bra kan', ni siya tsan ti ku'un yu. Yuwe 'a ti' nchga nten nu mduun nde kwa bra kan'.

—Ja ya ña'aan ska cha' tnun ngwaña'an —ndukwin ne' 'in ta'a ne'—. Ja nsu'wi nten tyukwi ña'aan nasiyun Israel re nu ka ku'ni jo'ó ngwaña'an —ndukwin ne'.

³⁴ Xka ña'an ykwi' ne' fariseo kan':

—Nan ndlo Jesús kwa 'in kwi'in kuxi nu nsu'wi 'in nten lo'o chabiya' 'in x'nan kune' xa'an, kan' cha' nchka 'in yu ku'ni yu ngwaña'an —ndukwin ne' fariseo kan'.

Ngwa t'nan 'a ti' Jesús 'in ka'an nten

³⁵ Chun' ndi'in la ndyaa Jesús nchga kichen xuwe, nchga kichen tnun, cha' kwa'u yu 'in ne' ni' lyaa 'in ne' judío. Ka'an 'a cha' ykwi' Jesús lo'o nten ni ña'an ka su'we cha', xa nu ka Ndiose ndloo ni' kasiya 'in ne'. Lo'o y'ni yu jo'ó 'in nchga nu ti'í lo'o nchga nten nu na'an 'a ti'.

³⁶ Ngwa t'nan 'a ti' Jesús 'in ka'an 'a nten nu nda'an ña'an 'in yu, cha' ja nchka 'in ne' kan'; ja jlyo 'a ti' ne' kan' ni ña'an nu tyi'in su'we la ne'. Sa ña'an ngi'ni slya' nu ja nsu'wi nu ña'ansiin 'in i', ngwaña'an ngi'ni nten ka'an kan', mske' ti' Jesús.

³⁷ Bra kan' ykwi' Jesús lo'o ne' nu ngi'ni xa'an cha' 'in yu, ytsa' yu ska cha' 'in ne' cha' 'in nten ka'an kan'. Ykwi' yu cha' ja ya kunan su'we nten kan' cha' 'in Ndiose, cha' ña'an ti' ska jyan nu su'we 'a ngutsi cha' wa ndla ti ku'ni ne' kwa 'in ran, ngwaña'an lka nten kan'.

—Chañi cha' nsu'wi 'a tñan re cha' chkwian' lo'o nten cha' sten ne' cha' 'ñaän —ndukwin Jesús 'in ne' kan'—. Lo'o chin' ti nten ndiya nu ka ku'ni tñan re.

³⁸ Kan' cha' chkwil' wan lo'o Stiin nu lka X'nan tñan re, cha' ti ta la Ni tyun nten nu ka ku'ni tñan re.

10

Ngulo suwi Jesús 'in tii tyukwa nten cha' ku'ni xa'an ne' cha' 'in yu

¹ Chun' ndi'in la msi'ya Jesús 'in tii tyukwa nten nu ngi'ni xa'an cha' 'in yu cha' kan ne' se'en ndi'in yu. Mda yu chabiya' 'in ne' kan', cha' tsaa ne' lo tñan 'in yu, cha' kulo ne' kwi'in kuxi nu nsu'wi 'in nten; lo'o mda yu chabiya' cha' ku'ni ne' cha' chkaa nchga nu ti'í, nchga nu nsu'wi kicha.

² Nde nda'aän nin ta'a tii tyukwa ne' nu ngulo suwi Jesús: kulo ngulo suwi yu 'in Simón, nu mstya Jesús xka nin cha' ka naan yu Tyu, lo'o Ndre ta'a ngula Simón kan'; kan' ngulo suwi yu 'in Santiago, lo'o Xuwa ta'a ngula Santiago, nu lka sñi' Zebedeo;

³ lo'o ngulo suwi yu 'in Lpe, lo'o Bartolomé, lo'o Toma, lo'o Mateo nu ngulo tñi 'in nten cha' 'in ne' xka la'a tsu' ti kulo; lo'o ngulo suwi yu 'in Santiago sñi' Alfeo, lo'o Tadeo;

⁴ ngulo suwi yu 'in Simón nu ngwa ne' cananista, lo'o Juda Iscariote nu kujwi' xu'wa 'in Jesús 'in nten kuxi nde loo la.

Ngulo Jesús tñan 'in tii tyukwa ne' kan', cha' tsaa lu'u ne' 'in ne' xka kichen

⁵ Ngulo Jesús tñan re 'in tii tyukwa ne' kan':

—Ja tsaa wan tuwiin nde xka la'a tsu' se'en ndi'in nten nu ja ndi'in cha' 'in lo'o Ndiose siya' ti, lo'o ja tsaa wan kichen tyi ne' Samaria —ndukwin Jesús 'in ne' kan'—.

⁶ Ska ti se'en ndi'in ne' Israel ta'a kichen tyi wan tsaa wan, cha' t'nan 'a ne' kan'; sa ña'an ngi'ni slya' nu wa mna', ngwaña'an ngi'ni ne' kan'.

⁷ Katsa' wan 'in nten nchga kichen cha' wa tiya ti bra cha' ka Ndiose ndloo la.

⁸ Ku'ni wan cha' chkaa ne' ti'í, ku'ni wan cha' tyu'u ne' xiya' bra nu wa ngujwi ne'; ku'ni wan jo'ó 'in ne' nu ngatsu' kuna', cha' ka luwi kuna' ne' ti'í kan' xiya'; kulo wan kwi'in kuxi nu nsu'wi 'in nten. Ja msñiín tñi cha' ndaän chabiya' 'wan cha' ku'ni wan jo'ó 'in ne' ti'í, kan' cha' ja xñi wan tñi cha' ku'ni wan jo'ó 'in ne' kan'.

⁹ Ja lo'o tñi kwi'ya wan tsaa wan, ni siya tñi oro, ni siya tñi plata, ni siya tñi xuwe;

¹⁰ ja lo'o kisu tyaja kwi'ya wan tsaa wan. Kwi' ngwaña'an, ja kwi'ya lo'o wan xka ykan', ja lo'o xka snan wan, ja lo'o yka skan kwi'ya wan tsaa wan. Tloo ti wan tsaa wan. Bra nu ndaya' wan 'in nten, ndi'in cha' xku ne' 'wan.

11 'Bra nu kala wan ska kichen, ni siya kichen tnun, ni siya kichen xuwe ti, bra kan' tsaa naan wan 'in ska nten nu su'we nka tiye ña'an 'wan. Se'en ndi'in yu kan' tyi'in wan sa ña'an bra nu tyo'o wan tsaa wan xka kichen.

12 Bra nu sten wan tu na'an tyi yu, jñan wan 'in Ndiose cha' tiin ti tyi'in ne' kwa tyi.

13 Si chañi cha' nchka ti' ne' nu ndi'in ni' ña'an kan' kunan la ne' cha' 'in Ndiose, kan' ku'ni Ndiose cha' tiin ti tyi'in ne' kan' bra kan'; si kwiñi lyo'o ti ne' 'wan cha' nchka ti' ne' kunan ne', ja jñan wan xu'we 'in Ndiose cha' 'in ne' kan'. Ja chkwi' 'a wan cha' 'in Ndiose lo'o ne' kan' bra kan'.

14 Bra nu ja nchka ti' nten cha' kanun wan se'en ndi'in ne', nu ja xlyaa ne' kunan ne' cha' nu ndu'u wan 'in ne', kulaa ya' wan 'in ne' kan', xnun wan 'in kichen kan' bra kan'; kwi' ngwaña'an, skwin wan kiya' wan cha' tyo'o yuu nu nsu'wi snan wan bra nu tyo'o wan kichen kan'.

15 Chañi cha' nchkwiiñ' lo'o wan, cha' xa nu tiya tsan nu ku'ni biya' Ndiose 'in nchga nten, bra kan' lye 'a ta Ndiose nu ti'í 'in ne' kichen se'en ja xlyaa ne' kunan ne' cha' nu kwa'u wan 'in ne'. Tsan kan' ka su'we la cha' 'in ne' xa'an nu mdi'in kichen Sodoma, nu mdi'in kichen Gomorra nu ngwa s'ni.

Ku'ni liye' ti' ne' 'wan

16 'Kunan su'we wan cha' nchkwiiñ': Su'wañ 'wan cha' tsaa wan xka kichen ña'an ti' si lka wan slya' nu nda'an laja nguo'o tlá; kan' cha', cha' tiya ti' tyi'in wan laja nten, sa ña'an nda'an kunan nu tiya 'a ti'. Su'we ti tyi'in wan, ja ku'ni tlá wan 'in nten siya' ti. Ka wan ña'an ti' kiñi cha kuun, cha' msu 'a i', ja tlá i' siya' ti.

17 Ndií ti ti' wan tyi'in wan laja nten; ja chan tsaa lo'o ne' 'wan se'en ndukwa ne' wsiya, ni siya ja y'ni tlá wan 'in nten. Kwi' jwi'in ne' 'wan ni' lyaa 'in ne'.

18 Ndiya nten nu tsaa lo'o 'wan se'en ndi'in ne' nu lka ndloo la cha' tí' ti ti' ne' 'wan, lo'o tsaa lo'o ne' 'wan tloo ykwi' ree. Xa nu ta ne' nu tí' 'wan chun' ndyaa ña'an ti' wan 'ñaän, kaja chin' bra 'wan cha' chkwi' wan chin' cha' 'ñaän lo'o ne' kan', lo'o ne' xka la'a tsu' bra kan'.

19 Xa nu tsaa lo'o ne' 'wan se'en ndukwa ne' wsiya, ja tya'an cha' tiye wan sa ña'an cha' nu chkwi' wan lo'o ne' kan', sa ña'an ka xkwen wan 'in ne' kan'. Ku'ni Ndiose cha' ki'ya cha' tiya ke wan cha' chkwi' wan lo'o ne' kan',

20 cha' si'i cha' 'wan ti nu chkwi' wan bra kan'; cha' 'in Tyi'i Ndiose nu lka Stian, kan' ka cha' nu chkwi' wan lo'o ne' kan'.

21 'Ndií ti ti' wan tyi'in wan lo chalyuu sikwa, cha' lo'o ta'a ngula wan tsaa lo'o 'wan cha' kwiñi ti xtya ki'ya 'wan tloo nten kuxi kan'. Lo'o sti wan kujwi' xu'wa 'wan. Lo'o ti kwi' sñi' wan, kujwi' xu'wa 'wan tloo nten kuxi kan'; kujwi' ne' 'wan, nka tiye ne' kune' kan'.

22 Kwi' ngwaña'an ku'ni liye' ti' nchga nten 'wan chun' ndyaa ña'an ti' wan 'ñaän. Nten nu talo cha' tyijin nchga cha' kuxi kan', su'we ti tyo'o ne' kan', kaja chalyuu kwi nu ja tsaa tii 'a 'in ne' kan' bra kan'.

23 Su'we la xnan wan xka kichen xa nu lye 'a ngi'ni liye' ti' ne' 'wan. Chañi cha' nchkwiñ' lo'o wan ni: Ja ya chkwi' wan cha' 'ñaän lo'o ne' Israel nchga kichen tyi ne' bra nu kaän lo chalyuu xiya', na' nu wa msu'wa Ndiose 'ñaän ndijyaän cha' kaän

nten.

²⁴ 'Nten nu lka mstru 'in ne', kan' lka nu jlyo la ti'; ja jlyo ti' ne' kune' nu tka ngi'ni xa'an ti nchga cha'. Kwi' ngwaña'an nten nu lka x'nan msu, kan' lka ndloo la 'in ne'; si'i msu nu lka ndloo la.

²⁵ Ska ti biya' tyijin ne' kune' kan' nu ti'í bra kan', sa ña'an nu nchka 'in mstru 'in ne'; ska ti biya' ka tñan tukwi 'in msu kan' bra kan', sa ña'an nu nchka 'in x'nan ne'. Wa ykwi' ne' cha' lkaän Beelzebú, kwi' nu lka x'nan kune' xa'an, kan' cha' ka biya' ti' wan cha' ti'í 'a chkwi' ne' 'wan nu ndi'in cha' 'wan lo'oün, cha' na' lkaän X'nan wan.

Ni ña'an nu lka nu chañi ka xitsen 'wan

²⁶ 'Kan' cha' ykwiin' cha' ja kutsen wan 'in nten chalyuu ti. Nchga cha' nu ngi'ni ne' mnan ti, tyija lyo cha' kan' 'in nten nde loo la; nchga cha' 'in ne' nu nsu'wi kutsi' ti 'in nten, ka biya' ti' nten cha' kan' nde loo la.

²⁷ Nchga cha' nu nchkwii'n' lo'o wan se'en ndi'in wan ska ti wan, chkwi' wan cha' kan' lo'o nchga nten nde loo la; kwi' ngwaña'an, skaa cha' nu ndu'uün 'wan mnan ti, kwen chkwi' wan cha' kan' lo'o nchga ne' kichen.

²⁸ Ja kutsen wan 'in ne' nu kujwi 'wan lo chalyuu re, cha' ja nchka 'in ne' kujwi ne' 'in kasiya 'wan; su'we la kutsen wan 'in Ndiose nu ku'ni biya' 'wan nde loo la. Chañi cha' kutsen wan 'in Ndiose, kwi' nu ku'ni cha' tyii cha' 'wan si tsa'a wan nde jwlyaa.

²⁹ 'Wa jlyo ti' wan cha' x'nan 'a nga'an kiñi xuwe nu ndujwi' nten, tukwa kiñi xuwe kaja 'wan ska ti tñi. Ti kwi' Stiin nu lka ndloo la ti, nchga cha' jlyo ti' Ni; ni siya ska ti kiñi xuwe kaja i', wa jlyo ti' Ni cha' kan'.

30 Kwi' ngwaña'an, wa nkwa Ndiose nchga kichan' ke wan, jlyo ti' Ni ni nkwa kichan' ndukwa ke skaa wan.

31 Lo'o 'wan ni, ka'an la nsu'wi lyo wan nde se'en ndi'in Ndiose; ni siya ka'an 'a kiñi xuwe, ja su'wa nsu'wi lyo i' lo'o wan. Kan' cha' ja ndi'in cha' kutsen wan 'in nten.

Cha' 'in nten nu ndi'in cha' 'in lo'o Jesucristo

32 'Lo'o xka cha' ni: Nchga nten nu ndi'in cha' 'in lo'o'ñn, nu nchkwi' cha' 'ñaän lo'o nten, na' chkwiiñ' lo'o Stiin Ndiose nu ndi'in nde ni' kwan cha' ta'a su'we nsu'wiin lka nten kan'.

33 Lo'o nchga nten nu nchkwi' lo'o ta'a nten cha' ja ndi'in cha' 'in lo'o'ñn, na' chkwiiñ' lo'o Stiin nu ndi'in nde ni' kwan cha' si'i ta'a su'we nsu'wiin lka nten kan'.

Ja su'wa cha' 'in nten chalyuu chun' mdiyan Jesús

34 'Ja xke' ti' wan cha' tiin ti tyi'in nten chalyuu cha' 'ñaän, cha' wa ndijyaän. Ja ka ngwaña'an. Lye la xuun ta'a ne' cha' 'ñaän;

35 xuun ska nten lo'o sti yu cha' 'ñaän, xuun ska nu kuna'an lo'o jya'an cha' 'ñaän, xuun sñi' xiin ne' lo'o jya'an laa ne' cha' 'ñaän.

36 Xuun ta'a ne' ngwaña'an sa ña'an bra ka kontra 'in ne' nchga ta'a ndi'in ne'.

37 'Su'we 'a cha' chka t'nan ti' nten 'in sti ne', 'in jya'an ne'; lo'o si chin' la nka tiye ne' kan' lo'o'ñn, ja ka tya'an ne' kan' lo'o'ñn bra kan'. Kwi' ngwaña'an, su'we cha' chka t'nan ti' nten 'in sñi' ne', ni siya ki'yu, ni siya kuna'an; lo'o si chin' la nka tiye ne' kan' lo'o'ñn, ja ka tya'an ne' kan' lo'o'ñn bra kan'.

38 Ja ka chkwii' nten cha' na' lkaän X'nan ne', bra nu ja nchka ti' ne' kan' tya'an ne' lo'o'ñn tuwiin nu

kwa'uŭn 'in ne' cha' tsaa ne'. Ndi'in cha' xñi ne' tuwiin kan', ni siya kujwi xka la nten 'in ne' kan' chun' msñi ne' cha' 'ñãän.

³⁹ Ja kaja chalyuu kwi nu ja tsaa tii 'a 'in ne' nu lye la nka tiye ne' 'in ne' ti ykwi' ti ne', kwi' nu ja nda 'a bra cha' kujwi nten 'in ne' cha' 'ñãän. Lo'o kaja chalyuu nu ja tsaa tii 'a 'in ne' si kujwi nten 'in ne' chun' msñi ne' cha' 'ñãän.

Cha' su'we nu kaja 'in ne' nde loo la

⁴⁰ 'Xka cha' ni: Xa nu ta nten se'en tyi'in wan na'an tyi ne', su'wa lka cha' kan' sa ñã'an si wa nda ne' se'en tyi'iin na'an tyi ne'. Kwi' ngwaña'an, xa nu ta ne' se'en tyi'iin lo'o ne', su'wa lka cha' kan' sa ñã'an si wa nda ne' se'en tyi'in Ndiose lo'o ne', cha' ti kwi' Ndiose lka nu wa msu'wa 'ñãän ndijyaän nde re.

⁴¹ Lo'o xa nu ta ne' se'en tyi'in ska nten nu nchkwi' cha' 'in Ndiose lo'o ne', cha' ndya'an nten kan' lo tñan 'in Ndiose, su'we 'a ka 'in ne' nde loo la. Kan' kaja ska cha' su'we nu ta Ndiose 'in ne' kan'; su'wa ti ka 'in ne' kan' lo'o nten nu nchkwi' cha' 'in Ndiose bra kan'. Kwi' ngwaña'an, bra nu ta ne' se'en tyi'in ska nten nu su'we 'a tiye chun' ndukwa yu cha' nchkwi' Ndiose, su'wa ka 'in ne' kan' lo'o nten nu su'we 'a tiye kan', cha' ta Ndiose ska cha' su'we 'in ne' kan' nde se'en ndi'in Ni.

⁴² Kwi' ngwaña'an, bra nu ta ne' ska ska' tyi'a ko'o ne' kune' re chun' ngi'ni xa'an ne' cha' 'ñãän, chañi cha' ta Ndiose ska cha' su'we 'in ne' kan' nde loo la.

11

Msu'wa Xuwa 'in nten nu ndyaa se'en ndi'in Jesús

¹ Bra nu mdyii ngwa'u Jesús cha' kan' 'in tii tyukwa nten nu ngi'ni xa'an cha' 'in yu, kan' mdo'o yu ndyaa yu cha' chkwi' yu lo'o ne' tyun kichen nu ndi'in kwi' se'en ti; ngwa'u yu 'in ne' kichen kan' bra kan'.

² Ti nsu'wi Xuwa kan' ni' ña'an chkwan, wa ynan yu cha' 'in nchga tñan nu ngi'ni Jesús nu nka Krixtu; kan' cha' ngulo Xuwa tñan 'in ne' nu ngi'ni xa'an cha' 'in yu, cha' tsa'a ne' kan' se'en ndi'in Jesús,

³ cha' kunicha' ne' kan' cha' re 'in Jesús cha' 'in Xuwa:

—¿Ta chañi cha' nu'win lkaa ti kwi' nu wa kan ti a? —ndukwin ne' kan' 'in Jesús bra kan'—. ¿Ta kan la xka nu ka Krixtu ykwi' a?

⁴ Mxkwen Jesús 'in ne' kan' bra kan':

—Yaa wan katsa' wan 'in Xuwa nchga loo cha' nu ynan wan se'en ndi'iin, nchga cha' nu na'an wan se'en ndi'iin —ndukwin Jesús 'in ne'—.

⁵ Katsa' wan 'in yu sa ña'an ngi'niin cha' nchkaa kiloo nten nu ngwa kwityiin', cha' nda'an nten nu ngwa ti'í kiya', cha' ngwa luwi kuna' nten nu mtsu' kuna', cha' nu nnan nten nu ngwa ku'un tu nskan, cha' ndyu'u nten xiya' bra nu wa ngujwi ne', cha' nchka biya' ti' nu ti'i sa ña'an nu kulaa Ndiöse 'in nten chalyuu 'in cha' kuxi nu ndi'in 'in ne'.

⁶ Su'we 'a ka tiye nten nu ti ndyaa ña'an ti' 'ñañ, kwi' nu ja kulaa ya' 'ñañ chun' nchka jyu'u ti'.

⁷ Bra wa ndyaa ne' kan', mdyisnan Jesús ykwi' yu cha' 'in Xuwa kan' lo'o nten ka'an nu ndi'in lo'o yu nde kwa:

—Bra nu yaa wan ni' kixin' se'en mdi'in Xuwa, ¿ni sa ña'an lka yu, mske' ti' wan, xa wa na'an wan

'in yu nde kwa a? —ndukwin Jesús 'in ne' bra kan'—. ¿Ta mske' ti' wan cha' ngwa yu ña'an ti' ska yka kii nu mxkii tuun kwi'in 'in a? ¿Ta ngwaña'an mske' ti' wan a?

⁸ ¿Ni cha' lka yaa na'an wan 'in yu nde kwa sikwa? ¿Ta mske' ti' wan cha' ngwa yu ña'an ti' ska yu ki'yu nu siye' 'a a? ¿Ta kan' cha' yaa na'an wan 'in yu a? Nten nu su'we ña'an ste', kan' ndi'in se'en ndi'in ne' kuliya' nu lka ree.

⁹ Ja chan nxke' ti' wan cha' lka Xuwa ska nten nu nchkwi' cha' 'in Ndiose lo'o nten. Chañi cha' ngwaña'an lka yu, lo'o ti tlyu la tñan mjwi 'in Xuwa.

¹⁰ Nde ndiya cha' nu ngwa'an ayman kula s'ni cha' 'in tñan nu ku'ni Xuwa:

Kuloñ tñan 'in ska msu 'ñaän cha' tsaa yu nde loo la 'iin, cha' slaa yu tuwiin se'en tsaa, ndukwin Ndiose 'in Krixtu.

¹¹ Chañi cha' nchkwiin' lo'o wan cha' 'in Xuwa nu ndukwatya 'in nten: Ja ya kala ska nten chalyuu nu ku'ni tñan nu tnun la, sa ña'an lka tñan nu mjwi 'in Xuwa kan'. Na' wa ndijyaän cha' kaän ndloo la ni' kasiya 'in nten; lo'o ni, nchga nten nu sten cha' 'ñaän, tlyu la cha' nsu'wi 'in ne' kan' ke Xuwa, ni siya ti'i ne', ni siya kune' ne'.

¹² 'Ti bra nu yan Xuwa kan' ti kulo, lo'o bra ni, ka'an 'a cha' nchkwi' nten, cha' nsu'wi 'a nten nu nchka ti' cha' ka Ndiose ndloo 'in ne'. Kwi' ngwaña'an, nsu'wi 'a nten nu lye 'a ngi'ni jwersa cha' kala ne' se'en ndi'in Ndiose, ykwi' ti ne'.

¹³ Nchga cha' nu ngwa'an ayman Moisés lo kityi, sa ña'an lka tñan nu ngulo Ndiose 'in nten, kwi' nchga cha' 'in Ndiose nu ykwi' ayman kula 'ñaan lo'o nten s'ni, su'wa ykwi' ayman kan' sa ña'an ka

cha' bra nu tyisnan ka Ndiose ndloo ni' kasiya 'in nten. Lo'o ni, wa mdiyan Xuwa.

¹⁴ Ti kwi' yu kan' lka ña'an ti' Elías nu ngwa s'ni, nu ykwi' cha' 'in Ndiose lo'o nten. Wa s'ni ndukwa cha' tyaan Elías kan' xiya', si xlyaa wan xñi wan cha' kan'.

¹⁵ Kunan su'we wan cha' nu nchkwii'n re lo'o wan.

¹⁶ 'Ja su'we siya' ti sa ña'an ngi'ni nten chalyuu bra nu ni. Ngi'ni ne' sa ña'an ngi'ni nu xuwe nu nda'an ndi'in jya ti jlu'we kichen, nu ndaja ti' 'in ta'a ndi'in jya ne', chun' ja nchka 'a ti' ne' tyi'in jya ne' lo'o ta'a ne'. Kan' cha' nxi'ya ne' 'in ta'a ne':

¹⁷ “¿Ni cha' ja xlyaa wan kula kiya' wan? Nan ngala ba jiin lo'o kuwi kii cha' 'wan” ndukwin nu xuwe 'in ta'a ndi'in jya. “¿Ni cha' ja xlyaa wan ka xi'in ti' wan lo'o ba? Nan ngala ba jiin xi'in, nan nganan ba ndi'in ba.” Ti kwi' ngwaña'an ngi'ni wan lo chalyuu re ni, chun' xkwi' ndaja ti' wan; ja su'we lka tiye wan siya' ti ña'an wan 'in ta'a nten wan.

¹⁸ Bra nu yan Xuwa kan' ni, ja yku yu lo'o wan, ja yi'o yu xalyu lo'o wan. Kan' nchkwii' wan cha' 'in yu: “Nsu'wi kwi'in xa'an 'in yu, kan' cha' ngi'ni yu ngwaña'an” ndukwin wan bra kan'.

¹⁹ Chun' ndi'in la mdiyaän nu wa msu'wa Ndiose 'ñaän cha' kaän nten. Nchkuün nchga lo nan lo'o wan, ndi'yoün nchga lo nan lo'o wan, lo'o nchkwii' wan cha' 'ñaän: “jÑa'an wan sa ña'an ngi'ni yu kwa! Nchku 'a yu kwa, lo'o ku'wi 'a yu” ndukwin wan 'in ta'a wan. “Ja su'we yu kwa cha' ta'a su'we yu lo'o ne' nu ndlo ka'an tñi cha' 'in ne' xka la'a tsu'. Lo'o xka la nten kuxi lka ta'a su'we nsu'wi yu” ndukwin wan 'ñaän. Kwi' nchkwii' wan cha'

ja su'we cha' nu nchkwiin', nxke' ti' wan. Su'we sikwa, ka biya' ti' wan nde loo la cha' nu ñi 'a nchkwi' nten cha' nda'aän chabiya' 'in Ndiose.

Kichen se'en ja nnan ne' cha' 'in Ndiose

²⁰ Lye 'a ykwi' Jesús cha' 'in ne' kichen se'en ta'a ti nda'an yu, cha' ka'an 'a cha' tnun wa y'ni yu se'en ndi'in ne' kichen kan', lo'o ja mjuu'u ti' ne' 'in cha' kuxi nu ndi'in ni' kasiya 'in ne'; ja ngulaa ya' ne' cha' kuxi kan'.

²¹ —;T'nan 'a wan ne' kichen Corazín! —ndukwin Jesús—. ;T'nan 'a wan ne' kichen Betsaida! —ndukwin—. Ka'an 'a cha' tnun wa na'an wan, lo'o ja mjuu'u ti' wan siya' ti 'in cha' kuxi nu ngi'ni wan, ja ngulaa ya' wan cha' kan'. Kwi' ngwaña'an ti s'ni, xa'an 'a ne' kichen Tiro lo'o ne' kichen Sidón, ne' xka la'a tsu' ngwa ne' kan'. Lo'o ja mjwi ña'an ka jyu'u ti' ne' kan' 'in cha' kuxi nu wa y'ni ne'. Ja ngulaa ya' ne' cha' kuxi kan', chun' ja ya ña'an ne' kan' cha' tnun sa ña'an nu na'an wan, 'wan ne' Israel; kan' cha' ja ngwa xi'in ti' ne' kan', kan' cha' ja yku' ne' te' ngata, ja msu'wa ne' jii ke ne' sa ña'an nu ngi'ni nten se'en nskwa ayman.

²² Ñi katsaän' 'wan, cha' ka su'we la cha' 'in ayman ne' Tiro lo'o ayman ne' Sidón, lo'o lye la kaja nu ti'í 'wan bra nu tiya tsan tnun cha' ku'ni biya' Ndiose 'in nten chalyuu bra kan'.

²³ Lo'o 'wan, ne' Capernaum ni, ¿ta su'we la kichen tyi wan, nxke' ti' wan a? ¿Ta lka kichen tyi wan ndloo la 'in xka la kichen, nxke' ti' wan a? Nde loo la ñu'un siya' ti kichen tyi wan, lo'o ykwi' wan tyaa wan nde lo'jwlyaa bra kan'. Ka'an 'a cha' tnun y'niin se'en ndi'in wan, lo'o ja yaa ña'an ti' wan 'ñaän siya' ti. Kwi' ngwaña'an nu ngwa s'ni, xa'an

'a ngwa ne' kichen Sodoma; lo'o ja na'an ayman kan' cha' tnun sa ña'an nu wa na'an wan, 'wan ne' Capernaum. Si wa na'an ne' cha' kan', ja chan wa mju'u ti' ne' 'in cha' kuxi nu wa y'ni ne' bra kan', wa ngulaa ya' ne' cha' kuxi kan'; ja chan ti ndukwa kichen tyi ne' kan' sa bra ni.

²⁴ Ñi katsaän' 'wan, cha' ka su'we la cha' 'in ayman ne' Sodoma kan', lo'o lye la kaja nu ti'í 'wan tsan tlyu nu ku'ni biya' Ndiose 'in nten chalyuu.

Tiin ti tyi'in nten cha' mdiyan Jesús

²⁵ Chun' ndi'in la ykwi' Jesús lo'o Ndiose Sti yu:

—Ku'ni tnuñ 'iin, Stiin; nu'win lkaa X'nan ba, lo'o nde ni' kwan, lo'o lo chalyuu —ndukwin Jesús 'in Ndiose—. Ngwa xu'we 'iin cha' wa y'nii cha' ngwa biya' ti' nten nu ja jlyo su'we ti' nu ngwa s'ni la. Xka ta nten nu tiya la ti', lo'o nten nu nchka 'a 'in, lo'o nten nu jlyo 'a ti' nchga cha' 'iin, nxke' ti' ne', lo'o ne' kan' ja nchka biya' la ti' ne' kan'.

²⁶ Chañi cha' ngwaña'an nchka ti' nu'win, cha' ka biya' ti' nten nu ja jlyo ti' siya' ti.

²⁷ Ti ngwa'u la Jesús 'in ne' bra kan':

—Nchga chabiya' 'in Stiin Ndiose nganun 'ñaän. Ja tukwin jlyo ti' sa ña'an lka cha' nu nsu'wi ni' kasiya 'ñaän, cha' na' lkaän ska ti nu lka Sñi' Ndiose; ska ti Stiin Ndiose jlyo ti' Ni sa ña'an lka cha' nu nsu'wi ni' kasiya 'ñaän. Kwi' ngwaña'an, ja tukwin jlyo ti' sa ña'an cha' nu nsu'wi ni' kasiya 'in Stiin; skaän tiän nu lkaän Sñi' Ni jlyo tiän', lo'o kwa'uñ cha' kan' 'in nten nu kuloñ suwiñ 'in cha' ku'ni xa'an ne' cha' 'ñaän.

²⁸ Nchga wan nu ja talo wan cha' ti'in 'a tñan nsu'wi 'wan lo chalyuu, nxke' ti' wan, kan wan

tyi'in cha' 'wan lo'oŭn ni. Taǎn chabiya' cha' tiin ti tyi'in wan bra kan'.

²⁹ Xñi wan tñan nu taǎn 'wan, kwi' ku'ni xa'an wan nchga cha' 'ñǎǎn bra kan'. Chka t'nān 'a tiǎn' 'wan, taloŭn 'aǎn 'wan; lo'o tiin ti tyi'in wan cha' wa y'ni tyiŭn nchga cha' kuxi nu nsu'wi ni' kasiya 'wan.

³⁰ Cha' su'we lka cha' nu ku'ni xa'an wan 'ñǎǎn; ja tukwi cha' kan', sa ti tñan nu taǎn 'wan.

12

Mstun ta'a nda'an Jesús juun trigu tsan nu nx-itñā' ne' judío

¹ Wa ndiya tsan ta'a nu nxitñā' ne' judío, lo'o ndyaa Jesús se'en ndiya jyan trigu 'in ne' lo'o ne' nu ngi'ni xa'an cha' 'in yu. Ngite' ti' ne' nu ngi'ni xa'an cha' 'in yu bra kan', kan' cha' mstun ne' chin' juun trigu cha' ku ne' mta 'in ran ña'an ya'a ti.

² Na'an ne' fariseo cha' ngi'ni ne' ngwañā'an, ykwi' ne' fariseo kan' lo'o Jesús bra kan':

—¿Ja jlyo ti' wan cha' ja ndiya chabiya' ku'nian tñan ni, cha' tsan nu nxitñāan' lka a? —ndukwin ne' fariseo 'in Jesús—. Ne' kwa nu ngi'ni xa'an cha' 'iin ni, ¿ni cha' lka ngi'ni ne' tñan kan' ni sikwa?

³ Mxkwen Jesús 'in ne' fariseo bra kan':

—¿Ja ya chkwi' wan lo kityi 'in Ndiose se'en nu ndukwa cha' sa ña'an nu y'ni ayman David s'ni a? —ndukwin Jesús 'in ne'—. Ngwa ska tsan ngite' 'a ti' yu, lo'o ngite' 'a ti' nchga ta'a nda'an yu bra kan'.

⁴ Jlyo ti' yu cha' nskwa jaxlya nu lka lomstan 'in Ndiose lo msaa ni' ña'an nu lka kwenta 'in Ndiose nde kwa. Kan' cha' ndyaa ne' ni' ña'an kan', yku ne' jaxlya kan', ni siya ja ndiya chabiya' ku ya

ñá'an ti nten 'in ran; ska ti nten nu nka sti jo'o ndiya chabiya' ku ne' jaxlya kan'.

⁵ Lo'o ndiya xka cha' nu ngwa'an ayman Moisés lo kityi, cha' sti jo'o ni, ja nxitña' ne' ni' lyaa tnun xa nu ndiya tsan nu nxitña' nten; nsu'wi tñan nu ngi'ni sti jo'o kan'. Ti kwi' ti cha', ja ndi'in ki'ya 'in ne' kan' cha' 'in Ndiose, cha' ngi'ni ne' tñan kan'—ndukwin Jesús 'in ne' fariseo kan'—.

⁶ Chañi cha' na' nu ndijyaän re, tnun la ti cha' 'ñaän ke laa tnun kan'.

⁷ Ja nduwe ti' wan sa ñá'an lka cha' re nu ndukwa lo kityi kula: “Nchka tiän' cha' chka t'nan ti' wan 'in ta'a nten wan” ndukwin Ndiose, “kan' tñan nu ndloo la cha' ku'ni wan. Ja nchka tiän' cha' ta wan ka'an 'a lomstan 'ñaän; ni siya skun' wan, ja ndi'in cha' ta wan 'ñaän.” Si chañi cha' ngwa biya' ti' wan sa ñá'an nchkwi' cha' kan' nu ndukwa lo kityi, ja xtya 'a wan ki'ya 'in nten cha' kwiñi ti bra kan'.

⁸ Lo'o ndiya xka cha' nu chkwiin' lo'o wan, cha' na' nu wa msu'wa Ndiose 'ñaän ndijyaän cha' kaän nten, na' lkaän ndloo la, ni siya tsan nu nxitña' ne'.

Cha' 'in ska yu ti'í nu nchkun' tyukwin ya' yu

⁹ Chun' ndi'in la mdo'o Jesús, ndyaa yu xka kichen, yten yu ni' lyaa 'in ne' judío nde kwa bra kan'.

¹⁰ Na'an yu cha' ndi'in ska yu ki'yu nu ti'í ya', cha' wa nchkun' tyukwin ska la'a ya' yu. Lo'o mnicha' ne' judío kan' 'in Jesús bra kan':

—¿Ta ndiya chabiya' 'ñaan cha' ku'nian jo'ó 'in nu ti'í tsan ta'a a?, xa nu ndi'in cha' xitñaan'—ndukwin ne' 'in Jesús.

Nchka 'a ti' ne' kan' xtya ne' ki'ya 'in Jesús.

11 Kan' mxkwen yu 'in ne':

—¿Ta ja tlyo wan 'in ska slya' 'wan xa wa mdiyuu i' ska ni' tiyuu a? —ndukwin Jesús 'in ne'—. Ja chan tlyo wan 'in i', ni siya tsan ta'a lka bra kan'.

12 Lo'o ta'a nten wan ni, ndloo la cha' 'in ne' ke 'in ska slya', kan' cha' ndiya chabiya' 'ñaän tayaän' 'in nten, ni siya tsan nu kti 'a 'ñaan, nu ja ndiya chabiya' cha' ku'nian xka lo tñan.

13 Ykwi' Jesús lo'o yu ti'í kan':

—Xñii yaa' —ndukwin Jesús 'in yu kan'.

Mxñi yu ti'í kan' ya' yu bra kan'. Bra ti nchkaa ya' yu, su'wa ngwa ta'a tyukwaa la'a ya' yu kan'.

14 Msin' 'a ti' ne' fariseo kan' 'in Jesús bra kan'. Mdo'o ne', ndyaa ne', ngwa ti' ne' kaja ña'an kujwi ne' 'in Jesús bra kan'.

Sa ña'an ndukwa cha' 'in Jesús lo kityi kula

15 Lo'o Jesús ni, ngwa biya' ti' yu nchga cha' kuxi nu nda'an cha' tiye ne' fariseo, kan' cha' mdo'o yu ndyaa yu xka se'en. Ka'an 'a nten mdo'o ña'an 'in yu, lo'o y'ni yu cha' nchkaa nchga nu ti'í.

16 Kan' ngulo yu tñan 'in ne' nu ngwa ti'í kan', cha' ja katsa' ne' ti lka nu y'ni cha' nchkaa ne'.

17 Ti s'ni ytsa' Ndiose ska cha' 'in ayman Isaías cha' 'in Krixtu. Nde ndukwa cha' kan' lo kityi:

18 Nde ndiya msu 'ñaän nu wa ngulo suwiin 'in, ndukwin Ndiose.

Ndiya 'a tiän' 'in yu, lo'o su'we 'a nka tiyeen ña'aän 'in yu kan'.

Ku'niin cha' ki'ya Tyi'iin ykwiin' chun' yu, cha' chkwi' yu lo'o nchga nten, lo'o nten nu ja lka judío.

Kwa'u yu 'in ne' sa ña'an nu ñi 'a ngi'niin biyaän'
'in nten chalyuu, ndukwin Ni.

¹⁹ Ja xuun ta'a yu, lo'o ja xi'ya yu kwen;
ja kanen tyi'i yu laja tuwiin.

²⁰ Su'wa ya' yu 'in nten cha' sten la ne' cha' 'ñaän, ni
siya lka ne' ña'an ti' ska yka kii nu wa katsa
ti, cha' na'an 'a ti' ne' kan';
ni siya lka ne' ña'an ti' ska kii' nu wa tyuwi' ti,
nxke' ti' ne', cha' wa tyii ti cha' su'we nu
nsu'wi tiye ne' kan'.

Ngwaña'an tyijin lyo cha' nu ñi kan' 'in cha' kuxi.

²¹ Ndi'in ta nten ña'aan chalyuu cha' wa kan ti yu
kan'.

Ngwaña'an ndukwa cha' 'in Krixtu lo kityi kula
kan'.

Mstya ne' ki'ya 'in Jesús

²² Chun' ndi'in la mdiyan ne' lo'o ska yu ti'í se'en
ndi'in Jesús; wa nsu'wi kwi'in xa'an 'in yu, kan'
cha' ja nchka 'a chkwi' yu, lo'o kwityiin' yu. Bra
ti y'ni Jesús jo'ó 'in yu ti'í kan', cha' xiya' nchkwi'
yu, xiya' mda Jesús xaa kiloo yu.

²³ Nduwe 'a ti' nchga nten nu na'an cha' kan' bra
kan'.

—¿Ta ti kwi' yu ta'a ayman David kan' lka yu
ki'yu re a? —ndukwin ne' 'in ta'a ne'.

²⁴ Bra wa ynan ne' fariseo cha' kan', xka cha'
ykwi' ne' cha' 'in Jesús:

—Ska ti chabiya' 'in Beelzebú nu nka x'nan
nchga lo kwi'in kuxi, kan' lka cha' nu nchka 'in
yu ki'yu re kulo yu kwi'in kuxi nu nsu'wi 'in nten
—ndukwin ne' fariseo kan'.

²⁵ Mgii ti' Jesús sa ña'an cha' kuxi nda'an cha'
tiye ne', kan' cha' ykwi' yu lo'o ne' kan' bra kan':

—Si xuun 'a ne' nu lka ndloo la ska nasiyun, su'we ta'a nten nasiyun kan', tyii cha' 'in ne' kan' wa ña'an ti bra kan' —ndukwin Jesús 'in ne'—. Kwi' ngwaña'an, si lye 'a xuun ta'a ne' ska kichen, tyii cha' 'in ne' kan' wa ña'an ti; ni siya xuun ta'a ne' nu ndi'in ska na'an ti, ti kwi' ti cha' ka, tyii cha' 'in ne' kan' lo'o ta'a ne', tyaa ne' bra kan'.

²⁶ Kwi' ngwaña'an, ja talo Satanás si xuun lo'o msu 'in; tyii cha' 'in kune' xa'an kan' ndla ti bra kan'.

²⁷ ¿Ta chañi nchkwi' wan sikwa, xa nu nchkwi' wan cha' chabiya' 'in Beelzebú ndloŷn 'in kwi'in kuxi a? Ja ñi nchkwi' wan siya' ti, cha' lo'o ne' nu ngi'ni xa'an cha' 'wan, ndlo ne' 'in kwi'in kuxi chabiya' 'in Ndiose, ndukwin ne'. Chun' nu ngi'ni ne' kan' ngwaña'an ka biya' ti' wan sikwa, si chañi cha' nchkwi' wan, si cha' kwiñi ti nchkwi' wan.

²⁸ Chabiya' 'in Tyi'i Ndiose ndloŷn 'in kwi'in kuxi, kan' cha' ka ka biya' ti' wan cha' wa mdyis-nan cha' lka Ndiose ndloo ni' kasiya 'in nten.

²⁹ 'Ska yu tlá ni, ja kaja ña'an sten xka nten na'an tyi yu cha' ku'ni kunan yu'wa 'in yu; siya' ti si skan' ne' 'in yu tlá nu lka x'nan na'an kan' kulo ndukwa, kan' ka ku'ni ne' kunan nan nu nsu'wi 'in yu kan' bra kan'.

³⁰ 'Nten nu ja xlyaa xñi cha' 'ñaän, nan nsuun ne' kan' lo'oŷn, ngwaña'an lka cha' kan'. Kwi' ngwaña'an nten nu ja ndaya' 'ñaän, ja nda ne' chabiya' 'in ta'a nten ne' cha' sten ne' tuwiin 'ñaän sikwa.

³¹ 'Kan' cha' katsaän' 'wan ni, cha' ka ku'ni Ndiose cha' tlyu ti' 'in nten nchga ki'ya nu ndukwi ne', ni siya kuxi 'a nchkwi' ne' 'in Ndiose; siya' ti

bra nu nchkwi' ne' cha' kuxi 'in tñan nu ngi'ni Tyi'i Ndiose, kan' ja ku'ni 'a Ndiose cha' tlyu ti' 'in ne' kan' bra kan'.

³² Ku'ni Ndiose cha' tlyu ti' 'in nten nu nchkwi' cha' kuxi 'ñañ nu wa msu'wa Ndiose 'ñañ ndi-jyañ cha' kañ nten; siya' ti bra nu chkwi' ne' cha' kuxi 'in tñan nu ngi'ni Tyi'i Ndiose, kan' ja ku'ni Ndiose cha' tlyu ti' 'in ne' kan' nchga tsan nu tyi'in ne' lo chalyuu, nchga bra nde loo la bra kan'.

Nsu'wi lyoan ska yka bra nu ña'aan nan nu ndyo'o lo ran

³³ 'Ska yka su'we ni, ta ran nan kuan bra kan'; yka nu ja su'we ni, ja ta ran nan kuan bra kan'. Jlyo tian' si su'we yka bra nu ña'aan nan nu ndo'o lo ran.

³⁴ Nu 'wan, ;ña'an ti' kunan tlá, ngwaña'an lka wan! Ja nchka chkwi' wan cha' su'we cha' nsu'wi 'a cha' kuxi tiye wan; sa ña'an cha' nu nsu'wi tiye skaan, ngwaña'an ndyo'o cha' nu nchkwian'.

³⁵ Nchga nten nu su'we tiye ni, su'we 'a nchkwi' ne' kan'; lo'o nchga nten nu kuxi ka tiye, kuxi ti nchkwi' ne' kan' bra kan'.

³⁶ Katsaän' ska cha' 'wan ni: Bra nu tiya tsan nu ku'ni biya' Ndiose 'in nchga nten, bra kan' ndi'in cha' katsa' ji ne' ti ykwi' ti ne' nchga cha' kuxi nu wa ykwi' ne' lo chalyuu.

³⁷ Ndi'ya Ndiose kwenta 'in nchga cha' nu wa ykwi' wan lo chalyuu; katsa' Ni 'wan si ndi'in ki'ya 'wan lo'o Ni, kwi' katsa' Ni 'wan si ja ndi'in ki'ya 'wan.

Ngwa ti' nten kuxi ña'an kwi'ya ska cha' tnun nu ku'ni Jesús

³⁸ Chun' ndi'in la ndi'in chin' mstru nu ndu'u cha' jo'o, ndi'in ne' fariseo, nchkwi' ne' lo'o Jesús:

—Mstru —ndukwin ne' kan' 'in Jesús bra kan'—, ku'nii ska cha' tnun cha' ña'an kwi'ya ba 'in ran.

³⁹ Mxkwen Jesús 'in ne' bra kan':

—Xa'an 'a ta'a wan, cha' xkwi' njñan wan 'ñaän cha' ku'niin ska cha' tnun cha' ña'an kwi'ya wan 'in ran; lka wan nten nu ja ndyaa ña'an ti' 'in Ndiose siya' ti —ndukwin Jesús 'in ne'—. Ja ska cha' tnun ku'niin ngwaña'an. Ndi'in cha' tyaa yu'wi ti' wan nan lka ngwa 'in ayman Jona nu ykwi' cha' 'in Ndiose lo'o ne' Nínive nu ngwa s'ni.

⁴⁰ Sa ña'an nganun Jona kan' ni' kula tnun kan' snan tsan lo'o snan tla, ngwaña'an na', nu wa msu'wa Ndiose 'ñaän ndijyaän cha' kaän nten, kanuñ ni' yuu snan tsan lo'o snan tla xa wa ngujwiin.

⁴¹ Bra nu tiya tsan nu ku'ni biya' Ndiose 'in nchga nten, xtya ayman ne' Nínive ki'ya 'wan nu ndi'in wan lo chalyuu ni bra kan'. Katsa' ayman kan' nchga cha' nu wa ynan ne', xa nu ykwi' ayman Jona lo'o ne' nu ngwa s'ni, lo'o bra kan' mju'u ti' ne' 'in nchga cha' kuxi nu y'ni ne'; ngulaa ya' ne' cha' kuxi kan' chun' wa yten ne' cha' 'in Ndiose. Lo'o ja su'wa cha' nu ngwa'u ayman Jona kan' 'in ne' s'ni lo'o cha' nu ndu'uñ 'wan ni; tlyu la cha' 'in Ndiose lka nu ndu'uñ 'wan ni, lo'o ja nnan 'a wan cha' re siya' ti.

⁴² Lo'o ayman reina nu ngwa ndloo la 'in ne' nde Sur, tyituun nu kuna'an kan' tloo Ndiose tsan nu ku'ni biya' Ni 'in nten chalyuu. Xtya nu kuna'an kan' ki'ya 'wan nu ndi'in wan lo chalyuu ni bra kan'. Chkwi' ne' kula kan' sa ña'an ngwa bra nu

yaa se'en mdi'in ayman ree Salomón. Tijyu' 'a kichen tyi reina kan'; wa ynan ne' kula cha' tiya 'a Salomón kan', cha' su'we 'a cha' tiya nu nchkwi' yu. Kan' cha' yaa ne' kula kan' se'en mdi'in ree cha' kunan ni sa ña'an cha' tiya nu nsu'wi 'in yu kula kan'. Lo'o chin' la cha' ngwa'u ayman Salomón ke cha' nu ndu'uñ 'wan ni; tnun la cha' 'in Ndiose lka nu ndu'uñ 'wan ni, lo'o ja nnan wan siya' ti.

Kwi'in kuxi nu ndyaan xiya' se'en ndi'in nten

⁴³ 'Bra nu kulaa ya' kwi'in kuxi 'in ska nten, tya'an yu'wi kwi'in kan' ni' kixin' tijyu' bra kan', se'en ja ndi'in nten; tsaa kwi'in kuxi kan' tsaa naan se'en xitña' chin'. Bra nu ja kaja se'en xitña' kan',

⁴⁴ bra kan' chkwi' kwi'in kuxi kan': "Tya'aän xiya' se'en mdi'iin ti kulo." Ngwaña'an xke' ti' kwi'in kuxi kan'. Bra nu kala kwi'in kuxi kan' se'en ndi'in ne' kan', bra ti ña'an kwi'in cha' ti ndi'in laja ti kasiya 'in nten se'en mdi'in nu ngwa xkan'; ja ya chkaa nten kan'.

⁴⁵ Bra ti tsaa kwi'in xiya', tsaa naan 'in xa kati kwi'in nu xa'an la, cha' su'wa ti xu'wi nchga kwi'in 'in nten kan', cha' kaja se'en tyi'in kwi'in kan' lo'o nten, nchka ti' kwi'in kan'. Ka kuxi la cha' 'in nten kan' bra kan', cha' ka'an la kwi'in nsu'wi 'in ne' bra kan'. Kwi' ngwaña'an kuxi 'a ka cha' 'in nten nu ndi'in lo chalyuu ni, cha' xa'an 'a ne'.

Mdiyan jya'an Jesús lo'o ta'a yu

⁴⁶ Ti nchkwi' la Jesús lo'o nten, lo'o mdiyan jya'an lo'o ta'a Jesús, mduun ne' chun' na'an se'en ndi'in yu cha' nchka ti' ne' chkwi' ne' lo'o yu.

47 Ytsa' ska nten 'in Jesús bra kan':

—Jya'aan lo'o ta'aa, nduun ne' chun' na'an re —ndukwin 'in Jesús—. Nchka ti' ne' chkwi' ne' lo'oo.

48 Mxkwen Jesús 'in yu ki'yu kan' bra kan':

—¿Ti ka nu chañi lka jya'aän a? —ndukwin Jesús 'in ne'—. ¿Ti ka nu chañi lka ta'aän a?

49 Kan' ngua'u ya' yu 'in ne' nu ngi'ni xa'an cha' 'in yu bra kan':

—Ne' re ni, su'wa ndloo 'a ne' re 'ñaän sa ña'an ndloo 'a jya'aän 'ñaän, sa ña'an ndloo 'a ta'aän 'ñaän —ndukwin Jesús—.

50 Ta'aän lka nchga nten nu ngi'ni sa ña'an nu nchka ti' Stiin Ndiose nu ndi'in ni' kwan; nten kan' lka sa ña'an lka jya'aän, sa ña'an lka ta'aän, ni siya ki'yu ne', ni siya kuna'an ne'.

13

Cha' 'in nten nu yta mta trigu

1 Ti kwi' tsan kan' mdo'o Jesús na'an kan', ndyaa yu tu'wa tiyu', ndukwa yu chin' nde kwa.

2 Lo'o ndyo' ti'in ka'an 'a Nten se'en ndi'in Jesús, kan' cha' yten yu ni' yka na'an xuwe, mdukwa yu chin' bra kan'; nganun nten ka'an kan' tu'wa tyi'a ti.

3 Kan' ngua'u Jesús tyun cha' tiya 'in ne', cha' ku'ni xa'an la ne' cha' 'in Ndiose. Nde ndiya cha' nu ykwi' yu:

—Ngwa ska tsan ndyaa ska nten kata mta trigu —ndukwin Jesús—.

4 Bra nu msnen yu mta kan', mdiyuu chin' ran lo yuu tla tu'wa tuwiin; bra ti yan kiñi, mdyii mta kan' yku i'.

⁵ Lo'o ngalu chin' mta kan' se'en lti ti tu'wa yuu nskwa chun' kee, ndla 'a mtsu mta kan'. Cha' nu chin' 'a yuu nskwa chun' kee kan',

⁶ kan' cha' ja msñi su'we suun ran lo kee kan', ja ngwa kaluu su'we ran. Mdyii kala kan' nganaan ran, cha' tikee' 'a kwan.

⁷ Lo'o ngalu chin' mta kan' laja ti kiche'; bra ti nguluu ti kiche' kan' xiya', lo'o ja mda 'a ran chabiya' kaluu kala trigu siya' ti.

⁸ Lo'o ngalu chin' mta kan' lo yuu su'we, se'en nu su'we 'a nguluu kala; lo'o ka'an 'a mta mdo'o lo juun kala kan' bra kan', kwenta ska siyentu mta mdo'o ska lo juun, kwenta snan yla mta mdo'o xka lo juun, kwenta kala tyii mta mdo'o xka lo juun.

⁹ Kunan su'we wan cha' nu nchkwiiñ' lo'o wan ni, si chañi cha' nchka ti' wan kunan wan cha' su'we kan'.

Ni cha' lka ngwa'u Jesús cha' kan'

¹⁰ Chun' ndi'in la mdiyan ne' nu ngi'ni xa'an cha' 'in Jesús se'en ndi'in yu. Mnicha' ne' 'in yu bra kan':

—¿Ni cha' lka ytsaa' cha' kan' 'in ne' kwa? Sa ña'an lka si nchkwii' ne' ska kwentu, ngwaña'an lka cha' kan' —ndukwin ne' kan' 'in Jesús.

¹¹ Mxkwen Jesús 'in ne' bra kan':

—Wa mda Ndiose chabiya' 'wan cha' ka biya' ti' wan ska cha' nu yu'wi kutsi' 'in ayman s'ni, sa ña'an ka xa nu ka Ndiose ndloo la ni' kasiya 'in nten. Nten nu ja msñi cha' 'in Ndiose ni, ja ki'ya ne' kwenta bra nu kunan ne' ska cha' nu nchkwiiñ'; tukwi 'a cha' kan', xke' ti' ne'.

¹² Nten nu ndyaa ña'an ti' cha' nu ynan ne' 'in Ndiose, ti kwa'u la Ndiose cha' 'in ne' kan', cha'

ngwaña'an su'we la sten ne' cha' 'in Ndiose; nten nu ja ndyaa ña'an ti' cha' kan', ne' nu ja xlyaa kunan cha' kan', ku'ni Ndiose cha' ja ka 'in ne' sten ne' cha' 'in Ndiose siya' ti.

¹³ Kan' cha' nchkwiiñ' cha' kan' lo'o nten. Ni siya ña'an ne', ja ki'ya ne' kwenta sa ña'an lka cha' nu ñi kan'; ni siya kunan ne', ja ka biya' ti' ne' sa ña'an lka cha' kan', chun' ja nnan su'we ne' cha' nchkwiiñ'.

¹⁴ Bra nu ña'aan 'in ne' kan', ka biya' tian' cha' chañi 'a cha' 'in Ndiose nu ngwa'an ayman Isaías nu ngwa s'ni. Nde lka sa ña'an nchkwii' cha' kan':
Ja chan kunan wan cha' kan', lo'o ja ka biya' ti' wan sa ña'an cha' nu wa ynan wan, ndukwin Ndiose.

Ja chan ña'an wan cha' kan', lo'o ja ki'ya wan kwenta siya' ti nan lka nu wa na'an wan.

¹⁵ Ja xlyaa ne' tukwa ne' cha' nchkwiiñ', chun' xa'an 'a tiye ne' ta'a wan.

Ja xlyaa ne' kunan ne' cha' nchkwiiñ', chun' ja nnan su'we ne' ta'a wan. Ja nchka ti' ne' ki'ya ne' kwenta, chun' ja nchka 'in ne' ña'an su'we ne'.

Ja xlyaa ne' kulaa ya' ne' cha' kuxi nu ndi'in 'in ne', kan' cha' ja nda ne' chabiya' ku'niñ cha' tlyu ti' 'in ne' 'in cha' kuxi kan', ndukwin Ndiose.

Ngwaña'an ndukwa cha' lo kityi 'in Ndiose.

¹⁶ 'Su'we nka tiye wan cha' ti ndukwa laa kiloo wan, ti ndukwa laa tu nskan wan, cha' ka ki'ya su'we wan kwenta 'in ska cha' nu nchkwii' Ndiose.

¹⁷ Chañi cha' nu nchkwiiñ' lo'o wan, cha' ka'an 'a nten nu ykwi' cha' 'in Ndiose lo'o nten nu ngwa s'ni, lo'o ka'an 'a nten nu su'we ngwa tiye ne' ña'an

ne' 'in Ndiose s'ni, wa mta 'a ne' kan' 'in cha' nu ña'an wan ni, cha' ña'an ne' cha' kan'; wa mta 'a ne' 'in cha' nu nganan wan ni, cha' kunan ne' cha' kan'. Lo'o ja ya ña'an ne' cha' kan', ja ya kunan ne' cha' kan' siya' ti, bra nu ngujwi ne'.

Sa ña'an lka cha' 'in nten nu yta mta trigu

¹⁸ Nde chkwiin' sa ña'an lka cha' tiya nu 'in nten nu yta mta trigu kan':

¹⁹ Bra nu kunan nten sa ña'an ka cha' nu lka Ndiose ndloo ni' kasiya 'in nten, lo'o ja nchka biya' ti' ne' kan' sa ña'an lka cha' kan', bra ti ku'ni kune' xa'an tñan cha' katin cha' su'we kan', cha' ja xñi 'a ne' kan' cha' su'we kan'. Ña'an ti' mta trigu nu mdiyuu tu'wa tuwiin, ngwaña'an lka nten kan'.

²⁰ Lo'o mta nu ngalu lo yuu ti ti tu'wa nu nskwa chun' kee ni, ña'an ti' mta kan', ngwaña'an lka nten nu su'we 'a nka tiye ne' bra nu ynan ne' cha' su'we 'in Ndiose ti kulo.

²¹ Chun' ndi'in la, bra nu mdyisnan xka ta nten nchka ti'í ti' 'in ne' kan', ni siya xtyi lyo'o nten 'in ne' kan' si'ya cha' su'we nu wa ynan ne' kan', ja talo 'a ne' bra kan'. Ña'an ti' mta nu ja msñi su'we suun, mta nu mtsu lo yuu ti ti tu'wa nu nskwa chun' kee kan', ja mdaloo kala kan', bra ti nganaan ran, ngwaña'an lka ne' kan'.

²² Mta nu ngalu lo yuu se'en nsu'wi ti kiche' ni, ña'an ti' mta kan', ngwaña'an lka nten nu wa ynan cha' su'we kan', lo'o nda'an 'a cha' tiye ne' kan' sa ña'an ka 'in ne' lo chalyuu, cha' nchka 'a ti' ne' ka kuliya' ne'. Kan' cha' ja nchka 'in Ndiose ku'ni Ni ska tñan su'we ni' kasiya 'in ne' kan'.

²³ Lo'o mta nu ngalu lo yuu su'we ni, ña'an ti' mta kan', ngwaña'an lka nten nu wa ynan cha' su'we kan', lo'o nchka biya' ti' ne' cha' kan'; xkwi' ngi'ni ne' sa ña'an nchkwi' cha' kan'. Chun' ndi'in la su'we 'a ka cha' nu xu'wi ni' kasiya 'in ne' kan', cha' ña'an ti' yuu su'we kan', ngwaña'an lka kasiya 'in ne' kan'. Nsu'wi juun trigu nu ndo'o ska siyentu mta lo ran, lo'o nsu'wi juun nu ndo'o snan yla mta lo ran, lo'o nsu'wi juun nu ndo'o kalatyii mta lo ran.

Cha' 'in kixin' nu mtsu laja jyan trigu

²⁴ Chun' ndi'in la ngwa'u Jesús xka cha' tiya 'in ne':

—Chkwiin' xka cha' lo'o wan, cha' ka biya' ti' wan sa ña'an ka xa nu lka Ndiose ndloo ni' kasiya 'in nten —ndukwin Jesús 'in ne'—. Sa ña'an lka ska nten nu yta xkwi' mta su'we lo jyan trigu 'in yu, ngwaña'an lka Ndiose.

²⁵ Xa wa tla, yija' x'nan jyan kan'. Bra nu laja' ti yu, bra kan' yan nu nka kontra 'in yu, msnen mta kixin' laja jyan trigu 'in yu kan'. Bra wa mdyii msnen mta kixin', ndyaa nu nka kontra 'in yu kan' bra kan'.

²⁶ Su'wa ti mtsu ta'a tyukwaa loo mta, lo'o mta trigu, lo'o mta kixin' kan'; su'we 'a nguluu kala kan' bra kan'. Chun' ndi'in la na'an ne' cha' si'i xkwi' mta su'we nu wa yta yu kan' nu mtsu; ña'aan lo jyan kan' mxtiyaa' ndukwa trigu lo'o kixin'.

²⁷ Kan' cha' bra ti ndyaa msu se'en ndi'in x'nan jyan kan', ndyaa ytsa' ne' 'in yu sa ña'an nan ngwa: “Yu kula” ndukwin ne' 'in x'nan tñan kan', “¿ta si'i xkwi' mta su'we ytaa lo yuu kwa a? ¿Ni cha' lka ndukwa 'a xka kixin' laja kala ni?”

28 Kan' mxkwen x'nan jyan 'in msu kan' bra kan': "Ti kwi' nu nka kontra ñaãñ y'ni ñu'un 'in kala kwa ñaãñ sikwa" ndukwin x'nan jyan 'in ne'. "¿Ta nchka tii' cha' tsaa ba xkwaan ba kixin' kwa a?, yu kula" ndukwin msu 'in x'nan jyan bra kan'.

29 "Ja su'we ngwaña'an" ndukwin x'nan jyan 'in ne'. "¿Ni sa ña'an ka si lo'o kala trigu xkwaan wan bra kan' a?"

30 Su'we la kataan chin' cha' kaluu ran ta'a tyukwaa ran, sa ña'an bra nu katsi trigu kan'. Bra kan' kuloñ tñan 'in ne' cha' tsaa ne' si'yu ne' kixin' ti kulo, cha' skan' ne' 'in ran kwenta ynin ti ran, cha' skin ran lo kii'; ku'ni ne' kwa bra kan', si'yu ne' nchga trigu cha' xo' ti'in ne' 'in ran ni' ju'wa."

Cha' 'in mta nu xuwe 'a

31 Kwi' ngwaña'an ngwa'u Jesús xka cha' tiya, ña'an ti' ska nkwin ti:

—Xka cha' chkwiñ' lo'o wan, sa ña'an ka xa nu lka Ndiose ndloo la ni' kasiya 'in nten —ndukwin Jesús 'in ne'—. Sa ña'an lka ska mta xuwe 'a nu yta ska nten ni' lyo'oo 'in yu, ngwaña'an ka cha' kan'.

32 Xuwe 'a mta kan', lo'o tnun 'a yka kan' xa nu nguluu ran, sa ña'an bra nu kan kiñi cha' kwiñan i' se'en xkwa i' laja stan' yka kan'.

Cha' 'in skwan tiye'

33 Kwi' ngwaña'an ngwa'u Jesús xka cha' tiya 'in ne':

—Xka cha' chkwiñ' lo'o wan, sa ña'an ka bra nu lka Ndiose ndloo la ni' kasiya 'in nten —ndukwin Jesús 'in ne'—. Ña'an ti' ska ngulu' jya'an skwan, nu xñi ska nu kuna'an cha' su'wa 'in ran lo snan ska' kata jaxlya; xtiyaa' 'in ran bra kan', cha' sa

tlyu ti skwen nchga skwan kan', ngwaña'an ka tñan 'in Ndiose bra kan'.

Ni cha' ngwa'u Jesús cha' tiya kan' 'in nten

³⁴ Ngwaña'an ngwa'u Jesús 'in nten ka'an nu ndi'in nde kwa, cha' xkwi' lo'o cha' tiya nu ña'an ti' nkwin ykwi' Jesús lo'o nten bra kan'; ja ska cha' ndu'u yu 'in nten si ja lo'o cha' tiya nchkwi' yu.

³⁵ Kan' lka ska cha' 'in Ndiose nu wa ykwi' ska ayman lo'o nten nu ngwa s'ni. Nde ndiya cha' kan':

Lo'o cha' tiya ti chkwiïn' lo'o nten cha' kwa'uñn
ska cha' 'in ne', ndukwin Ndiose.
Chkwiïn' 'in ska cha' nu nsu'wi kutsi', ti nu mñaän
chalyuu re.

*Ni sa ña'an lka cha' 'in kixin' nu ndukwa lo jyan
'in ne'*

³⁶ Chun' ndi'in la mxnun Jesús 'in nten ka'an kan', ndyaa yu ni' ña'an kan'. Kan' ndijyan ne' nu ngi'ni xa'an cha' 'in yu se'en ndi'in yu, mnicha' ne' 'in yu bra kan':

—Yu kula, kwa'uu 'wa sa ña'an lka cha' nu ngwa'uu 'wa tsan, cha' 'in kixin' nu ndukwa lo jyan 'in ne' —ndukwin ne' 'in Jesús.

³⁷ —Su'we —ndukwin Jesús 'in ne'—. Na' nu wa msu'wa Ndiose 'ñaän ndijyaän cha' kaän nten, xa nu ndu'uñn 'in nten ni, sa ña'an lka si kataän mta su'we lo jyan 'ñaän, ngwaña'an ngi'niin.

³⁸ Lo'o nu lka jyan 'ñaän ni, kan' lka tyukwi ña'aan chalyuu; lo'o kala trigu nu nguluu la se'en ndukwa mta su'we kan', ngwaña'an lka nten nu nda chabiya' cha' ka Ndiose ndloo la ni' kasiya 'in ne'. Lo'o kixin' kan' ni, ngwaña'an lka nten nu ndi'in cha' 'in lo'o kune' xa'an,

³⁹ cha' ti kwi' kune' xa'an lka nu nxuun lo'oŭn, lo'o kan' lka nu msnen mta kixin' kan' lo jyan 'ñaän. Tsan nu tyisnan si'yu ne' jyan ni, kan' lka tsan nu tlyu 'a bra nu tsaa tii chalyuu; lo'o nten nu si'yu kixin' lo jyan kan' ni, kan' lka angajle 'in Ndiose.

⁴⁰ Sa ña'an lka bra nu xo' ti'in ne' kixin' cha' skin ran, ngwaña'an ka 'in nten kuxi bra nu tyii chalyuu.

⁴¹ Tsan kan', na' nu wa ndijyaän cha' kaän nten, su'waän 'in angajle 'ñaän cha' xo' ti'in 'in nchga nten nu ngwa'u 'in ta'a nten cha' ku'ni ne' cha' kuxi; tyo' ti'in nchga nten nu kuxi ka tiye kan', cha' ja ndi'in chabiya' kanun ne' kan' se'en lka Stiin Ndiose ndloo.

⁴² Bra kan' xkwan angajle 'in ne' kan' lo kii' tnun; kunan 'a ne' kan' bra kan', kasin' 'a ti' ne' sa ña'an ya' nu ku li'ya ne' chun' msin' ti' ne' bra kan'.

⁴³ Kanun nchga nten nu luwi kasiya 'in se'en lka Stiin Ndiose ndloo; sa ña'an luwi xaa kwichaa, ngwaña'an ka luwi 'a tloo ne' kan', chun' ngwa luwi kasiya 'in ne' siya' ti kwenta 'in Ndiose bra kan'. Kunan su'we wan cha' nu nchkiin' lo'o wan, si chañi cha' nchka ti' wan kunan wan.

Cha' 'in ska yu'wa nu ka'an nga'an nu nsu'wi kutsi' ni' yuu

⁴⁴ 'Xka cha' chkwiin' lo'o wan, sa ña'an ka xa nu lka Ndiose ndloo ni' kasiya 'in nten; ña'an ti' ska yu'wa nu ka'an 'a nga'an, ngwaña'an lka cha' kan'. Wa nsu'wi kutsi' yu'wa nu ka'an nga'an kan' ni' yuu ska ni' lyo'oo 'in ne'. Chun' ndi'in la, wa ndyija 'in xka nten se'en nsu'wi kutsi' yu'wa kan'. Su'we 'a ngwa tiye yu bra kan'; kan' cha' bra ti

mdukun' yu yuu lo se'en nsu'wi kutsi' yu'wa kan' xiya', mdo'o yu ndyaa yu lo kichen cha' kujwi' yu nchga nan nu nsu'wi 'in yu. Ngwaña'an mjwi tñi 'in yu, msi'i yu lo'oo kan' se'en nsu'wi kutsi' yu'wa nu ka'an nga'an kan' bra kan'.

Cha' 'in ska kee ngaten nu ka'an 'a nga'an

⁴⁵ Lo'o xka cha' chkwiin' lo'o wan ni, sa ña'an ka xa nu lka Ndiose ndloo la ni' kasiya 'in nten. Lka kan' sa ña'an lka si nda'an naan 'a ska nten 'in kee ngaten nu su'we 'a, kwi' nu lka kee perla. Jlyo ti' yu nan lka nu ndyaa naan yu, kan' cha' kee' nda'an naan yu 'in kee ngaten nu su'we kan', cha' xi'i yu 'in ran, nka tiye yu.

⁴⁶ Chun' ndi'in la ndyija ska kee ngaten nu ka'an 'a nga'an 'in yu kan'; bra ti yjwi' yu nchga nan nu nsu'wi 'in yu, cha' xi'i yu ska ti kee ngaten kan', cha' ja nsu'wi 'a nan su'we la xi'i yu, mske' ti' yu.

(Wa ngwa'u Jesús ta'a tyukwaa cha' tiya kan' 'in ne', cha' ka biya' ti' ne' cha' ska ti cha' ndloo la 'ñaan, cha' tyija lyo 'ñaan chalyuu kwi se'en lka Ndiose ndloo ni' kasiya 'ñaan.)

Cha' 'in katan nu lo'o tsaa ne' kuta kula

⁴⁷ —Lo'o xka cha' chkwiin' lo'o wan ni, sa ña'an ka xa nu lka Ndiose ndloo ni' kasiya 'in nten —ndukwin Jesús—. Sa ña'an lka ska katan tnun nu nduguun nten lo tyi'a tujo'o cha' xñi kula, cha' kanun nchga loo kula ni' katan kan', ngwaña'an lka cha' kan'.

⁴⁸ Chun' ndi'in la jwakii ne' 'in katan msa'an kan', cha' tyo'o ran tu'wa tyi'a. Nde kwa tyi'in ne' chin' cha' kulo suwi ne' nchga kula nu su'we ti; su'wa ne' kula su'we ti kan' ni' xkuwi, xkwan ne' kula nu ja su'we bra kan'.

49 Kwi' ngwaña'an ka tsan tnun bra nu tsaan tii chalyuu. Kan' kan angajle cha' su'we ta'a angajle 'in nchga nten, cha' ja su'wa tyi'in ne' nu xa'an tiye lo'o ne' nu luwi tiye.

50 Xkwan angajle 'in nten xa'an lo kii' tnun; kunan 'a ne' kan' bra kan', kasin' 'a ti' ne' sa ña'an bra nu ku li'ya ne' cha' msin' ti' ne' bra kan'.

Cha' 'in nan nu ka'an nga'an, ni siya cha' nu kwi, ni siya cha' nu kula

51 '¿Ngwa biya' ti' wan nchga cha' nu tka ngwa'uún tián 'wan ni a? —ndukwin Jesús 'in ne' bra kan'.

—Ngwa biya' ti' ba —ndukwin ne' 'in yu.

52 Kan' ngwa'u Jesús xka cha' 'in ne' nu ngi'ni xa'an cha' 'in yu:

—Ska mstru nu ndu'u cha' jo'o ni, xa wa msñi yu cha' 'ñaän, xa wa y'ni xa'an yu sa ña'an ka bra nu lka Ndiose ndloo ni' kasiya 'in nten —ndukwin Jesús—, lka yu kan' sa ña'an lka ska nu kuliya' nu nsu'wi 'a cha' su'we nu ndi'in ni' ña'an tyi yu, ngwaña'an lka mstru kan'. Lo'o ni, nsu'wi 'a cha' su'we nu ka kwa'u yu 'in nten, ni siya cha' nu kula, ni siya cha' nu kwi.

Mdiyan Jesús nde kichen Nazaret

53 Bra nu mdyii ngwa'u Jesús nchga cha' kan' 'in ne', mdo'o yu ndyaa yu xka se'en.

54 Chun' ndi'in la mdiyan yu kichen tyi jya'an yu, yten yu ni' lyaa 'in ne' kwa, ngwa'u yu chin' 'in nten nu ndi'in ni' lyaa kan' bra kan'. Yuwe 'a ti' ne' ña'an ne' 'in yu bra kan':

—¿La nde ya' y'ni xa'an yu ki'yu re nchga cha' nu nchkwi' yu? —ndukwin ne' 'in ta'a ne'—. ¿Ni sa

ña'an ngwa 'in yu cha' nchka 'in yu ngi'ni yu cha' tnun?

⁵⁵ Nan sñi' ne' kwityi ka' ti lka yu re. Lo'o Liya lka jya'an yu; lo'o Santiago, lo'o Se, lo'o Simón, lo'o Juda, ne' kan' lka ta'a yu re.

⁵⁶ Lo'o nu kuna'an ta'a yu ni, ti ndi'in ne' kichen re. ¿La nde ya' y'ni xa'an yu cha' kan' sikwa a?

⁵⁷ Ngwaña'an ngwa cha' chen nka tiye ne' ña'an ne' 'in Jesús, kan' cha' ykwi' Jesús lo'o ne' xiya' bra kan':

—Nchga se'en ngi'ni tnun ne' 'in ska nten nu nchkwi' cha' 'in Ndiose lo'o nten —ndukwin Jesús 'in ne'—. Ska ti kichen tyi yu, ja nnan ne' cha' nu nchkwi' yu siya' ti; lo'o ta'a yu, ja ndukwa 'a ne' cha' nu nchkwi' yu.

⁵⁸ Chin' ti cha' tnun y'ni Jesús kichen kan'. Ja yaa ña'an ti' ne' 'in yu siya' ti, kan' cha' ja y'ni yu ka'an la cha' tnun nde kwa.

14

Ngujwi Xuwa nu ndukwatya 'in nten

¹ Kwi' ña'an bra ynan Herodes cha' 'in Jesús, ti kwi' Herodes nu ngwa ndloo la 'in ne' Galilea.

² Kan' cha' ykwi' yu kula kan' lo'o msu 'in yu:

—Ti kwi' ayman Xuwa nu ndukwatya 'in ne', ti kwi' kan' lka nu ki'yu kan' —ndukwin Herodes—. Wa ngujwi yu, lo'o ndyu'u yu xiya', nxke' tiän', kan' cha' nchka 'in yu ku'ni yu cha' tnun nu ngwaña'an.

³ Ntsen Herodes ni, cha' wa msñi yu 'in Xuwa kan' nu ngwa xkan', mskan' yu 'in Xuwa msu'wa yu 'in yu ni' ña'an chkwan. Y'ni yu kula cha' kuxi

kan' si'ya Herodías kwilyo'o Felipe ta'a yu kula kan',

⁴ cha' bra nu ti lu'u Xuwa wa ykwi' yu cha' re lo'o Herodes kan':

—Ja ndiya chabiya' tyi'iin lo'o kwilyo'o ta'aa —ndukwin Xuwa 'in Herodes bra kan'.

⁵ Nu ngwa bra kan' ngwa ti' Herodes kujwi 'in Xuwa, lo'o ytsen yu 'in ne' kichen, cha' ndyaa ña'an ti' ne' cha' wa ykwi' Xuwa cha' 'in Ndiose lo'o ne'.

⁶ Bra nu ngwi'ya ta'a nin Herodes, y'ni yu ska ta'a bra kan'. Ka'an nten ndyo' ti'in se'en ndi'in yu, kan' mdiyan nu kuna'an sñi' Herodías, yla kiya' tloo Herodes. Mdiya 'a ti' yu kula kan' 'in nu kuna'an kan',

⁷ kan' cha' mskan' yu ska cha' lo'o, cha' ta yu nchga nan nu jñan nu kuna'an kan' 'in yu.

⁸ Ti'í 'a ti' Herodías jya'an nu kuna'an kune' 'in Xuwa, ngwa ti' kujwi 'in Xuwa, kan' cha' ytsa' 'in sñi' ni ña'an nan nu jñan 'in Herodes bra kan'.

—Ke Xuwa nu ndukwatya 'in nten, nchka tiän' —ndukwin nu kuna'an kune' kan' 'in Herodes bra kan'—. Kan lo'o ne' 'in ke yu ska ni' si'yuu —ndukwin.

⁹ Ngwa xi'in chin' ti' Herodes nu lka ndloo kan' bra kan'; wa mskan' yu cha' kan' tloo nchga nten nu nda'an ta'a kan', kan' cha' ngulo yu tñan 'in sndaru cha' ku'ni ne' sa ña'an nu ndukwin nu kuna'an kune' kan'.

¹⁰ Kan' cha' yaa sndaru, yaa mdijin ku' ne' ke Xuwa ni' ña'an chkwan bra kan'.

¹¹ Mstyá ne' ke jyo'o ni' si'yuu, mdiyan lo'o ne' si'yuu kan' bra kan', mda ne' ran 'in nu kuna'an kune' kan' bra kan'. Mdo'o nu kuna'an kan'

ndyaa, ndyaa lo'o si'yuu kan' se'en ndi'in jya'an bra kan'.

¹² Chun' ndi'in la mdiyan ne' nu ngi'ni xa'an cha' 'in Xuwa, ngwi'ya ne' 'in ayman kan', cha' tsaa lo'o ne' 'in yu cha' katsi' yu. Xa wa mtsi' ne' 'in yu, ndyaa ytsa' ne' 'in Jesús sa ña'an ngwa cha' kan'.

Mda Jesús nan yku ka'yu mi nten

¹³ Bra wa ynan Jesús sa ña'an nu ngwa 'in ayman Xuwa, yten yu ska ti yu ni' yka na'an cha' tsaa yu xka tu'wa tiyu'; ngwa ti' yu tsaa yu ska se'en ni' kixin', se'en ja ndi'in nten. Bra ti ngwa biya' ti' ka'an nten cha' ndyaa yu nde kan', kan' cha' bra ti mdo'o ña'an ne' 'in yu, kiya' ti ne' ndijyan ne' tu'wa tiyu'. Lo'o ne' tyun kichen mdiyan ne'.

¹⁴ Bra wa mdiya yka na'an kan' se'en ndyaa yu tu'wa tiyu' kan', mdo'o Jesús; na'an yu cha' wa ndi'in ka'an 'a nten nde kwa bra kan'. Nchka t'nan 'a ti' yu 'in nchga nten kan', kan' cha' y'ni yu cha' nchkaa nchga ne' ti'í nu nda'an lo'o ne'.

¹⁵ Tyukwi tsan mdi'in ne'. Bra wa msiin ykwi' ne' nu ngi'ni xa'an cha' 'in Jesús lo'o yu:

—Ni' kixin' 'a ndi'ian re. Ja tukwin ndi'in kwi' se'en ti nde —ndukwin ne' 'in Jesús—. Kwi' ngwaña'an msiin 'a ni. Su'we la kuloo tñan 'in nten ka'an kwa cha' tsaa ne' nchga kichen nu ndi'in lo yuu kwa, cha' xi'i ne' nan ku ne'.

¹⁶ —'Wan, ta wan nan ku ne' nde ti —ndukwin Jesús—. Ja ndi'in cha' tyaa ne'.

¹⁷ Yuwe 'a ti' ne' nu ngi'ni xa'an kan' bra kan':

—Ka'yu ti jaxlya teje' ndiya 'ñaan nde, yu kula —ndukwin ne' 'in Jesús—, lo'o ndiya tukwa ti kula. Sa kan' ti nan.

¹⁸ Ykwi' Jesús lo'o ne' kan' bra kan':

—Kan lo'o wan 'in ran nde re —ndukwin yu 'in ne'.

¹⁹ Lo'o kan' ngulo Jesús tñan 'in nten ka'an, cha' tyukwa ne' chin' lo kii. Kwi' msñi yu ka'yu jaxlya teje' kan' lo'o tukwa kula kan'; mxina'an yu ni' kwan bra kan', ndya yu xu'we 'in Ndiose. Kan' mdyisnan yu msu'we yu jaxlya lo'o kula kan', mda yu kwenta yu'we ran 'in ne' nu ngi'ni xa'an cha' 'in yu cha' kutsaa ne' ran 'in nten ka'an kan' bra kan'.

²⁰ Ngwaña'an ngwa cha' yku nchga nten kan', sa ña'an ya' nu ngula' ti' ne'. Mxo' ti'in yu kune' nchga yu'we nu nganun bra kan', msa'an tii tyukwa xkuwi lo'o yu'we jaxlya kan'.

²¹ Ka'yu mi nu ki'yu yku se'en ndi'in Jesús tsan kan', lo'o xka kwenta nu kuna'an lo'o nu xuwe ti.

Mda'an Jesús lo tyi'a tiyu'

²² Chun' ndi'in la ngulo Jesús tñan 'in ne' nu ngi'ni xa'an cha' 'in yu, cha' sten ne' ni' yka na'an cha' tsaane' xka la'a tsu' tiyu' kan'; nde loo la tsaane' ti ykwi' ti ne', lo'o kanun yu ska ti yu cha' slaa' yu 'in nten ka'an kan', ngwa tiye yu.

²³ Bra wa ndyaa nchga nten kan', ndyaa Jesús lo ki'ya cha' chkwi' lo'o Ndiose se'en ndi'in yu ska ti yu bra kan'. Bra wa tsaane' ti kwichaa, ti ndi'in Jesús ska ti lo ki'ya kan'.

²⁴ Ti kwi' ti bra kan' tijyu' nda'an yka na'an kan' lo tiyu'. Kee' ti ndya'an yka na'an lo tyi'a si'ya kwi'in, cha' lye 'a nskwa kwi'in, lye 'a ngutsa tyi'a lo tiyu'.

²⁵ Wa ki'ya ti xaa, kan' ndijyan Jesús nda'an lo tyi'a ti.

26 Bra nu na'an ne' nu ngi'ni xa'an cha' 'in yu cha' nda'an yu lo tyi'a ti, ytsen 'a ne' bra kan'.

—¡Wa ndijyan ska ayman! —ndukwin ne'.

Msi'ya 'a ne' cha' ytsen ne' bra kan'.

27 Bra ti ykwi' Jesús lo'o ne':

—¡Ku'ni tnun tiye wan! —ndukwin Jesús 'in ne'—. Na' lkaän, ¡ja kutsen 'a wan!

28 Mxkwen Tyu 'in yu bra kan':

—¿Ta chañi cha' nu'win lkaa a?, yu kula —ndukwin Tyu 'in Jesús—. Si chañi cha' nu'win lkaa, kuloo tñan 'ñaän sikwa, cha' lo'oün tya'aän lo tyi'a cha' kalaän se'en ndi'iin.

29 —Kaan nde re —ndukwin Jesús 'in Tyu bra kan'.

Bra ti mdo'o Tyu ni' yka na'an, mda'an yu lo tyi'a cha' kala yu se'en ndi'in Jesús.

30 Bra nu nduwe ti' yu cha' lye 'a nxkwa kwi'in, ytsen 'a yu bra kan', mdyisnan mdiyuu yu ni' tyi'a bra kan'. Kwen msi'ya yu 'in Jesús:

—X'naän —ndukwin Tyu 'in yu—, ¡kuloo lyaa 'ñaän ni' tyi'a re!

31 Bra ti msñi Jesús ya' Tyu.

—Chin' ti bra mdaloo cha' ndyaa ña'an tii' 'ñaän —ndukwin Jesús 'in Tyu —. ¿Ni cha' ja nchka 'iin tsaa ña'an su'we tii' 'ñaän a?

32 Lo'o bra kan' mdiyan lo'o Jesús 'in Tyu se'en ndukwi yka na'an lo tyi'a, yten ne' ni' ran bra kan'; bra ti ngwa tiin kwi'in bra kan'.

33 Kan' cha' y'ni tnun ne' nu ndi'in ni' yka na'an kan' 'in Jesús, mduun xtyin' ne' tloo yu bra kan'.

—Chañi cha' nu'win lkaa ska ti nu lka Sñi' Ndiose —ndukwin ne' 'in yu.

Y'ni Jesús jo'ó 'in ne' nu ti'í nde Genesaret

³⁴ Mdiyan ne' xka la'a tsu' tiyu' kan', mdiya ne' nde Genesaret bra kan'.

³⁵ Bra nu ndyija lyo 'in ne' ngwa tyi kwa cha' ndi'in Jesús, bra ti msu'wa ne' cha' ndyaa nchga kichen kwi' se'en ti, cha' ka biya' ti' ne' kan' cha' wa mdiya Jesús. Kan' cha' mdiyan lo'o ne' 'in nchga ne' ti'í se'en ndi'in Jesús.

³⁶ Mjñan ne' chabiya' 'in yu ni siya kala' ti ne' ti'í kan' kiya' ste' yu. Lo'o bra ti nchkaa ne' ti'í kan' bra kan', chun' wa yla' ne' ste' yu.

15

Ni nan lka nu ngi'ni cha' nchka kuxi ka tiye nten

¹ Chun' ndi'in la mdiyan ska ta ne' tnun nchka se'en ndi'in Jesús. Ne' kichen Jerusalén lka ne' kan', ne' fariseo lo'o mstru nu ndu'u cha' jo'o ni' lyaa lka ne' kan'.

² —¿Ni cha' ja su'we ngi'ni ne' nu ngi'ni xa'an cha' 'iin? —ndukwin ne' kan' 'in Jesús—. Ja su'wa ngi'ni ne' kwa lo'o cha' nu wa ykwi' ayman kula lo'oan nu ngwa s'ni, cha' katen su'we yaan' bra nu tiya ya' kuan. Lo'o ne' nu ngi'ni xa'an cha' 'iin ni, ja ngi'ni ne' ngwaña'an —ndukwin ne' bra kan'.

³ Mxkwen Jesús 'in ne' tnun nchka kan' bra kan': —Lo'o 'wan ni —ndukwin Jesús 'in ne'—, ¿ni cha' lka chin' la cha' nka tiye wan 'in tñan nu ngulo Ndiose 'ñaan?, lo'o lye la nduwe ti' wan 'in nchga loo tñan xuwe nu ngulo ayman kula 'ñaan.

⁴ Wa ykwi' Ndiose lo'oan: “Tukwa wan tñan nu nchkwi' sti jya'an wan” ndukwin Ni. “Kwi' ngwaña'an, si chkwi' wan cha' kuxi 'in sti jya'an wan, ndi'in cha' kujwi ne' 'wan bra kan'” ndukwin Ni.

5 'Wan ni, xka loo cha' nchkwi' wan. Ndu'u wan 'in nten cha' su'we 'a lka si chkwi' wan cha' re lo'o sti, jya'an wan: “Wa mdaän nchga nan nu nsu'wi 'ñaän cha' tyi'in ran kwenta 'in Ndiose, kan' cha' ja ka 'ñaän tayaän' 'wan ni.”

6 Ngwaña'an lka cha' kuxi nu ndu'u wan 'in nten, cha' ja ku'ni tnun ne' 'in sti, jya'an ne'; ngwaña'an nchkwi' wan, lo'o xka ña'an ngulo Ndiose tñan 'ñaan. Ja su'we cha' nu ykwi' Ndiose lo'oan, nxke' ti' wan; su'we la cha' nu ykwi' ayman ta'a wan lo'oan, nxke' ti' wan cha' 'wan ti.

7 ;Kwiñi 'a wan, cha' tukwa cha' nsu'wi tiye wan! Chañi cha' nu ykwi' ayman Isaías cha' 'wan nu ngwa s'ni. Nde lka cha' nu ngwa'an ayman kula kan' lo kityi:

8 Ngi'ni tnun ne' re 'ñaän ska cha' nchkwi' ti ne', ndukwin Ndiose, lo'o ja tyukwi ti tiye ne' ngi'ni tnun ne' 'ñaän.

9 Nan kwiñi 'a ne' re, cha' nchkwi' ne' cha' ngi'ni tnun ne' 'ñaän.

Ndu'u ne' cha' nu nchkwi' nten chalyuu ti 'in ta'a nten ne', ni siya nchkwi' ne' cha' ndu'u ne' cha' 'ñaän 'in ta'a ne'.

Ngwaña'an ndukwa cha' nu ngwa'an ayman Isaías kan' chabiya' 'in Ndiose.

10 Kan' msi'ya Jesús 'in nten ka'an nu ndi'in nde kwa cha' kan ne' kwi' se'en la chin', cha' chkwi' yu lo'o ne' bra kan':

—Kunan su'we wan —ndukwin Jesús 'in ne'—, cha' ka biya' su'we ti' wan —ndukwin—.

11 Si'i ska nan nu nchku ti nten nu ngi'ni cha' ka kuxi ka tiye ne'; nchga cha' nu nchkwi' nten ni, si'ya cha' kan' ka biya' tian' cha' mnu'un tiye ne'.

¹² Bra wa msiin la mdiyan ne' nu ngi'ni xa'an cha' 'in Jesús kwi' se'en ndi'in yu.

—Ja mdiya ti' ne' fariseo kan', xa ynan ne' cha' nu ykwii' —ndukwin ne' kan' 'in Jesús.

¹³ —Stiin Ndiiose nu ndi'in nde ni' kwan, xkwan Ni nchga kixin' nu si'i nan kwiñii nu yta Ni, cha' ja su'we kixin' kan' —ndukwin Jesús 'in ne'—.

¹⁴ Kwi' ngwaña'an, ja su'we ne' fariseo kan' cha' 'in Ndiiose, kan' cha' ndi'in cha' tyo'o tsu' wan 'in ne' kan', cha' ña'an ti' nu kwityiin', ngwaña'an lka ne' fariseo kan' —ndukwin Jesús—. Si kwa'u ska nu kwityiin' tuwiin 'in xka yu ta'a kwityiin' ti yu, tiyuu ta'a tyukwaa ne' kan' ska tu'wa yuu bra kan', cha' tyukwaa ne' kan' ja ngwa ña'an ne' tuwiin se'en ndijyan ne' bra kan'.

¹⁵ Ykwi' Tyu lo'o Jesús bra kan':

—Kwa'uu 'wa sa ña'an lka cha' tiya nu tka ykwii' ti cha' 'in nan nchku ne' —ndukwin—. Ja nchka biya' ti' ba.

¹⁶ —¿Lo'o 'wan, ja ngwa biya' ti' wan cha' kan' a? —ndukwin Jesús 'in ne' kan' bra kan'—.

¹⁷ ¿Ja ya ki'ya wan kwenta a? Nchga nan nu sten tu'wa nten ni, tyijin nan kan' ni' ne'. Bra nu tsaa ne' liya', tyii ji cha' 'in ran bra kan'.

¹⁸ Kwi' ngwaña'an ska cha' nu nchkwi' nten ni, su'wa lka ran lo'o cha' nu nsu'wi ni' kasiya 'in ne'. Nchka biya' ti' nchga nten bra nu wa mnu'un tiye ska nten, si'ya cha' nu nchkwi' yu kan'.

¹⁹ Ni' kasiya 'in nten ni, la kan' ndukwa suun nchga cha' kuxi: ni siya kujwi ne' 'in ta'a nten ne', ni siya tyi'in cha' 'in ne' lo'o kwilyo'o xka nten, ni siya ku'ni ne' cha' kuxi lo'o xka nten, ni siya ku'ni ne' kunan nan nu ndiya 'in ta'a nten ne', ni

siya chkwi' ne' cha' kwiñi 'in ta'a nten ne', ni siya chkwi' ne' kwentu 'in ta'a nten ne'.

²⁰ Bra nu ndiya cha' kuxi ni' kasiya 'in ne', kan' lka nu ngi'ni ñu'un tiye ne'; lo'o bra nu kuan ska nan ni, ni siya ja ya katen su'we yaan', ja ska cha' ku'ni kan' 'in kasiya 'ñaan, cha' ja ka kuxi tiye an ngwaña'an.

Ndyaa ña'an ti' ska nu kuna'an xka la'a tsu' 'in Jesús

²¹ Chun' ndi'in la mdo'o Jesús ndyaa nde lo yuu 'in kichen Tiro, lo'o lo yuu 'in kichen Sidón; lo'o ne' nu ngi'ni xa'an cha' 'in yu, ndyaa ne' lo'o yu.

²² Ngwa ska tsan mdiyan ska nu kuna'an ngwa tyi se'en ndi'in Jesús, msi'ya 'a nu kuna'an kan' 'in Jesús bra kan':

—¡Chka t'nan tii' 'ñaän, X'naän! —ndukwin nu kuna'an kan' 'in Jesús—. Nu'win lkaa ti kwi' nu lka ta'a ayman David, kan' cha' ku'nii ska cha' su'we lo'oün. Ti'í 'a sñiën', nxlyuu 'a kwi'in 'in sñiën' lyuu.

²³ Ja mxkwen 'a Jesús 'in nu kuna'an kan', kan' cha' ndyaa ykwi' ne' nu ngi'ni xa'an cha' 'in Jesús lo'o yu:

—Kuloo tñan 'in nu kuna'an re cha' tyaa xka se'en —ndukwin ne' 'in Jesús—, cha' nda'an nganan ña'an 'a 'ñaan.

²⁴ —Wa msu'wa Ndiose 'ñaän ndijyaän lo chalyuu cha' ska ti lo'o ne' Israel chkwiin' —ndukwin Jesús bra kan!—, cha' sa ña'an ngi'ni slya' nu wa mna', ngwaña'an ngi'ni nten kan' —ndukwin.

²⁵ Lo'o kwi' se'en la mdiyan nu kuna'an kan' bra kan', mduun xtyin' tloo Jesús.

—¡X'naän! —ndukwin 'in Jesús—, ¡tayaa' 'wa!

²⁶ Kan' mxkwen Jesús 'in nu kuna'an kan' bra kan':

—Ja su'we si xñi ne' tyaja nu nchku sñi' ne' cha' ta ne' ku xne' ti —ndukwin.

²⁷ —Chañi cha' nu nchkwii', X'naän —ndukwin nu kuna'an kan'—, lo'o ndiya chabiya' 'in xne' cha' ku i' kata tyija ti nu ngalu tu'wa msaa laja nu nchku x'nan i'.

²⁸ —Chañi cha' ndyaa ña'an tii' 'ñaän —ndukwin Jesús 'in—. Ka cha' nu nchka tii' sikwa —ndukwin.

Bra ti nchkaa sñi' nu kuna'an kan' bra kan'.

Y'ni Jesús jo'ó 'in ka'an 'a ne' ti'í

²⁹ Chun' ndi'in la mdo'o Jesús ndyaa yu tu'wa tiyu' Galilea kan'. Mda'an yu chin' tu'wa tiyu' kan', mskwen yu si' ki'ya cha' tyukwa yu chin' nde kwa bra kan'.

³⁰ Ka'an 'a nten mdiyan se'en ndi'in yu bra kan'; mda'an lo'o ne' 'in ka'an 'a ne' ti'í, lo'o ne' nu ti'í kiya', lo'o ne' kwityiin', lo'o ne' ku'un, lo'o ne' nu chku' ya', nu chku' kiya', nchga lo ne' ti'í. Mstya ne' 'in ne' ti'í kan' lyuu tloo Jesús, lo'o y'ni Jesús cha' nchkaa ne' bra kan'.

³¹ Yuwe 'a ti' nten ka'an kan' xa nu na'an ne' cha' xiya' nchkwii' nu ngwa ku'un, xiya' ngwa tyukwi ya' nu chku' ya', xiya' nda'an nu ngwa ti'í kiya', xiya' chkan' xaa nu ngwa kwityiin'. Lye 'a y'ni tnun ne' 'in Ndiose nu nka X'nan ne' Israel, chun' nchkaa nchga ne' ti'í kan' bra kan'.

Mda Jesús nan yku jakwa mi nten

³² Lo'o msi'ya Jesús 'in ne' nu ngi'ni xa'an cha' 'in yu cha' kan ne' se'en ndi'in yu. Ykwi' yu lo'o ne' bra kan':

—T'nan 'a tñan' 'in nten ka'an kwa —ndukwin Jesús 'in ne' kan'—. Wa snan tsan mda'an ne' lo'oŭn ni, lo'o ja ndiya 'a nan ku ne'. Ja su'we kuloŭn tñan 'in ne' kwa cha' tyaa ne' ña'an ngite' ti ti' ne', cha' ja talo ne' tuwiin ngwaña'an.

³³ Kan' ykwi' ne' nu ngi'ni xa'an cha' 'in yu lo'o yu:

—¿La nde ya' kaja nan ku ne' 'ñaan a? Ni' kixin' 'a ndi'ian re, se'en ja ndi'in nten —ndukwin ne' 'in Jesús—. Kwi' ka'an 'a nten nda'an lo'oan re.

³⁴ —¿Ni sa nkwa ra jaxlya ndiya 'wan? —ndukwin Jesús 'in ne' kan' bra kan'.

—Kati ti jaxlya teje' lo'o 'wa —ndukwin ne' 'in yu—, lo'o ndiya chin' kula xuwe ti —ndukwin ne'.

³⁵ Lo'o ngulo Jesús tñan 'in nten ka'an cha' tyukwa ne' lyuu.

³⁶ Kan' msñi Jesús kati jaxlya kan' lo'o kula kan', ndya yu xu'we 'in Ndiose cha' 'in nan ku ne' kan'. Msu'we yu jaxlya lo'o kula kan', mda yu kwenta yu'we ran 'in ne' nu ngi'ni xa'an cha' 'in yu cha' kutsaa ne' ran 'in nten ka'an bra kan'.

³⁷ Lo'o yku nchga nten jaxlya kan' sa ña'an ya' nu ngula' ti' ne'. Bra nu mxo' ti'in yu kune' nchga yu'we nu nganun se'en yku ne' kan', wa msa'an kati xkuwi lo'o yu'we kan' bra kan'.

³⁸ Jakwa mi yu ki'yu yku jaxlya tsan kan', lo'o xka kwenta nu kuna'an lo'o nu xuwe ti; nchga nten kan' yku ne'.

³⁹ Bra wa mdyii yku ne', mslaa' Jesús 'in nten ka'an kan', cha' tyaa ne' na'an tyi ne'. Kan' yten Jesús ni' yka na'an xuwe ti, mdo'o yu ndyaa yu nde lo yuu Magdala lo'o ne' nu ngi'ni xa'an cha' 'in yu.

16

Nchka ti' ne' ña'an kwi'ya ne' ska cha' tnun nu ku'ni Jesús

¹ Lo'o mdiyan ska ta ne' fariseo lo'o ne' saduceo se'en ndi'in Jesús, cha' chkwi' biya' ne' lo'o yu, si ka kuxi la cha' 'in yu, nka tiye ne'. Nchkwi' ne' lo'o Jesús cha' kwa'u ska cha' tnun 'in ne', ska cha' tnun nu tyo'o tukwa ni' kwan chabiya' 'in Ndiose.

² Mxkwen Jesús 'in ne' bra kan':

—Nu 'wan ni, ndiya tsan nchkwi' wan cha' re bra wa tsaa ti kwichaa: “Luwi kwan ka la tyaa, cha' lye 'a nga'a ni' kwan ni” ndukwin wan.

³ Kwi' ndiya xka tsan nchkwi' wan nde tlya, xa nu ña'an wan ni' kwan: “Ki'ya tyoo ni, cha' ndla ti xaa” ndukwin wan. ¡Kwiñi 'a wan! Nchka biya' ti' wan ska nan nu ña'an wan ni' kwan, wa nsu'wi lyo wan cha' kan', lo'o ja ndii 'a ti' wan siya' ti nan ka nu ka 'wan lo chalyuu re ni.

⁴ Nan xa'an 'a tiye wan lo'o ta'a wan, cha' xkwi' nchka ti' wan cha' ku'niin ska cha' tnun cha' ña'an kwi'ya wan 'in ran; lka wan nten nu ja ndyaa ña'an ti' 'in Ndiose siya' ti —ndukwin Jesús 'in ne'—. Lo'o ja ku'niin cha' tnun ngwaña'an. Ndi'in cha' tyaa yu'wi ti' wan nan lka nu ngwa 'in ayman Jona nu ykwi' cha' 'in Ndiose lo'o nten nu ngwa s'ni.

Ja ykwi' 'a Jesús lo'o ne' kan', mdo'o yu ndyaa yu bra kan'.

Ña'an ti' skwan tiye', ngwaña'an lka ne' fariseo

⁵ Ti kwi' tsan kan', wa mdijin ne' lo tiyu' lo'o yka na'an. Mdo'o ne' xka la'a tsu', lo'o ndyu'wi ti' ne' nu ngi'ni xa'an cha' 'in Jesús cha' wa mjlyaa ti' ne' kwi'ya ne' jaxlya teje' cha' ku ne' tuwiin.

⁶ Kan' ykwi' Jesús lo'o ne':

—Cha' tiya ti ti' wan tyi'in wan —ndukwin Jesús 'in ne'—. Ki'ya wan kwenta ni sa ña'an ngi'ni skwan tiye' nu nda ne' fariseo lo'o ne' saduceo 'wan —ndukwin.

⁷ Ykwi' ne' nu ngi'ni xa'an cha' 'in yu lo'o ta'a ne' bra kan':

—Cha' ja ngwi'yaan jaxlya teje' nda'aan, kan' cha' nchkwi' yu kula kwa lo'oan, cha' 'in skwan tiye' kan' —ndukwin ne'.

⁸ Jlyo ti' Jesús cha' ja ngwa biya' ti' ne' cha' kan'.

—¿Ni cha' nduwe ti' wan cha' ja lo'o jaxlya teje' 'wan ndijyan wan? —ndukwin yu 'in ne'—. Chin' ti cha' ndyaa ña'an ti' wan 'in Ndiöse.

⁹ ¿Ta chañi cha' ja ya ka biya' ti' wan a? ¿Ja nsu'wi ti' wan cha' ngwa ka'yu ti jaxlya teje' nu yku ka'yu mi nten nu ngwa xkan' a? Tyun xkuwi msa'an lo'o yu'we jaxlya nu nganun xa wa mdyii yku ne' tsan kan'.

¹⁰ Ti kwi' ti cha', kati jaxlya teje' yku jakwa mi nten kan', kwi' tyun xkuwi msa'an lo'o yu'we jaxlya nu nganun xa wa yku ne' bra kan'.

¹¹ ¿Ni cha' lka ja ndi'ya wan kwenta? Ja nchkwiin' cha' 'in jaxlya nu nchku nten bra nu nchkwiin' cha' 'in skwan tiye'. Kan' cha' katsaän' 'wan xiya' ni: Ki'ya wan kwenta ni sa ña'an ngi'ni skwan tiye' nu nda ne' fariseo lo'o ne' saduceo 'wan.

¹² Ngwa biya' ti' ne' bra kan', cha' nchkwi' Jesús cha' 'in nchga cha' kuxi nu ndu'u ne' fariseo lo'o ne' saduceo 'in nten, cha' ja su'we xñi ne' cha' kan'; si'i cha' 'in skwan tiye' nu ndyu'wi lo jaxlya ngwa ti' Jesús chkwi' bra kan'.

Ytsa' ñi Tyu cha' ti kwi' Krixtu lka Jesús

¹³ Xa wa mdiya ne' laja yuu nu kwenta 'in kichen Cesarea de Filipo, mnicha' Jesús 'in ne' nu ngi'ni xa'an cha' 'in yu bra kan':

—¿Ni ña'an nchkwi' ra nten cha' 'ñaän a? ¿Ta na' lkaän ti kwi' nu wa msu'wa Ndiose ndijyan cha' ka nten a? —ndukwin Jesús 'in ne' kan'.

¹⁴ —Ndiya nten nu nchkwi' cha' nu'win lkaa ayman Xuwa nu mdukwatya 'in nten nu ngwa xkan' —ndukwin ne' 'in Jesús—. Lo'o ndiya nten nu nchkwi' cha' ayman Elías lkaa. Lo'o ndiya nten nu nchkwi' cha' ayman Jeremías lkaa. Lo'o ndiya nten nu nchkwi' cha' wa ndyu'u xka ayman xiya' nu ykwi' cha' 'in Ndiose lo'o nten nu ngwa s'ni; ti kwi' kan' lka nu'win, ndukwin ne'.

¹⁵ Xiya' mnicha' Jesús 'in ne' kan':

—Lo'o 'wan ni, ¿ti ka nu lkaän, nxke' ti' wan?

¹⁶ Bra ti mxkwen Tyu Simón 'in Jesús bra kan':

—Krixtu lka nu'win. Sñi' Ndiose nu lu'u lkaa nu'win.

¹⁷ —Su'we nka tiye nu'win Simón, sñi' Jona —ndukwin Jesús 'in yu bra kan'—. Si'i nten chalyuu ti nu ngwa'u cha' kan' 'iin; Stiın Ndiose nu ndi'in nde ni' kwan, kan' nu ytsa' cha' kan' 'iin.

¹⁸ Tyu naan, kan' cha' nu'win kaa sa ña'an lka ska kee nu nsu kiya' na'an. Chañi 'a cha' nu ykwii' tsan; kan' lka suun cha' 'in nten 'ñaän, cha' tsa'a nganun cha' nu ykwii' ngwaña'an. Ja ka 'in kune' xa'an tyijin lyo 'in nten 'ñaän; lo'o kwi'in kuxi, lo'o ayman, lo'o nten, ja tukwin ka 'in tyijin lyo 'in nten 'ñaän, ni siya kaja nten 'ñaän si'ya cha' kuxi.

¹⁹ Taän nchga chabiya' 'ñaän 'iin, cha' ka sten nten 'ñaän nde se'en lka Ndiose ndloo la. Xa nu ja

ku'nii cha' tlyu ti' 'in nten 'in ska cha' kuxi nu y'ni ne' kan', kwi' ngwaña'an ja ku'ni Stiñ Ndiose cha' tlyu ti' 'in nten kan' nde loo la; xa nu ku'nii cha' tlyu ti' 'in nten, kwi' ngwaña'an ku'ni Ndiose cha' tlyu ti' 'in nten kan'.

²⁰ Lo'o ngulo Jesús tñan 'in ne' nu ngi'ni xa'an cha' 'in yu, cha' ja katsa' 'a ne' 'in nten cha' ti kwi' Krixtu lka yu.

Ytsa' Jesús 'in ne' cha' wa kaja ti

²¹ Lo'o mdyisnan Jesús ngwa'u yu 'in ne' cha' ndi'in cha' tsaá yu kichen Jerusalén. Kichen kan' ta ne' kula 'in ne' judío nu ti'í 'in yu. Kwi' sti jo'o nu lka ndloo la, lo'o mstru nu ndu'u cha' jo'o, nchga ne' kula kan' ta ne' nu ti'í 'in yu sa ña'an bra nu kujwi ne' 'in yu. Lo'o tyu'u yu xiya' la mda'a snan tsan, ndukwin yu.

²² Lo'o msñi Tyu ya' Jesús cha' chkwi' yu lo'o:

—Ja kulaa ya' Ndiose 'iin cha' ka ngwaña'an, X'nañ —ndukwin Tyu 'in yu.

²³ Bra ti mxina'an Jesús tloo Tyu bra kan'.

—¡Tyo'o tsuu', Satanás! ¡Ja chkwii' lo'oñ ngwaña'an, cha' si'i ran! —ndukwin Jesús 'in yu—. Ja nka tiye nu'win sa ña'an nka tiye Ndiose, sa ña'an nka tiye nten chalyuu ti nka tiye nu'win ni.

²⁴ Lo'o ngwa'u la Jesús 'in ne' nu ngi'ni xa'an cha' 'in yu bra kan':

—Bra nu ndiya nten nu chañi cha' nchka ti' tya'an lo'oñ —ndukwin—, ndi'in cha' kulaa ya' ne' kan' 'in nchga nan nu nchka la ti' ne', cha' tya'an ne' lo'oñ nchga tsan, ni siya kujwi nten 'in ne' kan' cha' 'ñañ.

²⁵ Kana' kasiya 'in nten nu xkwi' nda'an 'a cha' tiye ne' ni ña'an ka su'we la cha' 'in ne', ti ykwi' ti ne'; lo'o kaja chalyuu 'in ne' se'en ndi'in Ndiose bra nu xlyaa ne' tya'an ne' lo'oũn, ni siya kujwi nten 'in ne' cha' 'ñaän.

²⁶ Ja ska cha' su'we kanun 'in nten bra nu kaja ne', ni siya y'ni 'a ne' kanan lo chalyuu; lo'o kana' kasiya 'in ne' bra kan', cha' ja ka ta nten liya' cha' kaja kasiya 'in ne' xiya'.

²⁷ Chañi cha' bra nu kaän xiya', na' nu wa msu'wa Ndiose 'ñaän ndijyaän cha' kaän nten, su'wa ti kaän lo'o nchga angajle; ka nduwi 'a tyukwi ña'aän lo'o xaa 'in Stiin Ndiose bra kan'. Tsan kan' taän siya' nten kwenta tñan nu wa y'ni skaa ne' xa nu yan ne' lo chalyuu.

²⁸ Chañi cha' nchkwii'n' lo'o wan ni, cha' ndiya nten nu ti nduun lo'oũn lo chalyuu re ni, nu ti ji kaja ne', kan' ka biya' ti' ne' cha' wa mdyisnan cha' lkaän ndloo ni' kasiya 'in nten, na' nu wa msu'wa Ndiose 'ñaän ndijyaän cha' kaän nten.

17

Wa mxa'an tyukwi ña'aan Jesús nduun yu lo'o ne'

¹ Xa wa mda'a skwa tsan, bra kan' ndyaa lo'o Jesús 'in Tyu lo'o Santiago lo'o Xuwa ta'a ngula Santiago kan'; jakwa yu kan' ndyaa yu lo ki'ya kwan.

² Xa nu ti na'an ne' kan' 'in Jesús, wa mxa'an tyukwi ña'aan bra kan'. Luwi 'a ña'an tloo yu; sa ña'an luwi xaa kwichaa, ngwaña'an ña'an yu bra kan'. Ña'an ti' ska xaa nu ngaten 'a, ngwaña'an ngaten 'a ña'an ste' yu.

³ Ti kwi' bra kan' mdo'o tukwa ayman Moisés lo'o ayman Elías, nduun ne' nchkwi' ne' lo'o Jesús. Lo'o ta'a nda'an Jesús ni, na'an ne' 'in ne' kan'.

⁴ Kwi' ykwi' Tyu lo'o Jesús bra kan':

—X'naän —ndukwin Tyu 'in yu—, ¡su'we 'a cha' lo'o bare ndi'in ba! —ndukwin—. ¿Ta su'we nchka tii' si kwiñan ba snan na'an xuwe ti a? Ska ka se'en tyi'in ykwii', xka ka se'en tyi'in yu kula Moisés, xka ka se'en tyi'in yu kula Elías.

⁵ Bra nu ykwi' Tyu mdo'o tukwa ska ko nu ngaten 'a, nu nduwi 'a, nu ndyu'wi ña'an se'en nduun ne'. Ynen ykwi' ska nten bra kan'. Bra ti ngwa biya' ti' ne' kan', cha' nchkwi' Ndiose lo'o ne' laja ko kan':

—Yu re lka yu Sñiën', ndiya 'a tiän' 'in yu —ndukwin Ni—. Su'we 'a nka tiyeën na'aän 'in yu. Kunan su'we wan nchga cha' nu chkwi' Sñiën' re lo'o wan.

⁶ Bra wa ynan ne' nu ngi'ni xa'an kan', cha' nu ykwi' Ndiose cha' 'in Jesús, mlyuu ne' kan' lyuu bra kan', cha' ytsen 'a ne' kan'.

⁷ Lo'o mstyá ya' Jesús chun' ne' bra kan'.

—Tyituun wan —ndukwin Jesús 'in ne'—, ja kutsen 'a wan.

⁸ Kan' na'an ta'a snan ne' nu ngi'ni xa'an kan' se'en mduun ayman kan' tsan la, na'an ne' cha' ja tukwin 'a nduun; xka ti Jesús nduun bra kan'.

⁹ Bra nu ngwi'ya ne' si' ki'ya kan', ngulo Jesús tñan 'in ne' nu ngi'ni xa'an cha' 'in yu bra kan':

—Ja katsa' 'a wan 'in nten ni sa ña'an nan nu wa na'an wan lo ki'ya kwa tsan —ndukwin Jesús 'in ne' kan'—. Sa ña'an bra nu kajaän, na' nu wa msu'wa Ndiose 'ñaän ndijyaän cha' kaän nten, sa

ña'an bra nu ndyu'uñ xiya', kan' ka katsa' wan cha' kan' 'in nten bra kan'.

¹⁰ Lo'o ne' nu ngi'ni xa'an cha' 'in Jesús, mnicha' ne' 'in yu bra kan':

—¿Ni sa ña'an ndyo'o cha' nu nchkwi' kityi kula sikwa? Nchkwi' ran cha' ti kulo la ndi'in cha' kan ayman Elías lo chalyuu xiya' —ndukwin ne' 'in yu.

¹¹ —Chañi cha' kan Elías kulo, cha' ku'ni xu'we yu 'in nchga lo nan —ndukwin Jesús—.

¹² Chañi katsa'an 'wan cha' wa lka yan nu lka Elías lo chalyuu nu ngwa xkan' ti; lo'o ja yu'wi lyo ne' 'in yu, kan' cha' y'ni ne' cha' kuxi lo'o yu. Kwi' ngwaña'an ta ne' nu ti'í 'ñaan, na' nu wa msu'wa Ndiose 'ñaan ndijyaan cha' kaan nten.

¹³ Ngwaña'an ngwa biya' ti' ne' cha' 'in ayman Xuwa nu ndukwatya 'in nten lka cha' nu tka ykwi' ti Jesús lo'o ne'.

Y'ni Jesús jo'ó 'in ska yu kune' nu nxlyuu kwi'in kuxi 'in

¹⁴ Bra wa ngwi'ya ne' si' ki'ya kan', xiya' mdiyan ne' se'en ndi'in nten ka'an kan', lo'o nchga ta'a ngi'ni xa'an ne' cha' 'in Jesús. Bra ti mdiyan ska yu ki'yu, mduun xtyin' yu tloo Jesús, ykwi' yu kan' lo'o Jesús bra kan':

¹⁵ —Chka t'nan tii' 'in sñiën', yu kula —ndukwin yu kan' 'in Jesús—. Ti'í 'a sñiën' cha' ta'a ti nxlyuu kwi'in kuxi 'in yu; ngi'ni kwi'in kan' cha' bra ti ndlyuu yu lo kii', ta'a ti nxyuu 'in yu lo tyi'a.

¹⁶ Yi'aan lo'oñ 'in yu ti'í re se'en ndi'in ne' nu ngi'ni xa'an cha' 'iin, lo'o ja ngwa 'in ne' ku'ni ne' cha' chkaa yu.

¹⁷ —Ja ndyaa ña'an ti' wan 'in Ndiose siya' ti! —ndukwin Jesús 'in ne' kan'—. ¡Kuxi 'a kasiya

'wan! Ja su'we kanuñn se'en ndi'in wan, ja taloñn 'wan siya' ti. Kan lo'o wan 'in yu ti'í kwa se'en ndi'iñn ni.

¹⁸ Kan' ngulo Jesús tñan 'in kwi'in kuxi, cha' tyo'o tsu' siya' ti 'in yu ti'í kan'.

¹⁹ Chun' ndi'in la chin' mnicha' ne' nu ngi'ni xa'an cha' 'in Jesús se'en ndi'in ne', ti ykwi' ti ne':

—¿Ni cha' ja ngwa 'wa kulo ba 'in kwi'in kuxi kan' sikwa? —ndukwin ne' 'in Jesús.

²⁰ Mxkwen Jesús 'in ne' kan' bra kan':

—Chin' ti ya' ndyaa ña'an ti' wan 'in Ndiose, kan' cha' ja ngwa 'wan —ndukwin Jesús 'in ne' kan'—. Chañi cha' re nu nchkwiñn' lo'o wan: Ña'an ti' ska mta yka nu xuwe 'a, ni siya ngwaña'an ti' tsa'a ña'an ti' wan 'in Stiin Ndiose, bra kan' ka chkwi' wan lo'o ki'ya kwan kwa: “Tyo'o tsuu', tyaa xka se'en nde kwa la” nchkwin wan 'in ran, lo'o kunan ki'ya kan' cha' nu chkwi' wan lo'o ran. Kan' tyo'o tsu' ki'ya kan', tsa'a xka se'en bra kan'. Ja ndiya tñan nu ja ka ku'ni wan bra nu chañi ka cha' ndyaa ña'an ti' wan 'ñañn.

²¹ Kwi' ngwaña'an, bra nu kulo wan 'in kwi'in kuxi kan', ja ka kulo wan 'in kwi'in kan' si ja suwi wan chin' 'wan, ti ykwi' ti wan; su'we si ja ku wan tyaja bra nu chkwi' wan lo'o Ndiose cha' 'in ne' nu ti'í ngwaña'an. Ngwaña'an ku'ni wan sa ña'an ya' nu tyo'o kwi'in kan' tyaa.

Xiya' ytsa' Jesús 'in ne' cha' ndi'in cha' kaja yu

²² Chun' ndi'in la, ti ndyaa ne' ti chin' nde lo yuu 'in Galilea, Jesús lo'o ne' nu ngi'ni xa'an cha' 'in yu. Laja nu ndyaa ne' ykwi' Jesús lo'o ne' kan':

—Ndiya ska nten nu kujwi' xu'wa 'ñáän 'in ne' wsiya cha' ta ne' nu tí' 'ñáän, ni siya wa msu'wa Ndiose 'ñáän ndijyaän cha' kaän nten.

²³ Kujwi ne' kan' 'ñáän bra kan', kwi' tyu'uün xiya' la ta'a snan tsan bra kan'.

Lo'o ngwa xi'in 'a ti' ne' bra nu wa ynan ne' cha' kan'.

Mda ne' tñi cha' 'in laa tnun

²⁴ Wa tsan chin' ndyaan ne' kichen Capernaum, mdiyan ne' nu lka tñan ni' lyaa se'en ndi'in Tyu; nxo' ti'in ne' kan' tñi cha' 'in laa tnun nu ndukwa Jerusalén. Ykwi' ne' kan' lo'o Tyu bra kan':

—Nu nka mstru 'wan ni, ¿ta lo'o yu nda yu tñi ni' lyaa kan' a? —ndukwin ne' 'in Tyu.

²⁵ —Nda yu —ndukwin Tyu 'in ne' bra kan'.

Bra nu ngula Tyu tu na'an xiya', ykwi' Jesús lo'o yu bra kan':

—Simón, ¿ni sa ña'an nxke' tii' a? —ndukwin Jesús 'in Tyu—. ¿Ti ka lka nu nda tñi 'in ne' nu ndloo tñi kan'? ¿Ta ndlo ne' tñi 'in sñi' ne', nxke' tii' a? ¿Ta si'i 'in xka nten ndlo ne' tñi a?

²⁶ —Ndlo ne' kan' tñi 'in xka ta nten, ja ndlo ne' ran 'in sñi' ne' —ndukwin Tyu bra kan'.

—Chañi cha' 'iin. Ja lo'o sñi' ne' nda liya' 'in cha' kan' sikwa —ndukwin Jesús 'in Tyu—.

²⁷ Lo'o ni, ja nchka tiän' cha' kasin' ti' ne' kan' 'ñáän, ne' nu lka ndloo la ni' lyaa tnun kan', kan' cha' yaa lyaa tu'wa tiyu' cha' kuun chkwan xñi kula lo tyi'a, cha' xñii ska kula. Kwi' xñii lyaa kula nu kaja 'iin kulo la, slaa tu'wa kula kan', cha' kuloo tñi nu nsu'wi tu'wa i'; kala tñi kan' cha' taa tñi 'in ne' kan' cha' 'iin, kwi' cha' 'ñáän.

18

Ykwi' ne' cha' ndloo la cha' 'in ne', ti ykwi' ti ne'

¹ Ti kwi' bra kan' mdiyan nchga ne' nu ngi'ni xa'an cha' 'in Jesús se'en ndi'in yu, cha' chkwi' ne' lo'o yu:

—¿Ti ka lka nu ndloo la cha' 'in se'en lka Ndiose ndloo? —ndukwin ne' 'in Jesús.

² Kan' msi'ya Jesús 'in ska nu xuwe ti cha' kan se'en ndi'in yu bra kan', cha' tyituun nu xuwe ti tloo ne' nu ngi'ni xa'an cha' 'in yu.

³ —Chañi cha' nchkwiin' lo'o wan —ndukwin Jesús 'in ne'—, cha' ja ka sten wan cha' 'in Ndiose cha' ka Ndiose ndloo ni' kasiya 'wan bra nu ja ya xa'an cha' tiye wan; ndi'in cha' ka tiye wan sa ña'an lka tiye nu xuwe ti re, cha' ja ngi'ni siye' nu xuwe.

⁴ Ska nten nu lka sa ña'an lka nu xuwe ti re, ska nten nu ja ya ka siye' tiye, nu ja nchka ti' tyijin lyo 'in ta'a nten cha' ka ykwi' yu ska nten tnun, kan' lka nu ndloo la cha' 'ñaan se'en lka Ndiose ndloo.

⁵ Bra nu taya' wan 'in ska nten ña'an ti' nu xuwe ti re, chun' msñi su'we wan cha' 'ñaan, kwi' ngwaña'an nan ndaya' wan 'ñaan.

Kuxi 'a ka 'ñaan si ndi'in ska ki'ya 'ñaan nu ndiya la tian'

⁶ 'Si ndiya nten nu ndatsaa 'in ta'a nten cha' ku'ni cha' kuxi, ni siya ndatsaa nten kan' 'in nu xuwe ti re cha' ku'ni cha' kuxi, su'we la chkan' ska kichi tnun ynin nten kuxi kan', lo'o kan' xtyuu ne' 'in ne' kan' lo tyi'a tujo'o cha' tyii ji cha' 'in ne' bra kan'. Su'we la si kaja nten nu ngwaña'an ngi'ni, cha' ja tatsaa 'a ne' 'in xka la nu xuwe ti cha' ku'ni cha' kuxi ngwaña'an.

⁷ ;T'nan 'a nten chalyuu re! Nsu'wi 'a cha' kuxi nu ngi'ni ñu'un tiye nten. Nchga bra ndiya cha' kuxi ngwaña'an lo chalyuu, lo'o tnun 'a cha' ngi'ni nten nu ndatsaa 'in ta'a nten cha' ku'ni cha' kuxi; tlyu 'a nu ti'í kaja 'in ne' kan' nde loo la.

⁸ 'Ndi'in cha' kulaa ya' wan siya' ti nchga cha' kuxi nu ndiya la ti' wan, ni siya ndloo 'a cha' kuxi kan' 'wan ña'an ti' ska la'a ya' wan, ña'an ti' ska la'a kiya' wan. Su'we la si tyisnan chalyuu nu ja tsaa tii 'a 'wan, ni siya ja lo'o cha' kuxi kan' nu ndiya la ti' wan, lo'o kan' ja tsaa 'a wan lo kii' nu ja tsaa tii 'a cha' nchkin bra kan'.

⁹ Ti kwi' ti cha', bra nu ndiya la ti' wan ska cha' kuxi nu ña'an wan, ndi'in cha' kulaa ya' wan cha' kan' siya' ti, sa ña'an lka si kulo wan ska la'a kiloo wan lka cha' kan', cha' ja ku'ni 'a wan cha' kuxi kan' siya' ti. Su'we la si tyisnan chalyuu nu ja tsaa tii 'a 'wan, ni siya ja lo'o cha' kuxi kan' nu ndiya la ti' wan, lo'o kan' ja tsaa 'a wan lo kii' nu ja tsaa tii 'a cha' nchkin bra kan'.

Cha' 'in ska slya' nu wa mna' 'in ne'

¹⁰ 'Ja su'we xa nu ja kuwe ti' wan 'in ska nten 'ñaän, ña'an ti' ska nu xuwe ti re. Chañi cha' nchkwiiñ' lo'o wan, cha' ndiya angajle se'en ndi'in Ndiose nu ndi'in kwan 'in nchga nu xuwe ti kan'; nchga bra nsu'wi chabiya' chkwi' angajle kan' lo'o Stiñ Ndiose cha' 'in nu xuwe kan'.

¹¹ Wa ndijyaän lo chalyuu chabiya' 'in Ndiose cha' kaän nten, cha' kulaän 'in nten chalyuu nu wa mna' kasiya 'in si'ya cha' kuxi.

¹² ¿Ni sa ña'an xke' ti' wan ni a? Wa nsu'wi ska siyentu slya' 'in ska nten, lo'o mdiya ska tsan mna' ska ti slya' 'in yu. ¿Ni sa ña'an ku'ni yu bra kan' a?

Nde ña'an ku'ni yu, nxke' tiän': Xnun yu 'in ña'aan ta slya' ka'an kan' si' ki'ya se'en su'we ti ndi'in i', cha' tsaa yu tsaa naan yu 'in slya' nu mna' 'in yu kan'.

¹³ Bra nu tyija lyo slya' kan' 'in yu, ka su'we 'a ka tiye yu bra kan', cha' xiya' ña'an yu ska ti slya' nu wa mna' 'in yu; lo'o ja ndi'in cha' tya'an cha' tiye yu cha' 'in xa jyakwa yla nsu'wi ti'yun lkwa slya' nu nganun su'we ti.

¹⁴ Sa ña'an nu ngi'ni x'nan slya' kan', cha' ja kana' ska slya' 'in yu, ngwaña'an ngi'ni Sti wan Ndiose nu ndi'in nde ni' kwan, chun' ja nchka ti' Ni cha' kana' kasiya 'in ska nten si'ya cha' kuxi nu ndi'in 'in ne'. Ja nchka ti' Ndiose cha' tyii cha' 'in ska nten, ni siya xuwe 'a ne' kan', nxke' ti' wan.

Ndi'in cha' ku'nian cha' tlyu ti' 'in ta'a ntean

¹⁵ Bra nu ndiya ska nten ta'a wan nu wa y'ni ska cha' kuxi lo'o wan, bra kan' tsaa wan se'en ndi'in yu ta'a wan kan', cha' mnan ti katsa' wan 'in yu kan' sa ña'an lka cha' kuxi nu y'ni yu lo'o wan. Su'we 'a bra kan' si xlyaa yu ta'a wan kan' kunan yu cha' nu chkwi' wan lo'o yu. Ka xi'in ti' yu bra kan', si'ya cha' kuxi kan' nu wa y'ni yu, chka su'we cha' 'wan lo'o yu ta'a wan kan' xiya'.

¹⁶ Ni siya ja xlyaa yu ta'a wan kan' kunan yu cha' nu nchkwi' wan lo'o yu, su'we la si tsaa wan se'en ndi'in yu kan' xiya'; lo'o xka la ne' ta'a wan tsaa wan bra kan', cha' lo'o ne' kan' kunan ne' cha' nu chkwi' ta'a tyukwaa wan, cha' ka ne' kan' testigo bra kan'.

¹⁷ Si ja xlyaa 'a yu ta'a wan kan' kunan yu cha' nchkwi' tukwa snan wan bra kan', ndi'in cha' katsa' wan cha' kan' 'in ña'aan ta nten 'wan, nu

su'wa ngi'ni tnun wan 'in Ndiose. Ti kwi' ti cha', si ja xlyaa yu ta'a wan kan' kunan yu cha' nu nchkwi' ña'aan ta ta'a wan lo'o yu bra kan', ja chka su'we cha' 'wan lo'o yu kan' sikwa. Ña'an ti' ska nten nu ja ndi'in cha' 'in lo'o Ndiose siya' ti, ngwaña'an ka yu kan' lo'o wan; sa ña'an ngi'ni wan lo'o ska msu 'in ne' xka la'a tsu' nu kwiñi ti ndlo ka'an 'a tñi 'wan, ngwaña'an ku'ni wan lo'o yu bra kan'.

18 Chañi cha' nu nchkwiñ' re, cha' xa nu ja ku'ni wan cha' tlyu ti' 'in nten 'in ska cha' kuxi nu y'ni ne' kan', kwi' ngwaña'an ja ku'ni Ndiose cha' tlyu ti' 'in ne' kan' nde loola. Lo'o bra nu ku'ni wan cha' tlyu ti' 'in nten, kwi' ngwaña'an ku'ni Stiin Ndiose cha' tlyu ti' 'in ne' kan'.

19 Xiya' katsaän' 'wan cha' chañi cha' ku'ni Stiin nu ndi'in nde ni' kwan nchga cha' nu jñan wan 'in Ni, xa nu su'wa cha' nsu'wi tiye wan, ni siya tukwa ti wan ndi'in wan nchkwi' wan lo'o Ni.

20 Lo'oũn ndi'iin lo'o wan nchga se'en nu ndyo' ti'in tukwa snan ti wan chabiya' 'ñaän.

21 Lo'o ndijyan Tyu kwi' se'en la cha' kunicha' yu 'in Jesús:

—X'naän —ndukwin 'in Jesús—, ¿ni lkwa ya' ku'niin cha' tlyu ti' 'in yu ta'aän xa wa y'ni yu ska cha' kuxi lo'oũn? —ndukwin—. ¿Ta su'we kati ya' ku'niin cha' tlyu ti' 'in yu a?

22 Mxkwen Jesús 'in Tyu bra kan':

—Ja chkwiñ' cha' kati ti ya' —ndukwin Jesús—. Su'we ku'ni wan cha' tlyu ti' 'in ta'a wan ni siya snan yla nsu'wi ti'yun tyukwa ya' —ndukwin.

Cha' 'in msu nu ja ngwa ti' ku'ni cha' tlyu ti' 'in ta'a msu

23 'Chkwiin' xka cha' lo'o wan, cha' ka biya' ti' wan sa ña'an ka bra nu lka Ndiose ndloo ni' kasiya 'in nten: Chkwiin' cha' 'in ska ree nu ngwa ti' ku'ni tyii tne' nu ndukwi msu 'in yu.

24 Nu mdyisnan ti ree ku'ni yu ngwaña'an, bra ti mdo'o tukwa ne' se'en ndi'in ree kan', mdiyan lo'o ne' 'in ska msu nu ndukwi tyun 'a miyun pxu 'in ree kan'.

25 Ja la nsu'wi tñi 'in msu kan', cha' tya yu tne' kan' 'in x'nan yu; kan' cha' ngulo x'nan yu tñan cha' kujwi' ne' 'in msu kan', lo'o kwilyo'o yu, lo'o ta'a sñi' yu, lo'o nchga nan nu nsu'wi 'in yu ka kiya' cha' tya yu tñi nu ndukwi yu 'in x'nan yu bra kan'.

26 Ytsen 'a msu kan' bra kan', mlyuu yu lyuu tloo x'nan yu. Mduun xtyin' yu tloo x'nan yu cha' jñan la yu chin' bra 'in x'nan yu bra kan': "X'naän" ndukwin msu kan' 'in ree, "taloo chin' 'ñaän. Taa la chin' bra 'ñaän cha' tyaän nchga tñi nu ndukwiin 'iin tyaa wcha la."

27 Ngwa t'nan ti' ree kan' 'in yu bra kan', y'ni cha' tlyu ti' 'in yu 'in tne' ndukwi yu. "Wa mdyii tne' 'iin ni. Ja ndukwii 'a 'ñaän ni" ndukwin x'nan yu 'in yu. Mdo'o msu kan' ndyaa bra kan'.

28 Tuwiin se'en ndyaa yu, mdyukwa ta'a yu lo'o ta'a msu yu nu ndukwi chin' ti tñi 'in yu bra kan'. Bra ti msñi yu ynin ta'a yu, tlá 'a yu 'in ta'a msu yu. "¿Ni bra tyaa tñi nu ndukwii 'ñaän?" ndukwin yu 'in ta'a msu yu.

29 Lo'o nu ndukwi chin' ti tñi kan' ni, mduun xtyin' yu tloo msu tlá kan', mjñan chin' cha' tlyu ti' 'in yu tlá kan', cha' chka t'nan ti' 'in yu: "Taloo chin' 'ñaän" ndukwin yu 'in yu tlá kan'. "Taa la chin' bra 'ñaän cha' tyaän nchga tñi nu ndukwiin

'iin tyaa wcha la.”

³⁰ Lo'o msu tlá kan' ni, ja ngwa t'nan ti' yu 'in ta'a msu yu siya' ti; bra ti mstya yu ki'ya 'in ta'a msu yu la tu na'an tñan, cha' su'wa ne' 'in msu kan' ni' ña'an chkwan sa ña'an ya' nu tya yu tñi nu ndukwi yu 'in yu kan'.

³¹ Bra wa na'an nchga ta'a msu yu sa ña'an cha' kuxi nu y'ni yu tlá kan', xi'in 'a ti' ne' cha' 'in msu nu nsu'wi ni' ña'an chkwan kan' bra kan'. Kan' cha' ndyaa ne' se'en ndi'in ree kan', ytsa' ne' nchga cha' kan' 'in x'nan ne', sa ña'an nu ngwa 'in ta'a msu ne' nu ndukwi tñi kan'.

³² Bra ti msi'ya ree 'in msu tlá kan', cha' kan yu xiya' tloo ree kan'. “¡Xa'an 'a tiye, nu'win!” ndukwin ree 'in yu tlá kan'. “Wa mjñaan cha' tlyu ti' ñaän, kwi' y'niñn cha' tlyu ti' 'iin nu ngwa xkan' ti, ni siya ka'an 'a tñi ndukwii 'ñaän.

³³ Lo'o ni, ¿ni cha' ja ngwa t'nan tii' 'in ta'a msu wan nu ndukwi chin' ti tñi 'iin, sa ña'an nu ngwa t'nan tiän' 'iin?”

³⁴ Msin' 'a ti' ree 'in msu tlá kan' bra kan', ngulo tñan cha' xñi policia 'in yu, cha' su'wa ne' 'in yu ni' ña'an chkwan, cha' ta ne' nu ti'í 'in yu sa ña'an ya' nu tya msu tlá kan' nchga tñi nu ndukwi yu 'in ree kan'. Kan' lka cha' 'in ree lo'o msu 'in yu.

³⁵ 'Sa ña'an y'ni ree kan' lo'o msu tlá 'in —ndukwin Jesús 'in ne'—, ngwaña'an ku'ni Stiñn nu ndi'in nde ni' kwan lo'o nchga wan, bra nu ja tyukwi ti tiye wan ku'ni wan cha' tlyu ti' 'in ta'a nten wan.

19

Ngwa'u Jesús cha' ja kulaa ti'in ne' 'in kwilyo'o ne'

¹ Bra wa mdyii ykwi' Jesús cha' kan' lo'o ne', mdo'o yu se'en ndi'in yu lo yuu 'in Galilea, ndyaa yu nde lo yuu 'in Judea. Mdiin Jesús chku Jordán,

² lo'o ka'an 'a nten nda'an ña'an 'in yu cha' ku'ni yu jo'ó 'in nchga nu ti'í nu ndiyan lo'o ne'. Kwi' y'ni Jesús jo'ó 'in nu ti'í kan', nchkaa ne' kan' bra kan'.

³ Lo'o kan' mdiyan chin' ne' fariseo se'en ndi'in Jesús cha' chkwi' biya' ne' lo'o yu, si tyija ska cha' kuxi 'in yu 'in ne' si'ya ska cha' nu nchkwi' ti yu, nchka ti' ne'.

—¿Ta ndiya chabiya' cha' kulaa ti'in ska nten 'in kwilyo'o yu siya' ti, si ja nchka 'a ti' yu 'in kwilyo'o yu a? —ndukwin ne' 'in Jesús.

⁴ —¿Ta ja ya chkwi' wan lo kityi cha' 'in Ndiose a? —mxkwen Jesús 'in ne' kan'—. “Ti kulo mñan Ni nten, ska yu ki'yu lo'o ska nu kuna'an” ngwaña'an ndukwa cha' lo kityi kan'.

⁵ Lo'o ykwi' Ndiose cha' re: “Kan' cha' tyo'o tsu' ska yu ki'yu se'en ndi'in sti yu, se'en ndi'in jya'an yu, cha' kaja kwilyo'o yu lo'o ska nu kuna'an, cha' ka ne' ska ti ne' ta'a tyukwaa ne'.”

⁶ Si'i tukwa nten lka ne' bra kan'; sa ña'an si lka ne' ska ti nten, ngwaña'an lka cha' 'in ne' bra kan'. Kan' cha' ja su'we kulaa ti'in ne' 'in kwilyo'o ne', cha' wa mda Ndiose chabiya' cha' nchka kwilyo'o ne'.

⁷ Xiya' mnicha' ne' fariseo 'in Jesús:

—¿Ni cha' lka mda ayman Moisés chabiya' re 'ñaan sikwa? Ka kulo yu ki'yu ska kityi cha' kulaa ti'in yu 'in kwilyo'o yu, ndukwin ayman kan'.

⁸ Xiya' mxkwen Jesús 'in ne' kan' bra kan':

—Ja nnan wan cha' nchkwi' Ndiose siya' ti, kan' cha' mda ayman Moisés chabiya' 'wan cha' kulaa ti'in wan 'in kwilyo'o wan lo'o ska kityi ti —ndukwin Jesús 'in ne'—. Si'i ngwaña'an ngwa ti' Ndiose ti bra nu mñan Ni chalyuu.

⁹ Na' chkwiin' cha' re lo'o wan ni: Bra nu kulaa ti'in ska nten 'in kwilyo'o cha' kaja kwilyo'o lo'o xka nu kuna'an, ku'ni yu cha' kuxi lo'o kwilyo'o yu bra kan'. Ska ti xa wa yten yu'wi kwilyo'o yu lo'o xka yu ki'yu, ñi ka cha' kulaa ti'in yu 'in nu kuna'an kan' bra kan'. Kwi' ngwaña'an lo'o nu kuna'an nu wa ngulaa ti'in 'in kwilyo'o kan', si xiya' kaja kwilyo'o lo'o xka nten, cha' kuxi ku'ni ne' kan' bra kan'.

¹⁰ Lo'o ykwi' ne' nu ngi'ni xa'an cha' 'in Jesús lo'o yu bra kan':

—Su'we la ni siya ja kaja kwilyo'oan siya' ti, si ngwaña'an ka cha' 'in ska yu ki'yu lo'o kwilyo'o yu —ndukwin ne'.

¹¹ —Ndiya 'a nu ki'yu nu ja talo yu cha' tyi'in yu ska ti yu —ndukwin Jesús 'in ne' nu ngi'ni xa'an cha' 'in yu bra kan'—. Ska ti si kulo Ndiose tñan 'in ska nten cha' ja kaja kwilyo'o, bra kan' ka talo yu cha' ja kala' yu 'in ska nu kuna'an siya' ti, bra nu taya' Ndiose 'in yu kan'.

¹² Ndiya tyun lo cha' nu ngi'ni cha' ja nchka kaja kwilyo'o ska yu ki'yu: ndiya nu ki'yu nu kicha yu ti bra nu ngula yu; kwi' ndiya chin' nu ki'yu nu ja nchka 'in yu chun' wa y'ni ñu'un nten 'in yu kan'; kwi' ndiya chin' nu ki'yu nu wa ngulo suwi Ndiose 'in yu cha' ku'ni yu tñan 'in Ni, kan' cha' su'we la cha' ja kaja kwilyo'o yu kan' bra kan', cha' ska ti Ndiose ka ndloo 'in yu bra kan', nske' ti' yu. Ska yu

ki'yu nu ngwaña'an ni, ndi'ya yu kwenta ti ykwi' ti yu si ka 'in yu tyi'in yu ska ti yu; su'we si talo yu kan' tyi'in yu ska ti yu sikwa.

Ndukwan Jesús 'in nu xuwe ti

¹³ Ngwa ska tsan mdiyan lo'o ne' 'in tyun nu xuwe ti se'en ndi'in Jesús. Ngwa ti' ne' cha' xtya ya' Jesús ke nu xuwe ti kan', cha' chkwi' yu lo'o Ndiose cha' 'in nu xuwe kan'. Lo'o y'ni tlá ne' nu ngi'ni xa'an cha' 'in Jesús 'in ne' kan' bra kan'.

¹⁴ Bra ti ykwi' Jesús lo'o yu kune' kan':

—Ta wan chabiya' 'in nu xuwe ti cha' kan ne' se'en ndi'iin —ndukwin Jesús 'in yu kan'—. Ja tukun' 'a wan cha' 'in nu xuwe, cha' ja kan ne'. Sa ña'an lka bra nu ndyaa ña'an ti' nu xuwe 'in sti ne', ngwaña'an ndi'in cha' tsaa ña'an ti' nten 'in Ndiose cha' ka Ndiose ndloo ni' kasiya 'in ne'.

¹⁵ Mstyá ya' Jesús ke nu xuwe kan' bra kan', mdo'o yu ndyaa yu bra kan'.

Ykwi' ska nu kuliya' lo'o Jesús

¹⁶ Ngwa ska tsan mdiyan ska nu ki'yu kune' se'en ndi'in Jesús.

—Mstru, nu'win su'we 'a ngi'nii nchga tsan —ndukwin yu 'in Jesús—. Ku'nii cha' su'we katsaa' 'ñaän, ¿ni sa ña'an cha' su'we ku'niin cha' kaja chalyuu nu ja tsaa tii 'a 'ñaän? —ndukwin yu.

¹⁷ Ykwi' Jesús lo'o yu bra kan':

—¿Ni cha' nchkwii' cha' su'we 'a ngi'niin? —ndukwin Jesús 'in yu kan'—. Ska ti Ndiose nu chañi cha' su'we 'a ngi'ni. Kunaan nchga tñan nu ngulo Ndiose 'in nten, si nchka tii' kaja chalyuu nu ja tsaa tii 'a 'iin.

18 —¿Ni sa ña'an tñan lka kan'? —ndukwin yu kune' kan' 'in yu.

Lo'o ngwa'u la Jesús chin' cha' 'in yu kan' bra kan':

—Ja kujwi wan 'in ta'a nten wan; ja sten yu'wi wan lo'o kwilyo'o xka nten; ja ku'ni wan kunan cha' su'we nu nsu'wi 'in ta'a nten wan; ja chkwi' wan kwentu 'in ta'a nten wan;

19 kwi' ngwaña'an, ku'ni tnun wan 'in sti jya'an wan; chka t'nana ti' wan 'in ta'a nten wan, sa ña'an lka bra nu nchka t'nana ti' wan 'wan, ti ykwi' ti wan.

20 Mxkwen yu kune' 'in Jesús bra kan':

—Ti kuneën' wa ndukwaän nchga tñan kan' nchga tsan —ndukwin yu kune' kan' 'in Jesús—. ¿Ta ndiya la cha' nu ti ji ku'niin sikwa a? —ndukwin.

21 —¿Ta chañi cha' nchka tii' cha' ka luwi kasiya 'iin a? ¿Ta nchka tii' kaja chalyuu kwi nu ja tsaa tii' 'a 'iin a? —ndukwin Jesús 'in yu kune' kan'—. Si chañi cha' nu nchkwii', yaa lyaa kujwii' nchga cha' su'we nu nsu'wi 'iin; tyo'o tñi cha' taa 'in nu ti'i bra kan'. Lo'o ta Ndiose cha' su'we 'iin se'en ndi'in Ni nde loola. Bra wa y'niü cha' kan', kaan se'en ndi'iin cha' tyaa'an lo'oün bra kan'.

22 Bra wa ynan yu kune' kan' cha' nu ykwi' Jesús lo'o yu, mdo'o yu ndyaa yu bra kan'; xi'in 'a ti' yu cha' ykwi' Jesús cha' kan', chun' kuliya' 'a yu.

23 Lo'o ykwi' Jesús cha' re lo'o ne' nu ngi'ni xa'an cha' 'in yu bra kan':

—Chañi cha' nu nchkwii'n' lo'o wan ni —ndukwin—, tukwi 'a lka cha', cha' sten ska ne' kuliya' cha' 'in Ndiose, cha' ka Ni ndloo la ni' kasiya 'in yu.

24 Sa la tñan tyijin ska 'ni kiya' kuxa, ni siya ska 'ni tnun ña'an ti' ska camello; sa la cha' kan', lo'o tukwi la kala ska ne' kuliya' se'en lka Ndiose ndloo.

25 Yuwe 'a ti' ne' nu ngi'ni xa'an cha' 'in yu xa nu ynan ne' cha' kan'.

—¿Ti ka lka nu ka tyo'o tsu' 'in cha' kuxi nu nsu'wi chalyuu cha' kala se'en ndi'in Ndiose sikwa? —ndukwin ne' 'in Jesús bra kan'.

26 —Kan' lka ska tñan nu ja nchka ku'ni ska nten chalyuu; Ndiose ni, kan' nu nchka ku'ni cha' kala nten se'en ndi'in Ni —ndukwin Jesús 'in ne'.

27 Ykwi' Tyu lo'o Jesús bra kan':

—Lo'o bare ni, wa ngulaa ti'in ba nchga nan nu nsu'wi 'wa cha' tya'an ba lo'o nu'win, sa ña'an ya' nu ndukwiin cha' ku'ni ba —ndukwin Tyu 'in Jesús—. ¿Nan ka kaja 'wa nde loo la bra kan' a?

28 —Chañi cha' nu nchkwii'n lo'o wan ni —ndukwin Jesús 'in ne'—, bra nu ka chalyuu kwi kan', na' nu wa msu'wa Ndiose 'ñaän ndijyaän cha' kaän nten, kan' tyitukwaän se'en su'we la ti la kwa, cha' ku'ni biyaän' 'in nchga nten chalyuu bra kan'. Lo'o 'wan nu nda'an wan lo'oün, tyukwa wan lo tii tyukwa yka xlya tnun nu su'we 'a, cha' ku'ni biya' wan 'in ta'a nten wan, nu lka tii tyukwa ta ne' Israel kan'.

29 Kwi' ngwaña'an nchga nten nu ndi'in cha' tsaatijyu' cha' ku'ni ne' tñan 'ñaän, nu lo'o kulaa ti'in ne' nchga nan nu nsu'wi 'in ne' cha' ku'ni ne' tñan kan', ja kulaa yaän' 'in ne' kan' ngwaña'an ti; ni siya xnun ne' na'an tyi ne', ni siya ta'a ngula ne', ni siya sti ne', ni siya jya'an ne', ni siya sñi' ne', ni siya yuu nu nsu'wi 'in ne', ni siya xnun ne' nchga

cha' kan', kaja chalyuu nu ja tsaa tii 'a 'in ne' nde loo la. Kwi' kaja ka'an la cha' kan' 'in ne' kan' xiya', sa ña'an nan nu mna' 'in ne' kan', nxke' ti' ne', ngwaña'an nan nu kaja 'in ne'.

³⁰ Lo'o tyun nten nu tyo'o tukwa xa wa tyii ti cha', kan' lka nu ka nde loo la bra kan'; lo'o tyun nten nu mdo'o tukwa ti kulo, kan' lka nu kanun nde chun' la bra kan'.

20

Cha' 'in ne' nu nda'an ngi'ni tñan 'in nten

¹ Xka cha' tiya chkwii'n' lo'o wan ni, cha' ka biya' ti' wan sa ña'an ka xa nu lka Ndiose ndloo ni' kasiya 'in nten. Wa mdiya ska x'nan msu. Ngwa ska tsan nde tlya mdo'o yu ndyaa yu lo kiya' cha' tsaa naan yu msu, si xlyaa ne' ku'ni ne' tñan ni' lyo'oo 'in yu se'en yta yu yka chi kutun.

² Ta yu siya' msu sa ña'an nu nda ti ne' ska tsan bra kan', ndukwin x'nan msu kan' 'in ne'; su'we 'a mske' ti' ne' nu ka msu, si kaja sa kwa liya' 'in ne'. Mdo'o ne' kan' ndyaa ne' tñan ni' lyo'oo 'in yu bra kan'.

³ Bra wa mdyii snan bra nsu'wi ne' tñan, kan' ndyaa x'nan msu kan' lo kiya' xiya'. Nde kwa na'an yu xka ta nten, nduun ti ne' cha' ja ya kaja tñan 'in ne'.

⁴ Kwi' ykwi' yu lo'o ne' kan' bra kan': "Yaa lya wan, ku'ni wan tñan ni' lyo'oo 'ñaän. Su'wa ku'ni wan tñan lo'o msu 'ñaän, cha' nde kwa nsu'wi ne' ngi'ni ne' tñan 'ñaän. Taän liya' su'we 'wan bra kan'" ndukwin yu. Bra ti ndyaa ne' tñan 'in x'nan msu kan' bra kan'.

⁵ Lo'o xiya' ndyaa x'nan msu kan' lo kiya' la ndi'ya kwan la, xiya' na'an yu chin' nten, nan

nduun ti ne'. Ti kwi' ti cha' ykwi' yu lo'o ne' kan' bra kan'. Lo'o bra wa snan siin, kwi' ngwaña'an ngwa xiya'.

⁶ La wa msiin la, ti nduun la chin' nten lo kiya' kan'. Kwi' ykwi' x'nan msu lo'o ne' bra kan': “¿Ni cha' lka nduun ti wan nde re tyukwi tsan?” ndukwin yu 'in nten kan'. “¿Ja nsu'wi tñan 'wan sikwa a?”

⁷ “Ja ndiya 'a nten nu nchka ti' msu tsan ni” ndukwin ne' 'in yu. “Yaa lya wan ku'ni wan chin' tñan ni' lyo'oo ñaän sikwa” ndukwin x'nan msu kan' 'in ne' bra kan'.

⁸ Bra wa tsa'a ti kwichaa ykwi' x'nan tñan lo'o nu lka ndloo la 'in msu 'in yu: “La ni xi'yaa 'in nchga msu cha' taa siya' ne'” ndukwin yu. “Ti kulo la taa siya' msu nu tka mdiyan ti; bra nu wa tyii ti, taa siya' msu nu mdiyan ti tlya la bra kan'.”

⁹ Mdiyan msu nu tka mdyisnan ti ngi'ni tñan se'en ndi'in yu, mda yu siya' ne' sa ña'an si wa yu'wi ne' tñan tyukwi tsan.

¹⁰ Nde chun' la mdiyan msu nu mdyisnan ngi'ni tñan ti tlya la se'en ndi'in yu. Mske' ti' msu kan' cha' ka'an la tñi kaja siya' ne' bra kan', lo'o su'wa ti mjwi siya' nchga msu 'in yu.

¹¹ Msin' 'a ti' msu nu mdyisnan ngi'ni tñan ti tlya la bra kan'.

¹² “Tyukwi tsan y'ni ba tñan 'iin” ndukwin msu kan' 'in x'nan ne'. “Tikee' 'a kwan ndi'ya kwan, lo'o ti y'ni ba tñan 'iin bra kan'. Lo'o ni, su'wa mjwi siya' ba, nchga ta'a ngi'ni ba tñan, ni siya ska bra ti y'ni ne' kwa tñan 'iin” ndukwin msu nu mdyisnan ngi'ni tñan nde tlya la kan'.

¹³ Lo'o mxkwen x'nan tñan 'in msu nu msin' ti'

bra kan': "Si'i cha' kuxi nu ngi'niñ lo'o wan. ¿Ta si'i wa mskañ' cha' lo'o wan tsan sa kwa liya' tañ' 'wan a? Kwi' sa kwa tñi siya' skaa wan mdañ' 'wan ni.

¹⁴ Xñi wan siya' wan, cha' tyaa wan sikwa. Ja ndi'in cha' kasin' ti' wan 'ñañ. Na' nchka tiñ' cha' ka su'wa siya' wan lo'o xka ta msu nu chin' ti bra y'ni tñan; su'we 'a sikwa.

¹⁵ Nsu'wi chabiya' 'ñañ ku'niñ sa ña'an nu nchka tiñ' ku'niñ lo'o tñi 'ñañ. ¿Ta chañi a? ¿Ni cha' lka ti'í ti' wan 'ñañ sikwa? Su'we liya' mdañ' 'in nchga msu 'ñañ" ndukwin x'nan msu kan'.

¹⁶ Lo'o ni, nten nu tyo'o tukwa xa wa tyii ti cha', kan' lka nu ka nde loo la; lo'o nten nu mdo'o tukwa ti kulo, kan' lka nu kanun nde chun' la —ndukwin Jesús—. Wa mniñ 'in ka'an 'a nten cha' kunan su'we ne' sa ña'an cha' nu ndu'uñ 'in ne', lo'o wa lka ti nten ngulo suwiñ 'in cha' ka ne' nten 'ñañ.

Xiya' ykwi' Jesús lo'o ne' cha' wa kaja ti

¹⁷ Bra nu mda'an ne' tuwiin cha' tsa ne' kichen Jerusalén, mdo'o tsu' Jesús chin' tu'wa tuwiin lo'o tii tyukwa yu kune' nu ngi'ni xa'an cha' 'in yu, cha' chkwi' yu chin' lo'o yu kan' bra kan':

¹⁸ —Jlyo ti' wan cha' wa skwen tian tuwiin nde lo ki'ya ni, cha' wa tsaan tian Jerusalén —ndukwin Jesús 'in yu kan'—. Lo'o na', ni siya wa msu'wa Ndiose 'ñañ ndijyañ cha' kañ nten, xñi ne' kwa 'ñañ cha' tsa lo'o ne' 'ñañ tloo sti jo'o nu lka ndloo la, tloo mstru nu ndu'u cha' jo'o ni' lyaa. Ku'ni biya' ne' kan' 'ñañ bra kan'; chkwi' ne' cha' ndi'in ki'ya 'ñañ, cha' ndi'in cha' kajañ si'ya ki'ya kan'.

19 Kwi' tsa'a lo'o ne' 'ñaän tloo ne' xka la'a tsu' nu lka ndloo la, cha' xtyi lyo'o ne' 'ñaän bra kan'. Kwi' ngwaña'an, jwi'in ne' 'ñaän lo'o ti su, jwi'in ka'an ne' 'ñaän lo wsi cha' kujwi ne' 'ñaän bra kan'. Lo'o la ta'a snan tsan kan', tyu'uün xiya' bra kan' —ndukwin Jesús.

Mjñan jya'an Santiago ska cha' su'we cha' 'in sñi'

20 Chun' ndi'in la mdiyan jya'an Santiago lo'o Xuwa se'en ndi'in Jesús. Zebedeo lka sti ta'a tyukwaa yu ki'yu kan'. Su'wa ti mdiyan nu kuna'an kan' lo'o ta'a tyukwaa sñi', mduun xtyin' tloo Jesús bra kan', cha' jñan ska cha' su'we 'in yu.

21 Kan' mnicha' Jesús 'in nu kuna'an kan':

—¿Nan lka nchka ti' wan a? —ndukwin Jesús.

—Ku'nii cha' su'we taa chabiya' cha' su'wa ti tyukwa sñiën' re lo'oo, se'en ka nu'win ndloo la ti nde loo la —ndukwin nu kuna'an kan'—. Kuloo tñan cha' tyukwa ska yu la'a se'en kwin 'iin, xka yu kan' tyukwa yu la'a se'en ka 'iin —ndukwin nu kuna'an kan'.

22 Lo'o ykwi' Jesús lo'o ta'a tyukwaa yu ki'yu kan' bra kan':

—Ja nchka biya' ti' wan sa ña'an lka cha' nu njñan wan 'ñaän ni —ndukwin Jesús 'in ne'—. Sa ña'an ka si ta ne' ska rmiyu tlyaa' 'a cha' ko'oŭn, ngwaña'an ka nu ti'í nu ta ne' 'ñaän. ¿Ta talo wan si ta ne' nu ti'í 'wan sa ña'an nu ndi'in cha' ta ne' nu ti'í 'ñaän, bra nu kujwi ne' 'ñaän a?

—Talo ba —ndukwin ne' kan' bra kan'.

23 —Chañi cha' lo'o wan ko'o wan rmiyu tlyaa' kan' nu ndi'in cha' ko'oŭn, kwi' tyijin wan nu ti'í sa ña'an nu tyijiin nu ti'í —ndukwin Jesús 'in ne'—. Lo'o ni, ja ndiya chabiya' 'ñaän cha' taän ska se'en

nde siin' se'en tyukwa wan nde loo la, cha' wa lka ngulo suwi Stiin Ndiose 'in nten nu tyukwa nde siin' bra kan'.

²⁴ Bra wa ynan nu xa tyii yu ta'a ngi'ni xa'an cha' 'in Jesús, chen 'a ngwa tiye yu ña'an yu 'in Santiago lo'o ta'a yu bra kan'.

²⁵ Kan' msi'ya Jesús 'in nchga yu kune' kan', cha' tyo' ti'in tloo yu.

—Jlyo ti' wan cha' nu lka ndloo la 'in ne' xka la'a tsu' ni, tlá 'a ne' kan' —ndukwin Jesús 'in ne' nu ngi'ni xa'an cha' 'in yu—. Lye 'a ndlo ne' nu lka ndloo la kan' tñan 'in ta'a kichen tyi ne';

²⁶ lo'o 'wan, ja ndi'in cha' ku'ni wan ngwaña'an. Nchga lo tñan nu ka taya' wan 'in ta'a nten wan, kan' tñan ndi'in cha' ku'ni wan, xa nu nchka ti' wan cha' ka wan ndloo la 'in ne'.

²⁷ Kwi' ngwaña'an, xa nu nchka ti' wan cha' ka wan ndloo la 'in yu ta'a wan, ndi'in cha' ku'ni wan sa ña'an si lka wan msu 'in ta'a nten wan, ni siya ja lo'o liya'.

²⁸ Na' nu wa msu'wa Ndiose 'ñaän ndijyaän cha' kaän nten, ja ndijyaän lo chalyuu cha' kaja msu 'ñaän; ykwiin' kaän msu 'in nten, kan' cha' ndijyaän. Wa ndijyaän cha' kajaän cha' tyii ki'ya nu ndi'in 'in nten, cha' kulaän 'in ka'an 'a nten bra kan' —ndukwin Jesús 'in ne'.

Y'ni Jesús jo'ó 'in tukwa yu kwityiin'

²⁹ Wa mdijin ne' kichen Jericó. Wa tyo'o ti ne' tyaa ne' bra kan', lo'o ka'an 'a nten mdo'o ña'an 'in Jesús.

³⁰ Tu'wa tuwiin se'en tyijin ne' ndukwa tukwa yu kwityiin'; wa ynan yu kwityiin' kan' cha' ti kwi'

Jesús ndijin tuwiin kwa, kan' cha' kwen msi'ya ne' 'in yu:

—¡X'nan ba, chkaa t'nan tii' 'wa! Jlyo ti' ba cha' ti kwi' nu lka ta'a ayman David lkaa —ndukwin yu kwityiin' kan' 'in Jesús.

³¹ Ja mdiya ti' nten ka'an kan', cha' lye 'a msi'ya yu kwityiin' 'in Jesús.

—Mnan ti wan —ndukwin ne' 'in yu kwityiin' kan'.

Ja ynan yu kwityiin', kwen la msi'ya yu bra kan':

—X'nan ba —ndukwin yu—, nu'win lkaa ti kwi' yu nu lka ta'a ayman David —ndukwin yu kwityiin' kan' 'in Jesús—, ¡chkaa t'nan tii' 'wa!

³² Lo'o bra kan' yaa tuun Jesús, msi'ya 'in tyuk-waa yu kwityiin' kan', cha' kan ne' se'en ndi'in yu.

—¿Ni nan ka nchka ti' wan cha' ku'niin lo'o wan a? —ndukwin Jesús 'in ne' bra kan'.

³³ —X'nan ba —ndukwin ne' kan' 'in yu—, nchka ti' ba cha' su'waa su'we xaa kiloo ba cha' ka ña'an ba.

³⁴ T'nan 'a ti' Jesús 'in ne' kan'. Mstya xñii ya' yu chun' kiloo ne' kan' bra kan'; bra ti ngalaa xaa kiloo ne', ngwa ña'an ne' bra kan'. Mdo'o ne' kan' ndyaa ne' bra kan', mda'an ña'an ne' 'in Jesús bra kan'.

21

Y'ni tnun ne' 'in Jesús bra nu ngala yu Jerusalén

¹ Wa kala ti Jesús lo'o ne' nu ngi'ni xa'an cha' 'in yu kichen Jerusalén. Wa tyijin ti ne' ska kichen xuwe ti se'en naan Betfagé, si' ki'ya Olivos ndi'in kichen kan'. Ngulo Jesús tñan 'in tukwa ne' nu ngi'ni xa'an cha' 'in yu bra kan':

² —Yaa wan lo kichen kwa —ndukwin yu—. Ndlá ti tyija ska buru nu nduun nchkan' 'wan; nduun i' lo'o sñi' i'. Xti' wan 'in i' cha' kan lo'o wan 'in i' nde re.

³ Si kunicha' ne' kichen kwa 'wan: “¿Ni sa ña'an tñan ku'ni wan lo'o buru kwa?”, katsa' wan cha' re 'in ne' bra kan': “Ndiya tñan ku'ni buru re cha' 'in ti kwi' nu nka X'naan.” Bra ti ta ne' chabiya' 'wan cha' kan lo'o wan 'in i' bra kan'.

⁴ Ayman nu ykwi' cha' 'in Ndiose lo'o nten nu ngwa s'ni, sa ña'an nu ngwa'an ne' cha' re lo kityi, ngwaña'an nchka cha' ni:

⁵ Katsa' wan 'in ne' kichen Sión:

“Ña'an kwi'ya wan chin' nde re, cha' wa ndijyan nu ka ndloo la 'wan.

Ja tlá yu kula kan', chun' buru ti ndukwa yu.

Ska buru kune' lka i', sñi' 'ni nu ndi'ya yu'wa lka buru kune' kan'.”

Ngwaña'an nchkwi' lo kityi kan'.

⁶ Kan' ndyaa tyukwaa ne' kan' lo kichen bra kan', sa ña'an nu ngulo Jesús tñan 'in ne' cha' tsaane'.

⁷ Ndiyan lo'o ne' 'in buru kan' lo'o sñi' i'. Kan' mstya ne' ste' ne' chun' buru cha' tyukwa Jesús. Lo'o ndyaa tukwa Jesús chun' i' bra kan'.

⁸ Kwi' ngwaña'an, ka'an 'a nten nu ndi'in la kan' mslaa ti'in ne' ste' ne', mstya ne' 'in ran tuwiin cha' ka su'we tuwiin se'en ndijyan Jesús ndukwa chun' buru kan'. Xka ta nten msi'yu stan' yka cha' xtya ne' tuwiin se'en ndijyan yu.

⁹ Lo'o nchga nten msi'ya 'a ne' cha' su'we 'a nka tiye ne', lo'o ne' nu ndyaa nde loo la, lo'o ne' nu ndijyan nde chun' la, su'we 'a nka tiye nchga ne' kan'.

—¡Ku'ni tnun ba 'iin! Nu'win lkaa ti kwi' ta'a ayman ree David nu ndi'in cha' kan —ndukwin ne' 'in Jesús—. ¡Su'we 'a ku'ni Ndiose lo'oo cha' ndijyaan chabiya' 'in Ni nu nka X'naan! ¡Ku'ni tnuan 'in Ndiose ni! —ndukwin ne'.

¹⁰ Kan' mdiyan ne' kan' lo'o Jesús tu'wa kichen Jerusalén, yten ne' tulo'oo kichen kan'. Lo'o yuwe 'a ti' ne' kichen kan' bra kan'. Kwen 'a msi'ya ne' lo'o ta'a ne':

—¿Ti ka nu lka ndijyan re a? —ndukwin ne'.

¹¹ Mxkwen nten ka'an kan' 'in ne' kichen bra kan':

—Jesús Nazaret lka yu re. Nde lo yuu 'in Galilea ndukwa kichen tyi yu. Kwi' nchkwi' yu cha' 'in Ndiose lo'o nten —ndukwin ne'.

Ngulo Jesús 'in nten nu ngi'ni cha' kuxi ni' lyaa tnun

¹² Chun' ndi'in la mdiyan Jesús tu laa tnun se'en ngi'ni tnun nten 'in Ndiose. Yten yu ndyaa yu ni' lyaa kan', ngulo yu 'in nchga nten nde liya' bra kan', ne' nu ndujwi' yu'wa ni' lyaa kan' lo'o nchga nten nu ndi'in nsi'i yu'wa kan'. Kan' mxlyuu Jesús msaa se'en nxa'an ne' tñi 'in nten, mxlyuu yu yka se'en ndukwa ne' nu ndujwi' kiñi cha kuun.

¹³ —Chkwiin' cha' nu ndukwa lo kityi 'in Ndiose, cha' 'in laa re —ndukwin Jesús bra kan'—: “Se'en nu ka chkwi' nchga nten lo'o Ndiose lka na'an re, ngwaña'an chkwi' ne' cha' 'in na'an tyiin, ndukwin Ndiose.” Lo'o 'wan, wa y'ni wan cha' na'an tyi ne' nu ngi'ni kunan lka na'an re —ndukwin Jesús 'in ne' kan'.

¹⁴ Lo'o mdiyan chin' nu kwityiin' se'en ndi'in Jesús ni' lyaa tnun kan', kwi' mdiyan nten nu ti'í kiya'; y'ni Jesús cha' nchkaa nu ti'í kan' bra kan'.

¹⁵ Na'an sti jo'o nu lka ndloo cha' tnun nu y'ni Jesús bra kan'; lo'o mstru nu ndu'u cha' jo'o kan', na'an ne' sa ña'an ngwa cha' nchkaa nu ti'í kan'. Lo'o na'an ne' kan', cha' ndi'in tyun nu xuwe ti, nu kwen 'a nchkwi' xa ngi'ni tnun ne' 'in Jesús:

—¡Ku'ni tnun ba 'iin! Nu'win lkaa ti kwii' nu lka ta'a ayman ree David nu ndi'in cha' kan' —ndukwin nu xuwe kan'.

Msin' 'a ti' ne' nu lka ndloo kan' bra kan', bra nu ynan ne' tnun nchka kan' sa ña'an cha' nu nchkwi' nu xuwe kan'.

¹⁶ Bra ti ykwi' ne' tnun nchka kan' lo'o Jesús:

—¿Ta ja nnaan cha' kwiñi nu nchkwi' nu xuwe ti re cha' 'iin a? —ndukwin ne' kan' 'in Jesús.

—Wa ynaän —ndukwin Jesús bra kan'—. Lo'o si'i cha' kwiñi nchkwi' nu xuwe re. ¿Ja ya chkwi' wan lo kityi se'en ndukwa cha' re a?:

Ngala tu'wa kuwi', ngala tu'wa nu xuwe kune'; chañi cha' ngi'ni tnun ne' kan' 'in Ndiose.

¹⁷ Mdo'o Jesús ndyaa yu ska kichen xuwe nu naan Betania. La kan' yija' yu tla bra kan'.

Y'ni Jesús cha' mtyi ska yka kwiñii

¹⁸ La xka tsan mxitukwi Jesús ndyaan kichen tlyu kan', ngite' ti' yu bra kan'.

¹⁹ Kan' na'an yu ska yka kwiñii nu nduun tu'wa tuwiin. Ndyaa na'an yu 'in yka kan' si kaja nan ku yu lo ran, lo'o ja nsu'wi nan lo ran, xkwi' lka' ti nsu'wi lo ran. Ykwi' Jesús cha' 'in yka bra kan':

—Ja tyo'o 'a nan lo yka kwa xka yijan —ndukwin yu.

Bra ti mtyi yka kan'.

²⁰ Yuwe 'a ti' ne' nu ngi'ni xa'an cha' 'in yu bra kan':

—¿Nan lka ngwa 'in yka kwiñii kwa a? Mtyi ran siya' ti —ndukwin ne' kan' 'in Jesús.

²¹ Mxkwen Jesús 'in ne' kan' bra kan':

—Chañi cha' nu nchkwiin' lo'o wan ni —ndukwin yu—. Bra nu chañi cha' ndyaa ña'an ti' wan 'in Ndiose, lo'o ja lka tukwa cha' nsu'wi tiye wan nchkwi' wan lo'o Ni, lo'o 'wan, ka 'wan ku'ni wan ska cha' tnun ngwaña'an. Si'i cha' kityi ska yka ti chkwi' wan lo'o Ndiose bra kan', lo'o ka chkwi' wan cha' re lo'o ki'ya kwa: “Tyo'o tsuu', yaa tukwaa lo tyi'a tujo'o” nchkwin wan 'in ki'ya kwa. Lo'o tyo'o tsu' ki'ya kwa bra kan'.

²² Nchga lo cha' nu jñan wan 'in Ndiose, bra nu chañi cha' ndyaa ña'an ti' wan 'in Ni, kaja cha' kan' 'wan bra kan'.

Ngì'ni Jesús tñan chabiya' 'in Ndiose

²³ Bra nu mdiyan ne' kichen tlyu kan' xiya', bra kan' yten Jesús ndyaa yu ni' lyaa tnun kan'; ndu'u yu 'in nten xiya'. Lo'o sti jo'o nu lka ndloo, lo'o xka ta ne' kula nu lka ndloo, na'an ne' 'in Jesús bra kan'. Bra ti ndyaa ne' kan' se'en ndi'in yu cha' kunicha' ne' 'in yu bra kan':

—¿Ti ka lka nu nda ra chabiya' 'iin cha' ku'nii sa ña'an tñan nu ngi'nii ni? —ndukwin ne' nu lka ndloo kan' 'in Jesús—. ¿La nde ya' mjwi chabiya' kwa 'iin? —ndukwin ne' kan' 'in yu.

²⁴ —Lo'oũn kunichaän' ska cha' 'wan sikwa, ni sa ña'an xkwen wan 'ñään bra kan' —ndukwin Jesús 'in ne' bra kan'—. Si ka 'wan xkwen wan 'ñään, lo'oũn xkweän 'wan bra kan'; katsaän' ñiän 'wan ti ka lka nu nda chabiya' 'ñään, cha' ku'niän sa ña'an nu ngi'niän nde re ni.

25 ¡Su'we sikwa! Bra nu ti ndukwatya Xuwa 'in nten, ¿ta chabiya' 'in Ndiose ngwa kan' a? ¿Ta chabiya' 'in nten chalyuu ti ngwa kan' a?

Mnan ti ykwi' ne' nu lka ndloo kan' lo'o ta'a ne' bra kan':

—¿Ni sa ña'an xkwean ra 'in yu re? Si xkwean: “Chabiya' 'in Ndiose mdukwatya Xuwa kan' 'in nten”, ja su'we cha' kan', cha' bra ti chkwi' yu cha' re 'ñaan: “¿Ni cha' ja msñi wan cha' nu ykwi' Xuwa sikwa?”

26 Lo'o si xkwean: “Chabiya' 'in nten ti mdukwatya Xuwa kan' 'in nten”, ti kwi' ti cha', ja su'we cha' kan', cha' nchga ne' kichen re ndyaa ña'an ti' ne' cha' chañi cha' ykwi' Xuwa kan' xkwi' cha' 'in Ndiose lo'o nten. Lo'o ntsean 'in ne' kichen re.

27 Kan' cha' mxkwen ne' kan' 'in Jesús:

—Ja jlyo ti' ba —ndukwin ne'.

—Su'we sikwa —ndukwin Jesús 'in ne'—. Lo'o'ün, ja katsaän' 'wan ti ka lka nu nda chabiya' 'ñaän cha' ku'niin sa ña'an nu ngi'niin bra ni.

Cha' 'in ska yu lo'o ta'a ngula yu

28 Ti ngwa'u la Jesús chin' cha' 'in ne' bra kan':

—Chkwiin' ska cha' tiya re lo'o wan, cha' xkwen wan 'ñaän —ndukwin Jesús 'in ne'—. Wa ndi'in ska yu kula nu ndi'in tukwa yu ki'yu sñi' yu. Kan' ykwi' yu kula kan' lo'o sñi' yu nu kula la: “Sñiën” ndukwin yu, “yaa ku'nii tñan ni' lyo'oo 'ñaän ni, se'en ndukwa yka kwiñii 'ñaän.”

29 “¡Ja tsa'aän!” ndukwin sñi' yu bra kan'. Chun' ndi'in la ngwa jyu'u ti' yu kune' cha' ja mdukwa yu tñan 'in sti yu, kan' cha' mdo'o yu ndyaa yu tñan kan'.

³⁰ Lo'o ti kwi' tñan kan' ngulo sti yu 'in xka sñi'. “Tsa'aän, ja kuwe tii!” ndukwin yu kune' la kan' 'in sti yu, lo'o cha' kwiñi ykwi' yu, chun' ja yaa yu tñan 'in sti yu.

³¹ ¿Ni sa ña'an xke' ti' wan ni? Ta'a tyukwaa yu kune' kan' ni, ¿ti lka ska nu y'ni tñan nu ngulo sti 'in a?

—Sñi' yu nu kula la, kan' nu y'ni tñan kan' —ndukwin ne' 'in Jesús bra kan'.

—Chañi cha' 'wan —ndukwin Jesús 'in ne'—. Lo'o chañi cha' nu nchkwiin' lo'o wan ni, cha' ndiya ne' kuxi, ña'an ti' msu 'in ne' xka la'a tsu' nu kwiñi ti ndlo ka'an 'a tñi 'in nten, ndiya ne' kan' nu ndla la sten cha' 'in Ndiose, cha' ka Ni ndloo la ni' kasiya 'in ne'; kwi' ndiya nu kuna'an calle ti nu ndla la sten cha' 'in Ndiose, cha' ka Ndiose ndloo la ni' kasiya 'in ne'. Lo'o 'wan ni, tiya' la kala wan se'en ndi'in Ndiose.

³² Bra nu yan ayman Xuwa kan', xkwi' cha' nu ñi ykwi' yu lo'o wan. Ñi 'a y'ni yu, lo'o ja msñi wan kwenta cha' nu ykwi' yu lo'o wan. Lo'o ne' kuxi kan' nu ka'an tñi ndlo 'in nten ni, wa ynan ne' cha' nu ykwi' Xuwa kan' lo'o ne' bra kan'; kwi' ngwaña'an nu kuna'an calle kan', ynan ne' cha' nu ykwi' Xuwa. Lo'o 'wan, wa na'an wan sa ña'an nu ndyaa ña'an ti' ne' nu kuxi tiye kan' cha' nu ngwa'u Xuwa, lo'o ja ngwa jyu'u ti' wan 'in ki'ya nu ndi'in 'wan, chun' cha' ja msñi wan cha' nu ykwi' Xuwa kan'.

Cha' 'in msu xa'an

³³ Nde chkwiin' xka cha' tiya lo'o wan, ña'an ti' ska nkwin: Ndiya ska nu kuliya', yta yu ka'an 'a yka kwiñii. Msu'wa yu ska lo'oo chun' yka kan'

bra kan'. Lo'o mñan yu ska tu tiyuu ni' kee se'en lyo'o sta ne' mta chi kutun, cha' kulo ne' tyi'a xi nu nsu'wi ni' ran. Lo'o mñan yu ska na'an se'en ku'ni ne' kwan tñan kan' bra kan'.

'Lo'o mda x'nan yuu kan' mñan xka ta nten bra kan', cha' ku'ni ne' tñan ni' lyo'oo 'in yu, chun' nsu'wi ska tñan tsaa yu tijyu'.

³⁴ Chun' ndi'in la, wa tiya ti bra xtun ne' mta chi kutun kan', lo'o tijyu' ndi'in x'nan lo'oo kan'. Kan' ngulo yu tñan 'in ska ta msu 'in yu cha' tsaa ne' se'en ngi'ni ne' tñan ni' lyo'oo 'in yu bra kan', cha' tsaa y'ya msu kan' chin' nan nu ndi'in cha' kanun 'in x'nan lo'oo kan'.

³⁵ Bra nu na'an ne' nu ngi'ni tñan kan' cha' ndijyan msu kan', bra ti msñi ne' 'in msu; mji'in ne' 'in ska, yjwi ne' 'in xka, mguun kee ne' 'in xka.

³⁶ Chun' ndi'in la msu'wa x'nan lo'oo 'in xka ta msu ka'an la bra kan', cha' tsaa ne' se'en ngi'ni ne' tñan kan'. Bra nu na'an ne' cha' ndijyan msu kan', kwi' ngwaña'an y'ni ne' lo'o bra kan'.

³⁷ 'Lo'o kan' msu'wa x'nan lo'oo kan' 'in sñi' yu, ndyaa se'en ngi'ni ne' tñan kan'. “Ja chan tukwa ne' kan' cha' nchkwi' sñiën” nka tiye x'nan lo'oo bra kan'.

³⁸ Xa wa na'an ne' kan' 'in sñi' yu, bra kan' ykwi' ne' lo'o ta'a ne': “Sñi' x'nan lo'oo ndijyan ni” ndukwin ne' 'in ta'a ne'. “Nu kwa ka x'nan yka kwiñii re nde loo la, kan' cha' su'we la si kujwian 'in yu, cha' kanun lo'oo re 'ñaan” ndukwin ne' kan'.

³⁹ Kan' cha' msñi ne' 'in sñi' yu kan', ndyaa lo'o ne' 'in sñi' yu chun' lo'oo, yjwi ne' 'in sñi' yu bra kan'.

⁴⁰ '¿Nan lka ku'ni x'nan lo'oo lo'o yu xa'an nu

ngi'ni tñan ni' lyo'oo 'in yu, bra nu tyaan yu xiya', xke' ti' wan a? —ndukwin Jesús 'in ne' bra kan'.

⁴¹ —Ndla ti kujwi x'nan lo'oo kan' 'in nchga yu xa'an kan' —ndukwin ne' 'in Jesús—. Lo'o ta yu lo'oo kan' jñan xka ta nten cha' ku'ni ne' tñan lo yuu kan'. Tsaa naan x'nan lo'oo 'in nten su'we nu xlyaa tya chin' yu'wa 'in yu, liya' 'in yuu kan'; tya ne' yu'wa nchga yijan bra nu ndiya bra xtun ne' mta chi kutun kan'.

⁴² Xiya' ykwi' Jesús lo'o ne' nu lka ndloo kan' bra kan':

—¿Ja ya chkwi' wan lo kityi 'in Ndiose a? Nde lka cha' kan':

Ti kwi' kee tnun nu mxkwan nten nu mñan na'an ti kulo, cha' ja su'we kee kan', mske' ti' ne', wa mjwi tñan ku'ni kee kan' ni;

nduun ran se'en nka ndloo la 'in na'an 'in Ndiose. Ndiose y'ni cha' ngwaña'an ngwa cha' tnun kan', kan' cha' nduwe 'a tian'.

Ngwaña'an nchkwi' kityi;

⁴³ kan' cha' katsaän' ñi 'wan ni, cha' ja ta 'a Ndiose chabiya' sten wan cha' 'in Ni, cha' ka Ni ndloo la ni' kasiya 'wan. Ta Ni chabiya' kala xka ta nten se'en ndi'in Ni, nten nu su'we nka tiye cha' ku'ni tñan 'in Ni.

⁴⁴ Lo'o cha' 'in kee tnun kan' ni, na' lkaän ña'an ti' kee tnun kan'; sa ña'an nu y'ni ne' nu mñan na'an lo'o kee tnun kan', ngwaña'an ngi'ni wan lo'oñ. Lo'o nten nu nchka ti' tukun' cha' 'ñaän, ja ka su'we cha' 'in ne' kan' bra kan'; bra nu ku'ni biya' Ndiose 'in nchga nten chalyuu, ska ya' ti tyii cha' 'in nten nu ja xlyaa xñi cha' 'ñaän tyukwi nu yan ne' lo chalyuu.

⁴⁵ Sti jo'o nu lka ndloo lo'o ne' fariseo ni, bra nu ynan ne' cha' nu tka ykwi' ti Jesús lo'o ne', mske' ti' ne' cha' ykwi' ka'an Jesús 'in ne' bra nu ykwi' yu cha' 'in ne' xa'an nu y'ni tñan ni' lyo'oo 'in x'nan yuu kan', kwi' cha' 'in kee nu mxkwane' nu mñan na'an.

⁴⁶ Lye 'a nka tiye ne' nu tnun nchka kan' xñi ne' 'in Jesús, cha' kujwi ne' 'in yu, ngwa ti' ne'. Lo'o ja ngwa 'in ne', cha' ntsen ne' 'in nten ka'an kan', cha' ka'an 'a nten ndyaa ña'an ti' cha' ska nten nu nchkwi' cha' 'in Ndiose lka Jesús.

22

Cha' 'in ta'a se'en mjwi kwilyo'o ne'

¹ Lo'o ykwi' Jesús xka cha' tiya lo'o ne' bra kan':

² —Chkwiin' xka cha' lo'o wan cha' ka biya' ti' wan sa ña'an lka bra nu ka Ndiose ndloo ni' kasiya 'in nten —ndukwin Jesús bra kan'—. Ngwa ska tsan ngwa ta'a mjwi kwilyo'o sñi' ree. Y'ni ree ta'a bra kan'.

³ Ngulo ree tñan 'in msu 'in cha' tsaa ne', tsaa ykwi' ne' lo'o nchga nten nu ndi'in su'we cha' 'in lo'o ree, cha' wa mdiya tsan nu ka ta'a kan'; lo'o ja mslyaa ne' kan' kan se'en ndi'in ree tsan nu ngwa ta'a kan'.

⁴ Xiya' ngulo ree tñan 'in msu 'in, cha' tsaa msu se'en ndi'in ne' kan' xiya': “Chkwi' wan lo'o nchga nten kwa, cha' wa lka y'ni xu'weñ skwa cha' ku ne'; wa yjwiin kuta lo'o xkeru. Wa mdiya ya' ku tlya ne' ni, si ku'ni ne' cha' su'we kan ne' ta'a re bra ti, cha' wa mjwi kwilyo'o sñiën'” ndukwin ree 'in msu 'in.

⁵ Ja yan 'a nten kan', chun' ja yuwe 'a ti' ne' cha' mjwi kwilyo'o sñi' ree kan'. Ndiya ne' kan' nu ndyaa tñan ni' kixin', ndiya xka ta ne' kan' nu ndyaa yjwi' yu'wa 'in ne',

⁶ lo'o xka ta ne' kan' ni, msñi ne' 'in msu kan', mji'in ne' 'in msu kan' sa ña'an ya' nu yjwi ne' 'in msu kan'.

⁷ Xa wa ynan ree kan' tñan nu y'ni ne' lo'o msu 'in, msin' 'a ti' ree kan' 'in nten xa'an kan'. Ngulo ree tñan 'in sndaru 'in cha' kujwi ne' 'in nchga ne' xa'an kan' bra kan', cha' xkin sndaru kichen tyi ne' xa'an kan'.

⁸ Lo'o ykwi' ree lo'o msu 'in xiya': “Wa y'niñ xu'weñ skwa cha' ka ta'a mjwi kwilyo'o sñiën” ndukwin ree kan', “lo'o nten nu wa ykwiñ lo'o tsan cha' kan ne' ta'a se'en ndi'iñ, ja mslyaa ne' kan ne', kan' cha' ja ku 'a ne' kan' siya' ti skwa su'we nu nsu'wi 'ñaän.

⁹ Su'we la yaa lya wan nde tuwiin tlyu ni; chkwi' wan lo'o ya ña'an ti nten nu ña'an wan nde tuwiin kwa, cha' kan ne' ta'a nde se'en ndi'iñ.”

¹⁰ Kan' cha' mdo'o msu kan' ndyaa ne' tu'wa tuwiin; ykwi' ne' lo'o nchga nten nu ndyukwa ta'a ne' lo'o, ni siya nten su'we, ni siya nten kuxi. Ndyo' ti'in nchga nten kan' se'en ndi'in ree sa ña'an ya' nu msa'an na'an 'in ree bra kan'.

¹¹ 'Chun' ndi'in la mdiyan ree kan', yten ni' ña'an cha' chkwi' lo'o nchga nten nu ndi'in na'an kan'. Kan' na'an ree cha' ndi'in ska yu ki'yu nu ja lku' te' su'we cha' ta'a.

¹² Kwi' mnicha' ree 'in yu ki'yu kan' bra kan': “Che” ndukwin ree, “¿ni cha' yteen ni' ña'an re ni siya ja lkuu' te' su'we nu wa mdaän 'iin cha' ta'a?” Ja mjwi ña'an xkwen yu ki'yu kan' 'in ree bra kan';

13 kan' cha' ngulo ree kan' tñan 'in msu 'in: “Xñi wan 'in yu ki'yu re, skan' lya wan ya' yu, skan' lya wan kiya' yu. Lo'o xkwan wan 'in yu re lo jwlyaa se'en tla 'a, se'en nsi'ya 'a ne' ndi'in ne', se'en lye 'a nchku li'ya ne' cha' msin' 'a ti' ne'” ndukwin ree kan'.

14 Lo'o Ndiose ni, wa mnin Ni 'in ka'an 'a nten cha' kunan su'we ne' nchga cha' nu nchkwi' Ni, lo'o wa lka ti nten nu ndlo suwi Ni cha' ka ne' nten 'in Ni.

Cha' 'in tñi nu ndlo ne' xka la'a tsu'

15 Lo'o mdo'o ne' fariseo ndyaa ne' cha' ka su'wa cha' 'in ne' lo'o ta'a ne', sa ña'an nu ka kwiñi lyo'o ne' 'in Jesús cha' chkwi' yu ska cha' kuxi. Ka xtya ne' ki'ya 'in yu bra kan'.

16 Ngulo ne' kan' tñan 'in chin' yu kune' nu ngi'ni xa'an cha' 'in ne' fariseo bra kan', cha' chkwi' biya' yu kune' kan' lo'o Jesús, nka tiye ne'. Mda'an yu kune' kan' lo'o xka ta nten nu cha' 'in ree Herodes, ndyaa yu se'en ndi'in Jesús.

—Mstru —ndukwin yu kune' kan' 'in Jesús bra kan'—, jlyo ti' bare cha' ñi 'a ngi'nii; ti kwi' cha' nu ñi nu nchkwi' Ndiose, kan' lka cha' nu ndu'uu 'in nten. Lo'o ja nduwe tii' sa ña'an nnen cha' nu nchkwi' nten 'iin; ska ti biya' ngi'nii lo'o nchga nten, ni siya ne' ti'i, ni siya ne' nu tnun nchka.

17 Ku'nii cha' tlyu ti' 'wa, katsaa' ñi 'wa: Tñi nu ndlo ree tlyu nu ndi'in xka la'a tsu' kan' ni, ¿ta su'we si taan tñi kan' 'in yu a?

18 Ngwa biya' ti' Jesús sa ña'an cha' kuxi nda'an tiye ne' kan', kan' cha' mxkwen yu 'in ne':

—Kwiñi 'a wan ni. ¿Ni cha' lka nchkwi' biya' wan lo'o'ün a? —ndukwin Jesús 'in ne' kan'—.

19 Kwa'u wan ska tñi 'ñaǎn, ti kwi' ta'a tñi plata nu ndaan 'in ne' nu ndlo tñi kan'.

Bra kan' mdiyan lo'o ne' ska tñi plata kan' se'en ndi'in Jesús.

20 —¿Ti lka nkwin nga'an chun' tñi re? —ndukwin Jesús 'in ne' kan'—. ¿Ti lka ra nu ndukwa nin re? —ndukwin.

21 —Nin ree tlyu nu ndi'in xka la'a tsu', kan' nga'an chun' tñi kwa —ndukwin ne' bra kan'.

—Su'we —ndukwin Jesús bra kan'—, ta wan tñi nu ndi'in cha' ta wan 'in ree tlyu kan' sikwa; kwi' ngwaña'an, ta wan 'in Ndiöse nchga nan nu ndi'in cha' ta wan 'in Ni.

22 Yuwe 'a ti' ne' kan' bra kan', cha' nchka 'a 'in Jesús nchkwen 'in ne'. Mdo'o ne' ndyaa ne' bra kan'.

Mnicha' ne' 'in Jesús sa ña'an ka cha' bra nu tyu'u nten xiya'

23 Ti kwi' tsan kan' mdiyan chin' ne' saduceo se'en ndi'in Jesús, kan' lka ska ta nten nu nchkwi' cha' ja tyu'u 'a nten xiya' xa wa ngujwi ne'. Mnicha' ne' kan' cha' re 'in Jesús bra kan':

24 —Mstru —ndukwin ne' kan' 'in yu—, nu ngwa s'ni ytsa' ayman Moisés ska cha' 'ñaan cha' 'in ta'a ngula ne'. Bra wa ngujwi ska yu ki'yu, si wa mjwi kwilyo'o yu lo'o ti ji tyi'in sñi' yu, bra kan' ndiya tñan 'in ta'a ngula yu nu ndi'in ska ti, cha' kaja kwilyo'o yu lo'o nu kuna'an nu ngwa kwilyo'o ayman ta'a yu. Lo'o chkwi' ne' 'in sñi' nu kala kulo cha' sñi' yu ki'yu nu wa ngujwi kan' lka kuwi' kan', cha' ja kana' nin yu nu wa ngujwi kan' bra kan'. Ngwaña'an ykwi' Moisés nu ngwa s'ni.

²⁵ Lo'o ni, chkwi' ba sa ña'an ngwa ska ya': Ta'a kichen tyi ba wa mdi'in kati yu ki'yu ta'a ngula. Lo'o mjwi kwilyo'o nu ngula kulo kan', ndla 'a ngujwi yu bra kan', lo'o ja ya xu'wi sñi' yu lo'o kwilyo'o yu. Kan' nganun nu kuna'an kan' kwenta 'in ta'a ngula yu bra kan'.

²⁶ Kan' mjwi kwilyo'o nu kuna'an kan' xiya'. Kwi' ngwaña'an, ndla ti ngujwi xka yu ki'yu ta'a ngula ayman kan'. Kwi' ngwaña'an ngwa 'in ta'a kati yu kan'.

²⁷ Bra wa mdyii cha', ngujwi nu kuna'an kan'.

²⁸ Lo'o ni, bra nu tyu'u nchga ayman xiya', ¿ti ka nu ka kwilyo'o nu kuna'an kan'?, cha' ta'a kati ta'a ngula ne' mjwi kwilyo'o ne' lo'o.

²⁹ Mxkwen Jesús 'in ne' kan' bra kan':

—Ja ska cha' jlyo ti' wan, ja ya ka biya' ti' wan cha' nu nchkwi' kityi 'in Ndiose; ja nchka biya' ti' wan cha' nchka 'a 'in Ndiose ku'ni Ni nchga cha' tnun nu nchka ti' Ni.

³⁰ Bra nu tyu'u nchga ayman xiya', ja ndi'in cha' kaja kwilyo'o ne' bra kan'; tyi'in ne' sa ña'an ndi'in angajle se'en ndi'in Ndiose.

³¹ Chañi cha' ndi'in cha' tyu'u nchga ayman xiya'. ¿Ja ya chkwi' wan lo kityi se'en nchkwi' Ndiose lo'o wan a? Nde ndiya cha' nu nchkwi' kityi kan':

³² “Ndiose nu lka X'nan Abraham lkañ” ndukwin Ni, “Ndiose nu lka X'nan Isaac lkañ, lo'o ti kwi' Ndiose nu lka X'nan Jacob lkañ” ndukwin Ni. Ja ndukwin kityi cha' wa ngwa Ndiose X'nan ne' kan' bra nu mdi'in ti jyo'o kan' lo chalyuu; ti nka Ndiose X'nan ne' kan' ni, kwi' ngwaña'an ti nka Ndiose X'nan nchga nten nu lu'u.

³³ Bra wa ynan nten ka'an nu ndi'in nde kwa cha' nu ndu'u Jesús, yuwe 'a ti' ne' 'in cha' kan' bra kan'.

Tñan nu ndloo la 'ñaan cha' ku'nian cha' 'in Ndiose

³⁴ Xa wa ynan ne' fariseo cha' ja ngwa 'in ne' saduceo kan' kwiñilyo'o 'in Jesús, bra ti ndyo' ti'in nchga ne' fariseo kan' se'en ndi'in Jesús.

³⁵ Lo'o ndi'in ska ne' fariseo nu jlyo 'a ti' nchga cha' 'in Ndiose nu ngwa'an ayman Moisés. Mnicha' yu 'in Jesús cha' chkwi' biya' yu lo'o bra kan':

³⁶ —Mstru —ndukwin yu kan' 'in Jesús—, ¿ni sa ña'an lka cha' nu ndloo la 'ñaan cha' ku'nian, cha' nu ykwi' Ndiose lo'o ayman Moisés nu ngwa s'ni?

³⁷ Mxkwen Jesús 'in yu kan' bra kan':

—“Ndi'in cha' tyukwi ti tiye wan tyi'in cha' 'wan lo'o Ndiose nu lka X'nan wan; ndi'in cha' ka luwi kasiya 'wan, kwi' tyi'in cha' 'wan lo'o Ni lo'o nchga cha' tiya nu ndi'in ke wan.”

³⁸ Kan' lka cha' nu ndloo la 'ñaan lo'o Ni.

³⁹ Lo'o ndiya xka cha' nu ndloo 'a 'ñaan: “Ndi'in cha' chka t'nan ti' wan 'in ta'a nten wan, sa ña'an lka bra nu nchka t'nan ti' wan 'wan, ti ykwi' ti wan.”

⁴⁰ Tyukwaa cha' re lka suun nchga cha' nu ngwa'an ayman Moisés chabiya' 'in Ndiose, nchga cha' re lka suun nchga cha' 'in Ndiose nu ykwi' ne' lo'o nten nu ngwa s'ni.

Mnicha' Jesús 'in ne' cha' 'in Krixtu

⁴¹ Bra nu ti ndyo' ti'in nchga ne' fariseo kan' se'en ndi'in Jesús, mnicha' yu ska cha' 'in ne' bra kan':

42 —¿Ni sa ña'an nxke' ti' wan cha' 'in Krixtu nu ndi'in cha' kan? —ndukwin Jesús 'in ne' kan!—. ¿Ti lka nu ngwa ayman 'in Krixtu, nxke' ti' wan a?

—Nten ta'a ayman ree David ka nu kan! —ndukwin ne' 'in Jesús.

43 Mnicha' Jesús 'in ne' kan' xiya' bra kan':

—¿Ni sa ña'an lka cha' re, xke' ti' wan a?, cha' nu wa ykwi' ayman David cha' X'nan yu lka Krixtu kan'. Wa ngwa'u Tyi'i Ndiose cha' kan' 'in David, kan' cha' mjlyo ti' ree kan'. Nde lka cha' nu ykwi' ree kan' —ndukwin Jesús:

44 Ndiose nu nka X'naan ykwi' cha' re lo'o Krixtu nu nka X'naän:

“Tyukwaa chin' nde la'a se'en kwín 'ñaän, sa ña'an ya' nu ku'ni tyiïn cha' 'in nchga nu ti'í ti' 'iin, cha' nu'win kaa ndloo 'in nchga lo cha'”
ndukwin Ni 'in Krixtu.

45 X'naän, ykwi' ayman David 'in Krixtu. ¿Ta sa kan' ti nten ta'a ayman David ka Krixtu, xke' ti' wan a?

46 Ja tukwin ngwa jlyo ti' xkwen la 'in Jesús bra kan'. Chun' ndi'in la, ja mnicha' 'a ne' 'in yu, cha' ntsen ne' 'in yu, sa ña'an nu xkwen Jesús 'in ne'.

23

Mstya Jesús ki'ya 'in ne' fariseo lo'o mstru nu ndu'u cha' jo'o

1 Lo'o ykwi' Jesús lo'o nten ka'an nu ndi'in se'en ndi'in yu, lo'o ne' nu ngi'ni xa'an cha' 'in yu:

2 —Ne' fariseo kan', lo'o mstru nu ndu'u cha' jo'o ni' lyaa, jlyo ti' ne' kan' nchga cha' nu ngwa'an ayman Moisés lo kityi.

³ Kan' cha' ndi'in cha' kunan su'we wan cha' nu ndu'u ne' kan' 'wan, ndi'in cha' tukwa wan nchga cha' nu ndukwa lo kityi nu ndu'u ne' kan'; ska ti cha', ja ku'ni wan sa ña'an nu ngi'ni ne' kan', chun' ja la ndukwa ne' cha' kan' ni siya su'we 'a ndu'u ne' cha' jo'o.

⁴ Lo'o ne' fariseo kan', ndlo ne' tñan 'in ta'a nten ne' cha' tnun 'a yu'wa kwi'ya ne'. Ti'in 'a yu'wa nxya ne' fariseo kan' skun nten, lo'o ja ndlya' ne' yu'wa kan' siya' ti.

⁵ Nchga cha' nu ngi'ni ne' kan', ngi'ni ne' 'in ran cha' ña'an nten 'in ne'; kan' cha' nskan' ne' kan' kityi cha' 'in Ndiose ke ne', kwi' skun ne', cha' nchka ti' ne' cha' chkwi' nten cha' 'in ne' cha' kti 'a ngi'ni ne'. Kwi' nxiin ne' kan' piyun nu tnun 'a su, cha' ña'an nten 'in ne'.

⁶ Bra nu nda'an ne' kan' ska ta'a, xkwi' nan nchka ti' ne' tyukwa ne' se'en su'we la ña'an. Lo'o ni' lyaa, ti kwi' ti cha', nchka ti' ne' kan' tyukwa ne' se'en nu su'we la ña'an.

⁷ Kwi' ngwaña'an, bra nu tyukwa ta'a nten lo'o ne' kan' tuwiin, ndiya ti' ne' fariseo cha' su'we ti chkwi' nten lo'o ne', cha' ku'ni tnun nten 'in ne'; nchka ti' ne' cha' chkwi' nten cha' 'in ne', cha' mstru lka ne'.

⁸ 'Wan ni, ja su'we si chkwi' nten 'wan cha' mstru lka wan; su'we la si ska ti cha' nka tiye wan lo'o ta'a nten wan, cha' ska ti mstru nsu'wi 'wan, kan' lka Krixtu.

⁹ Kwi' ngwaña'an, ja ndi'in cha' chkwi' wan cha' sti wan lka ska nten chalyuu ti, cha' ska ti Ndiose nu ndi'in nde ni' kwan, kan' lka Sti wan.

¹⁰ Lo'o ja ta wan chabiya' 'in nten cha' chkwi' ne' cha' 'wan cha' x'nan ne' nka wan, cha' ska ti Krixtu

nka X'nan wan nu chañi.

¹¹ Ndi'in cha' ku'ni wan ña'aan tñan nu kulo ta'a nten wan 'wan, si chañi cha' ndloo la cha' 'wan ke ta'a nten wan.

¹² Nten nu nchka ti' cha' ka tnun la, ti ykwi' ti, ke ta'a nten, ndi'in cha' ka jyu'u ti' ne' nde loo la; lo'o nten nu ja siye' lo'o ta'a nten, nu ja nchka ti' tyijin lyo 'in ta'a nten, kan' lka nu chañi cha' ka tnun la cha' 'wan.

¹³ 'iT'nan 'a 'wan mstru nu ndu'u cha' jo'o, lo'o 'wan ne' fariseo, cha' tukwa cha' nda'an tiye wan! Nan ndukun' ti wan tuwiin 'in nten, cha' ja ka sten ne' cha' 'in Ndiose, cha' ja ka Ndiose ndloo la ni' kasiya 'in ne'. 'Wan ti ykwi' ti wan, ja xlyaa wan sten wan cha' kan', lo'o ja nda wan chabiya' cha' sten xka la nten cha' kan'.

¹⁴ 'iT'nan 'a 'wan mstru nu ndu'u cha' jo'o, lo'o ngwaña'an 'wan ne' fariseo, cha' tukwa cha' nda'an tiye wan! Ndlaa wan na'an tyi nu kuna'an ti'i, lo'o chan nchkwi' wan lo'o Ndiose se'en ndi'in nten cha' ña'an nten 'wan bra kan'. Ja ka biya' ti' xka la nten ña'aan cha' kuxi nu nsu'wi ni' kasiya 'wan bra kan', nxke' ti' wan. Kan' cha' lye 'a ta Ndiose nu ti'í 'wan nde loo la.

¹⁵ 'iT'nan 'a 'wan mstru nu ndu'u cha' jo'o, lo'o 'wan ne' fariseo, cha' tukwa cha' nka tiye wan! Tijyu' 'a nda'an wan tuwiin nde xka chalyuu, kwi' tuwiin ndijin wan tujo'o, cha' tsaa naan wan 'in nten; tsaa naan wan ni siya ska ti nten nu xlyaa kulaa ya' 'in xka la jo'o nu ngi'ni tnun yu 'in, cha' xñi yu cha' nu kwa'u wan 'in yu. Lo'o cha' nu kwa'u wan 'in yu ku'ni wan cha' lye la ka yu sñi' kune' xa'an ke 'wan, 'wan nu ndi'in cha' tsaa wan lo jwlyaa.

16 ꞑT'nan 'a 'wan! Nan wa nchka ti' wan kwa'u wan 'in xka la nten, lo'o kwityiin' 'a wan, cha' ja la ndi'ya wan kwenta. Ndiya ya' nchkwi' wan: “Bra nu skan' nten ska cha' 'in ne' lo'o kulo naan ne' 'in laa tnun re, cha' ku'ni ji ne' ska tñan, ja ska cha' lka ran” nchkwi' wan. “Lo'o bra nu skan' ne' ska cha' lo'o ta'a nten ne', lo'o kulo naan ne' 'in nan oro nu nsu'wi ni' lyaa cha' ku'ni ne' tñan kan', kan' ndi'in cha' ku'ni ji ne' nchga tñan nu ykwi' ne'” ndukwin wan.

17 ꞑMna' cha' tiya 'wan, kwityiin' 'a wan! ꞑNi nan lka nu ndloo la cha' 'in, nxke' ti' wan? ꞑTa tlyu la cha' 'in nan oro nu nsu'wi ni' lyaa kan' a? ꞑO ta tlyu la cha' 'in laa tnun se'en nsu'wi nan oro kan', nxke' ti' wan a? Ska ña'an ti lka tyukwaa cha' kan'.

18 Lo'o ndiya ya' nchkwi' wan xka cha' re: “Bra nu skan' nten ska cha' lo'o ta'a nten ne', lo'o kulo naan ne' 'in msaa nu nduun ni' lyaa re, cha' ku'ni ji ne' ska tñan, ja ska cha' lka ran” ndukwin wan. “Lo'o bra nu skan' ne' cha' lo'o ta'a nten ne', lo'o kulo naan ne' 'in lomstan nu nxytya ne' lo msaa kan', cha' ku'ni ne' ska tñan, kan' ndi'in cha' ku'ni ji ne' nchga tñan kan'” ndukwin wan.

19 ꞑChañi cha' kwityiin' wan! ꞑNi nan lka nu ndloo la cha' 'in, nxke' ti' wan? ꞑTa tlyu la cha' 'in lomstan kan' a? ꞑO ta tlyu la cha' 'in msaa se'en ndukwa lomstan kan', nxke' ti' wan a? Ska ña'an ti lka tyukwaa cha' kan';

20 kan' cha' bra nu skan' ne' ska cha' chabiya' 'in msaa kan', su'wa nskan' ne' cha' chabiya' 'in nan nu ndukwa lo msaa kan'.

21 Ti kwi' ti cha', bra nu skan' ne' ska cha' chabiya' 'in laa tnun re, su'wa nskan' ne' cha' chabiya' 'in Ndiose, cha' lo'o ni' lyaa kan' ndi'in

Ndiose.

²² Bra nu skan' ne' ska cha' chabiya' 'in ska nan nu ndi'in nde ni' kwan, su'wa nskan' ne' cha' kan' chabiya' 'in se'en tlyu se'en ndi'in Ndiose, ti kwi' chabiya' 'in Ndiose lka cha' kan' —ndukwin Jesús 'in ne'.

²³ 'iT'nan 'a 'wan mstru nu ndu'u cha' jo'o, lo'o 'wan ne' fariseo, cha' tukwa cha' nsu'wi tiye wan! Kti 'a ngi'ni wan tloo Ndiose lo'o nchga nan xuwe ti nu nsu'wi 'wan; bra nu nsu'wi tii lka' kanun' xlya 'wan ni, bra ti nda wan ska 'in Ndiose bra kan', ta nxin, ta mta komino, kwi' ngwaña'an ngi'ni wan. Lo'o cha' nu ngwa'u Stian Ndiose, nu ndloo la 'wan cha' ku'ni wan, ja la nduwe ti' wan cha' kan'. Wa ykwi' Ndiose cha' ku'ni biya' ñi wan 'in nten, cha' chka t'nan ti' wan 'in nten, cha' tsaá ña'an su'we ti' wan 'in Ni; lo'o ja nnan wan cha' kan'. Ndi'in cha' tukwa wan cha' nu ndloo la kan', ni siya ti ku'ni wan cha' su'we sa ña'an nu ngi'ni ti wan bra nu nda wan lomstan xuwe ti kan'.

²⁴ Nchka ti' wan kwa'u wan cha' 'in Ndiose 'in xka la nten; lo'o kwityiin' wan, cha' nchkun' ke wan 'in nchga cha' nu ñi kan'. Sa ña'an lka si nsuwi wan tyi'a cha' ko'o wan, cha' ja ko'o wan 'ni xuwe nu nsu'wi lo tyi'a kan', lo'o ja ngi'ni wan kwenta ni siya wa yi'o wan ska 'ni tnun, ña'an ti' ska camello —ndukwin Jesús 'in ne'.

²⁵ 'iT'nan 'a 'wan mstru nu ndu'u cha' jo'o, lo'o 'wan ne' fariseo, cha' tukwa cha' nsu'wi tiye wan! Su'we 'a njya'an wan tloo wan, njya'an wan chun' wan, ña'an ti' ngaten ska sa, ngaten ska ka'nan; lo'o ni' kasiya 'wan xkwi' cha' kuxi nsu'wi, cha' nchka ti' wan kulaa wan nan nu nsu'wi 'in xka la nten, cha' nxitukwi ti' wan nan nsu'wi 'in nten.

²⁶ ;Nan kwityiin' wan, 'wan ne' fariseo! Kulo ku'ni luwi wan ni' kasiya 'wan, ti ykwi' ti wan, cha' kanun luwi tyukwi ña'aan wan bra kan', ña'an ti' ska sa, ska ka'nan nu wa ngaten —ndukwin Jesús 'in ne'.

²⁷ ;T'nan 'a 'wan mstru nu ndu'u cha' jo'o, lo'o ngwaña'an 'wan ne' fariseo, cha' tukwa cha' nka tiye wan! Ña'an ti' ska kwaa nu ngwa tkan' cha' y'ni ngaten ne' 'in ran, cha' ka su'we 'a ña'an kwaa kan' bra kan', ngwaña'an lka wan. Xkwi' tijyan ayman nsu'wi ni' kwaa kan', xkwi' nan tukun tyi'i nsu'wi kan'.

²⁸ Kwi' ngwaña'an 'wan ni, su'we 'a ña'an chun' wan, ñi 'a ngi'ni wan, nxke' ti' nten; lo'o bra nu ña'an Ndiose ni' wan, tukwa cha' nka tiye wan, kuxi 'a cha' nu nsu'wi ni' kasiya 'wan, nxke' ti' Ndiose bra kan' —ndukwin Jesús 'in ne'.

²⁹ ;T'nan 'a 'wan mstru nu ndu'u cha' jo'o, lo'o 'wan ne' fariseo, cha' tukwa cha' nka tiye wan! Su'we 'a ña'an na'an xuwe nu nñan wan chun' kwaa se'en mtsi' ayman nu wa yan ykwi' cha' 'in Ndiose lo'o nten nu ngwa s'ni, lo'o su'we 'a ngi'ni tkan' wan kwaa se'en mtsi' ayman nu su'we tiye nu ngwa s'ni.

³⁰ “Kuxi 'a y'ni ayman 'wa nu ngwa s'ni” ndukwin wan. “Si wa ndi'in ba lo chalyuu nu ngwa bra kan', ja lo'o ba kujwi ba 'in ne' nu ykwi' cha' 'in Ndiose lo'o nten kan'” ndukwin wan.

³¹ Jlyo ti' wan cha' lka wan ti kwi' ta'a nten lo'o ayman 'wan nu wa yjwi 'in ne' nu ykwi' cha' 'in Ndiose lo'o nten nu ngwa s'ni; lo'o ti kuxi tiye wan ni, sa ña'an nu kuxi tiye ayman 'wan nu ngwa s'ni bra kan'.

32 ¡Su'we sikwa! ¡Ti ku'ni la wan cha' kuxi nu y'ni ayman 'wan nu ngwa s'ni! —ndukwin Jesús 'in ne'.

33 ¡Ña'an ti' kunan, ngwaña'an nchka ti' wan! Sa 'a ngi'ni wan cha' kuxi. ¿Ta nxke' ti' wan cha' kulaa Ndiose 'wan, cha' ja kaja nu ti'í 'wan lo jwlyaa a? Ja ka 'wan ngwaña'an.

34 Kan' cha' ti su'waän 'in nten 'ñaän cha' tsa se'en ndi'in wan, nten nu nchkwi' cha' 'ñaän, nten nu jlyo ti' cha' 'ñaän, lo'o mstru nu ku'ni tñan 'ñaän. Jlyo tiän' cha' xa'an 'a wan; kujwi wan 'in chin' nten kan', jwi'in ka'an wan 'in chin' ne' kan' lo wsi, xka ta ne' kan' jwi'in wan lo'o ti su ni' lyaa 'wan. Kuxi 'a ku'ni wan lo'o ne' kan', sa ña'an ya' nu kulo wan 'in ne' kan', cha' ja la kanun ne' kichen tyi wan.

35 Kan' cha' sikwa, kanun ki'ya 'wan si'ya ayman 'wan nu wa yjwi 'in ka'an 'a nten nu ykwi' cha' nu ñi nu ngwa ti s'ni, ti bra nu ngujwi Abel ti kulo la, sa ña'an ya' nu ngujwi Zacarías sñi' Berequías. Ayman Zacarías ni, wa yjwi ne' 'in yu se'en nduun yu ni' lyaa, tu'wa msaa se'en nchkin lomstan, bra nu wa tsa ti yu ni' ña'an se'en kti 'a cha' 'in Ndiose. Su'wa lka cha' sa ña'an lka si wa yjwi wan 'in ayman kan', chun' ti kwi' ti cha' kuxi kan' nka tiye wan ni.

36 Chañi cha' nu nchkwiin' lo'o wan ni, cha' ja ya kaja wan xa nu tlyu 'a cha' kuxi ka 'wan, ne' nasiyun re, si'ya ki'ya tnun nu ndukwi wan —ndukwin Jesús 'in ne'.

Ynan 'a Jesús si'ya kichen Jerusalén

37 ¡T'nan 'a wan ne' Jerusalén! ¡Tukwi 'a cha' nsu'wi 'wan! Ti s'ni 'a ndujwi wan 'in nten nu

ndya'an tñan 'in Ndiose, nji'in wan kee 'in ne' nu nchkwi' cha' 'in Ni. Tyun 'a ya' ngwa tiän' ña'ansiin 'wan cha' ja ka kuxi 'wan. Ña'an ti' ska kwitu nu nxo' ti'in 'in sñi' ni' jlu'we, ngwaña'an ngwa tiän' ku'niin lo'o wan; lo'o ja la nda wan chabiya' 'ñaän.

³⁸ Kan' cha' xi'in 'a kanun kichen tyi wan ni.

³⁹ Chañi cha' nu nchkwiin' lo'o wan ni, cha' ja ña'an 'a wan 'ñaän sa ña'an ya' nu chkwi' wan cha' re 'ñaän: “Su'we 'a ngi'ni Ndiose lo'o nten nu ndijyan chabiya' 'in ti kwi' Ni nu nka X'naan” nchkwin wan bra kan'.

24

Wandla ti katin laa tnun

¹ Chun' ndi'in la mdo'o Jesús chun' laa tnun kan'; wa tyaa ti yu, lye 'a ykwi' ne' nu ngi'ni xa'an cha' 'in yu lo'o yu cha' 'in laa tnun kan', cha' su'we 'a ña'an nchga na'an nu kwenta 'in laa kan'.

² Mxkwen Jesús 'in ne' kan' bra kan':

—Ña'an su'we wan nchga cha' nu nsu'wi laa tnun re —ndukwin Jesús 'in ne' kan'—. Chañi cha' nu nchkwiin' lo'o wan ni, cha' tyii laa re katin ran lo'o ja ska 'a kee nu nsu'wi si' laa re kanun ran chun' ta'a ran.

Nu ti'í nu ka xa nu tsaa tii chalyuu

³ Lo'o kan' ndyaa ne' lo ki'ya nu naan Olivos bra kan'. Nde kwa ndyaa tukwa Jesús. Mnan ti ykwi' ne' nu ngi'ni xa'an cha' 'in yu lo'o yu bra kan', mnicha' ne' 'in yu:

—Katsaa' 'wa, ¿ni ña'an bra ka cha' kuxi kan' 'in laa tnun re? Kwi' ngwaña'an, ¿ni sa ña'an ka cha'

bra nu tyaan xiya', xa nu tyii chalyuu? —ndukwin ne' kan' 'in yu.

⁴ Ti ngwa'u la Jesús 'in ne' bra kan':

—Ndi ti ti' wan tyi'in wan, ki'ya wan kwenta cha' ja tukwin kwiñi lyo'o 'wan —ndukwin yu—.

⁵ Nde loo la kan tyun nten kwiñi nu chkwi' cha' chabiya' 'ñaän ndijyan ne'. “Krixtu lkaän” nchkwin ne' kan' 'wan, cha' kwiñi lyo'o ne' 'in ka'an 'a nten nu tsaa ña'an ti' cha' nu chkwi' ne'.

⁶ Kan' kanen cha' nxuun ne' nasiyun re lo'o ne' xka nasiyun, kwi' ngwaña'an kaja cha' 'wan cha' nxuun ne' nasiyun tijyu'. Ja kutsen wan bra kan'. Ndi'in cha' ka ngwaña'an, xa nu ti ji tyii chalyuu bra kan'.

⁷ Xuun ta'a nten re lo'o ne' xka la'a tsu', kwi' ngwaña'an xuun ta'a nten ska kichen tnun lo'o ne' xka kichen tnun. Kan' ka jwi'ñan 'in ne', kan kicha nu xñi 'in nchga nten, kwi' lye 'a kiñan chalyuu bra kan'.

⁸ Nchga cha' kan' ka bra nu tyisnan ti ta Ndiose nu ti'í 'in nten chalyuu, si'i cha' wa mdyii chalyuu bra kan'.

⁹ 'Bra nu tyisnan cha' kuxi kan' ni, xñi ne' 'wan cha' ta ne' nu ti'í 'wan; chka ti' ne' kujwi ne' 'wan, cha' ndiya ne' ña'aan chalyuu nu ka ti'í ti' 'wan cha' 'ñaän.

¹⁰ Kan' cha' tyun ne' ta'a wan ka ndaja ti' ne' lo'o'ün, ja talo 'a ne' cha' ndyaa ña'an ti' ne' cha' 'ñaän bra kan'. Kwi' ngwaña'an, ndiya ne' ta'a wan nu kujwi' xu'wa ne' 'in ta'a wan ya' ne' xa'an, kwi' ndiya nu ka ti'í ti' 'in ta'a wan bra kan'.

¹¹ Kwi' ngwaña'an, tyo'o tukwa ka'an ne' kwiñi, nu chkwi' cha' 'in Ndiose, nchkwin ne'. Kwiñi

lyo'o ne' kan' 'in tyun ne' ta'a wan, nu lka wan nten 'ñaän.

¹² Ka'an 'a cha' kuxi ka, nu ku'ni cha' ja chka t'nan ti' wan 'in ta'a nten wan.

¹³ Lo'o ja kuwe ti' wan, nchga wan nu talo wan chan 'in cha' kuxi kan', kulaän 'wan bra kan', xa nu wa tyii chalyuu —ndukwin Jesús—.

¹⁴ Ndi'in cha' kwa'u wan cha' 'ñaän 'in nten, nchga cha' su'we nu nchkwiin', sa ña'an ka bra nu lka Ndiose ndloo ni' kasiya 'in nten; ndi'in cha' chkwi' wan cha' kan' lo'o nten ña'aan chalyuu, cha' ka biya' ti' ne' nchga nasiyun cha' kan'. Kan' tyii chalyuu bra kan' —ndukwin Jesús 'in ne'—.

¹⁵ 'Ayman Daniel nu ykwi' cha' 'in Ndiose lo'o nten ti s'ni, wa ykwi' yu cha' 'in ska nkwin nu kuxi 'a, ska nan nu ku'ni ñu'un 'in nchga nan nu luwi. —Ka biya' ti' wan cha' kan', bra nu chkwi' wan lo kityi re—. Bra nu ña'an wan cha' nduun nkwin nu kuxi kan' nde se'en kti 'a ni' lyaa tnun kan' —ndukwin Jesús—,

¹⁶ ka biya' ti' wan bra kan' cha' su'we la si xnan nchga wan nu ndi'in lo yuu 'in Judea re, xnan lya wan cha' xu'wi kutsi' wan lo ki'ya.

¹⁷ Nten nu nduun ke na'an 'in ne' tsan kan', ja laa 'a ne' sten ne' ni' ña'an cha' kulo ne' su'wa ne'; ndi'in cha' ki'ya ne' kan' lyuu ndla, cha' xnan ne' bra ti.

¹⁸ Kwi' ngwaña'an nten nu ndi'in ni' kixin' ni, ja laa 'a ne' xitukwi ne' tyaan ne' na'an tyi ne', cha' tyaan y'ya ne' te' kichan' 'in ne'; ndi'in cha' xnan ne' ndla bra kan'.

¹⁹ ;T'nan 'a nu kuna'an tnan bra nu tiya tsan kan'! ;T'nan 'a nu kuna'an nu nsu'wi kuwi' kune' nu ti ngati' 'in bra kan'!

20 Su'we la jñan wan cha' 'in Ndiose, cha' ja ndi'in cha' xnan wan bra nu tiya tsan nu ka tlya'; kwi' jñan wan cha' 'in Ni cha' ja ndi'in cha' xnan wan tsan ta'a nu nxitña' ne'.

21 Bra nu ndi'in cha' xnan wan ni, kan' lye 'a tyijin nten chalyuu nu ti'í. Ja ya tyijin nten nu ti'í ngwaña'an, ti bra nu ngwiñan Ndiose chalyuu sa bra ni; lo'o ngwaña'an, ja tyijin 'a nten nu ti'í ngwaña'an nde loo la.

22 Wa ykwi' Ndiose cha' chin' ti tsan tyijin ne' nu ti'í ngwaña'an; si chan talo tyempu kuxi kan', ja ska 'a nten chalyuu tyo'o laa ne' bra kan'. Lo'o ku'ni Ni cha' chin' ti tsan talo tyempu kuxi kan', cha' chka t'nan 'a ti' Ndiose ña'an Ni 'in nten 'in Ni.

23 'Xa nu tiya bra kan', si chkwi' nten: “Ña'an wan nde re, nde wa ngala Krixtu”, ja kunan wan cha' kwiñi nu nchkwi' ne' kan'. Ti kwi' ti cha', si ndiya nten nu chkwi' cha' re: “Wa ngala Krixtu kichen kwa”, ja kunan 'a wan bra kan',

24 cha' Krixtu kwiñi ka yu kan'. Kwi' ngwaña'an, tyo'o tukwa ne' kwiñi nu chkwi' chabiya' 'in Ndiose, nchkwin ne'; kwiñi ti ku'ni ne' kan' cha' tnun cha' kuwe 'a ti' nten. Lo'o ku'ni ne' kwiñi kan' ngwaña'an, cha' nchka ti' ne' ku'ni ne' kanan 'wan lo'o 'in nchga nten nu wa ngulo suwi Ndiose 'in.

25 Wa ytsaän' cha' kan' 'wan ni, xa nu ti ji ti ka cha' kuxi kan',

26 cha' ja tukwa 'a wan cha' 'in ne' si chkwi' ne' cha' re lo'o wan: “Tsaan se'en ndi'in Krixtu, cha' ndi'in yu ni' kixin' kwa ni.” Ja tsaa wan lo'o ne' bra kan'. Lo'o ja kunan wan si chkwi' ne' cha' re lo'o wan: “Mnan ti ndi'in yu ni' ña'an kwa ni.” Ja xñi wan cha' nu chkwi' ne' kan' siya' ti.

²⁷ Sa ña'an lka nxyti xaa ndyuwi ña'aan ni' kwan, cha' ña'an nchga nten 'in ran, ngwaña'an ka xa nu tiyaän xiya', na' nu wa msu'wa Stiin 'ñaän cha' ndijyaän cha' kaän nten.

²⁸ Kunan wan cha' re: La se'en ndi'in nan tukun, la kan' ki'ya laxu bra kan'.

Sa ña'an ka bra nu kaän xiya', na' nu wa ndijyaän cha' kaän nten

²⁹ 'Xa nu wa mdyii tsan nu ndi'in cha' ka nu ti'í 'in ne', bra ti ka tla lo kwichaa, kwi' ngwaña'an ja ka xaa lo ko' bra kan'. Kalu kwii kulasiin nu ndukwi ni' kwan la lyuu; kwi' ngwaña'an, kiñan nchga nan nu nsu'wi ni' kwan.

³⁰ Tyo'o tukwa biya' nu xtyaän ni' kwan bra kan', na' nu wa msu'wa Ndiose 'ñaän ndijyaän cha' kaän nten. Lye 'a ka xi'in ti' nchga nten chalyuu nu ndi'in nchga kichen, kunan ne' bra kan'. Lo'oün nu wa ndijyaän cha' kaän nten ni, ña'an ne' 'ñaän cha' ndijyaän laja koo nu ngaten 'a; tnun 'a cha' ka bra kan', cha' lo'o nchga chabiya' 'ñaän kaän.

³¹ Bra nu lye kanen kuwi, bra kan' kuloün tñan 'in ka'an 'a angajle 'ñaän cha' tsaa xo' ti'in 'in nchga nten nu wa ngulo suwi Ndiose 'in; tyo'o ne' kan' la se'en ndi'in nten ña'aan chalyuu kan ne' tloo Ni bra kan'.

³² 'Ndiya ska cha' nu ka ku'ni xa'aan, bra nu ña'aan ska yka, ni siya yka nstin, ni siya xka la yka kwiñii. Bra nu tyisnan tyukwa nstin, bra kan' tyo'o tukwa kuten yka kan'; jlyo tian' cha' wa ndla ti ki'ya tyoo bra kan'.

³³ Kwi' ngwaña'an, bra nu ña'an wan tyo'o tukwa nchga nan nu ykwiin' lo'o wan tsan, bra kan' ka biya' ti' wan cha' wa ndla ti tyii cha' re.

34 Chañi cha' nu chkwiiñ' lo'o wan ni, cha' ja ya kaja nchga nten nu nsu'wi chalyuu ni, bra nu ka cha' nu wa ykwiñ' tsan.

35 Tyii nchga nan nu nsu'wi ni' kwan, tyii chalyuu re, lo'o ja tyii siya' ti cha' nu nchkwiiñ' re, cha' xkwi' chañi lka cha' nchkwiiñ' —ndukwin Jesús 'in ne'.

36 'Tsan kan', ja tukwin ka jlyo ti' ni tsan ka, ni bra ka kan'; ja jlyo ti' angajle, kwi' na' nu lkañ ska ti nu lka Sñi' Ndiose, ja jlyo tiñ'. Ska ti Stiñ Ndiose jlyo ti' Ni cha' kan'.

37 'Sa ña'an ngwa bra nu mdi'in ayman Noé chalyuu ti s'ni, ngwaña'an ka tsan nu kañ na' nu wa msu'wa Ndiose 'ñañ ndijyañ cha' kañ nten; ja ka biya' ti' nten ni tsan ka cha' kan'.

38 Sa ña'an ngwa cha' 'in Noé kan' bra nu ja ya ki'ya tyoo tlyaa, ngwaña'an ka tsan kan'. Sa ña'an nu y'ni nten chalyuu s'ni: y'ni ne' ta'a, yku ne', yi'o ne', mjwi kwilyo'o ne'; ja ska cha' yuwe ti' ne' siya' ti, sa ña'an bra nu yten Noé kan' ni' yka na'an 'in yu.

39 Ja mgii 'a ti' ne' bra nu mdyisnan ngwi'ya tyoo tlyaa. Lo'o mdyii cha' 'in nchga ne' kan', cha' ja ynan ne' cha' nu ykwi' Ndiose. Kwi' ngwaña'an ka tsan nu kañ na' nu wa msu'wa Ndiose 'ñañ cha' ndijyañ cha' kañ nten, ja kii 'a ti' ne' ni tsan ka kan'.

40 Tsan kan', bra nu nda'an tukwa nten ni' kixin' cha' ku'ni tñan, bra kan' tyaa lo'o angajle 'in ska yu kan', kanun xka yu bra kan';

41 kwi' ngwaña'an tsan kan', bra nu ndi'in tukwa nu kuna'an ska ti ni' ña'an cha' koo ne', bra kan' tyaa lo'o angajle 'in ska ti ne', kanun xka ne' bra

kan' —ndukwin Jesús 'in ne'—.

⁴² Kan' cha' ndii ti ti' wan tyi'in wan, cha' ja jlyo ti' wan siya' ti ni tsan ka nu kan ti kwi' nu nka X'nan wan.

⁴³ Ña'an ti' ska x'nan na'an, si wa ngii ti' yu ni bra ngwa tla kan nten nu ku'ni kunan na'an tyi yu, ja chan ndii ti ti' yu ndi'in yu na'an tyi yu bra kan', cha' ja ta yu chabiya' sten nu ku'ni kunan kan' ni' ña'an tyi yu.

⁴⁴ Kan' cha' nchga tsan ndi'in cha' ndii ti ti' wan tyi'in wan lo chalyuu, cha' ja chan bra ti tyo'o tukwaän kaän, na' nu wa msu'wa Ndiose 'ñaän ndijyaän cha' kaän nten. ¿Ni sa ña'an ku'ni wan si ja ndi'in wan ndii ti ti' wan bra kan'? —ndukwin Jesús 'in ne'—.

Cha' 'in msu su'we lo'o msu xa'an

⁴⁵ ¿Ta ndiya nten 'wan nu tyukwi ti tiye nchka ti' ku'ni tñan 'ñaän a? Nde lka cha' nu ku'ni wan sikwa: Ska msu nu su'we ni, ta x'nan yu tñan 'in yu cha' ka yu ndloo ni' ña'an 'in x'nan yu; kulo x'nan yu tñan 'in yu cha' xku yu 'in nchga nten nu ndi'in ni' ña'an kan', ni siya ja ndi'in x'nan ne'.

⁴⁶ Su'we 'a ka tiye msu kan' bra nu kan x'nan yu xiya', si chañi cha' ti ngi'ni yu tñan nu wa ngulo x'nan yu 'in yu.

⁴⁷ Chañi cha' nu nchkwii'n' lo'o wan ni, cha' tlyu la tñan ta x'nan yu 'in msu kan', cha' ka yu ndloo 'in nchga tñan nu nsu'wi 'in x'nan yu bra kan'.

⁴⁸ Ska msu nu ndaja ti' ni, nsu'wi tñan nu ngulo x'nan yu 'in yu, lo'o ja nduwe ti' yu. “Ja kan ndla x'naän” nxke' ti' yu, kan' cha' bra ti ki'ya ska cha' kuxi ke yu.

49 Kan' tyisnan yu ku'ni yu cha' chen ña'an, ku'ni tlá yu 'in ta'a msu yu; tsaá yku yu, tsaá yi'o yu lo'o ta'a ku'wi yu bra kan'.

50 Lo'o kan' kan x'nan msu xa'an kan' ska tsan nu ja ndii ti' yu kan', cha' ja jlyo ti' msu kan' sa ña'an bra tyo'o tukwa x'nan yu xiya'.

51 Lye 'a ta x'nan yu nu ti'í 'in yu kan' bra kan', sa ña'an ya' nu kaja yu. Kulo x'nan yu tñan 'in yu, cha' tsaá yu lo' jwlyaa se'en ja tyii cha' tyijin ne' nu ti'í. Lye 'a xi'ya ne', kwi' lye 'a ku li'ya ne' cha' kasin' ti' ne'. Su'wa ti tsaá yu lo'o ne' kwiñi nu tukwa cha' nka tiye —ndukwin Jesús—.

25

Cha' 'in tii nu kuna'an kune'

1 'Chkwiñin' ska cha' tiya lo'o wan cha' ka biya' ti' wan sa ña'an ka bra nu ka Ndiose ndloo ni' kasiya 'in nten: Ndiya tii nu kuna'an kune', ndyaa ne' na'an tyi ska nu kuna'an nu ka kuxiin 'in nten. Nsu'wi candil 'in ta'a tii ne', cha' ndi'in ta ne' 'in nu kaja kwilyo'o ne'.

2 Ja ska cha' nduwe ti' ki'yu nu kuna'an kan', lo'o xa ti'yu nu kuna'an kan', su'we 'a cha' nda'an tiye ne'.

3 Nu kuna'an nu ja nduwe ti' kan' ni, ja lo'o sete cha' xu'wi ni' candil ndi'ya ne' nda'an ne', cha' ta la xaa 'in ne'.

4 Lo'o xa ti'yu nu kuna'an nu su'we ti' nda'an cha' tiye kan', lo'o candil 'in ne' nda'an ne', lo'o se'en nsu'wi sete 'in ne' nda'an ne'.

5 Chan 'a mdi'in ta ne' 'in nu ki'yu nu ka kwilyo'o ne'; ngwi'ya sla ne', yija' ne' bra kan'.

⁶ Jlu'we tla siya' ti ynen msi'ya ska nten: “Wa ndijyan yu nu ka kwilyo'o kuxiin re ni” ndukwin. “Tyo'o lya wan nde chun' na'an cha' tsa'a wan tuwiin loo yu, cha' tyaan lo'o wan 'in yu ni' ña'an re.”

⁷ Bra ti mxaa ti' nchga nu kuna'an kan' bra kan', msi'yu ne' juun nu ndukwa lo candil 'in ne', lo'o wa su'wa ti ne' xka ta sete ni' candil kan'.

⁸ Bra kan' ndyu'wi ti' nu kuna'an nu ja nduwe ti' kan' 'in sete 'in. ¿La nde kaja sete ni a? Bra kan' mjñan ne' sete 'in ta'a ne': “Ta wan chin' sete 'wa, cha' wa tyuwi' ti candil 'wa” ndukwin ne' nu ja nduwe ti' kan'.

⁹ “Sete nu ndi'ya wa, ja tyo'o skwa cha' xu'wi ni' candil 'ñaan ta'aan” ndukwin nu kuna'an nu su'we nda'an cha' tiye kan'. “Su'we la yaa lya wan tiyenta cha' xi'i wan ti chin'.”

¹⁰ Bra nu ndyaa nu kuna'an nu ja nduwe ti' kan' xi'i la ne' ti chin' sete, bra kan' mdiyan yu nu kaja kwilyo'o kan'. Nu kuna'an nu wa lka y'ni xu'we candil 'in ne', ndyaa ne' ni' ña'an tyi kuxiin lo'o yu nu ka kwilyo'o kan', cha' ku ne' se'en ndi'in; bra ti nchkun' tuna'an kan'.

¹¹ Chun' ndi'in la chin' mdiyan nu kuna'an nu ja nduwe ti' kan'. “¡Wa mdiyan bare ni!” ndukwin ne'. “¡Slaa lya wan tuna'an cha' sten ba se'en ndi'in wan kwa!” ndukwin ne' 'in yu nu kaja kwilyo'o kan'.

¹² Bra kan' mxkwen yu 'in nu kuna'an nu ja nduwe ti' kan': “Ja nsu'wi lyoñ 'wan siya' ti, ja jlyo tiñ' ti ka nu lka wan” ndukwin yu nu ka kwilyo'o kan' 'in ne' bra kan'.

¹³ Ti ykwi' la Jesús ti chin' lo'o ne' bra kan':

—Kan' cha' ndii ti ti' wan tyi'in wan nchga bra,

cha' ja jlyo ti' wan ni tsan, ni bra kaän xiya', na' nu wa msu'wa Ndiose 'ñaän ndijyaän cha' kaän nten.

Cha' 'in snan msu nu mda x'nan tñi 'in

¹⁴Lo'o ni, chkwiiin' ska cha' tiya lo'o wan, cha' ka biya' ti' wan sa ña'an ka bra nu ka Ndiose ndloo ni' kasiya 'in nten: Ndiya ska yu kuliya', lo'o wa tsaa ti yu tijyu', kan' cha' msi'ya yu 'in nchga msu 'in yu, cha' kan ne' se'en ndi'in yu. Kan' mxnun x'nan ne' chin' tñi 'in nchga msu bra kan', cha' ku'ni ne' tñan lo'o tñi cha' 'in yu kuliya' kan'.

¹⁵'Lo'o kan' mda yu kuliya' kan' ki'yu mi tñi plata 'in msu nu mdiyan kulo, kwi' mda yu tukwa mi 'in xka msu, kwi' mda yu xka mi ti 'in xka msu kan', cha' jlyo ti' x'nan ne' ti ka msu nu ka la 'in ku'ni tñan lo'o tñi kan'. Chun' ndi'in la mdo'o x'nan ne', ndyaa tijyu' bra kan'.

¹⁶Bra ti ndyaa msu nu nsu'wi ki'yu mi tñi plata 'in, ngwi'ya yu yu'wa lo'o tñi kan'. Bra wa yjwi' yu yu'wa kan', y'ni yu kanan xa ti'yu mi tñi plata 'in yu.

¹⁷Kwi' ngwaña'an y'ni xka msu nu nsu'wi tukwa mi tñi plata 'in, y'ni yu kanan tyukwa mi tñi plata.

¹⁸Msu nu nsu'wi ska mi ti tñi plata 'in yu, ngulu yu ska tiyuu, lo'o ni' yuu kan' msu'wa kutsi' yu tñi 'in x'nan yu bra kan'.

¹⁹X'ni yaa x'nan msu kan', chun' ndi'in la ngala yu na'an tyi yu xiya'. Msi'ya yu 'in nchga msu 'in yu bra kan', cha' tyan ne' se'en ndi'in yu, cha' ka biya' ti' x'nan ne' sa ña'an tñan y'ni ne' lo'o tñi kan'.

²⁰Kulo mdiyan msu nu mda x'nan ki'yu mi tñi plata 'in. “X'naän” ndukwin msu kan', “mdaa ki'yu mi tñi 'ñaän, lo'o ni, wa mjwi xa ti'yu mi tñi 'ñaän, cha' wa y'niin tñan lo'o tñi kan' 'iin.”

21 “Su'we 'a tñan nu y'nii” ndukwin x'nan msu kan' 'in yu. “Ska msu su'we lkaa, cha' su'we 'a ndukwaa cha' 'ñaän. Ska tñan xuwe ti mdaän 'iin nu ngwa xkan'; nu ka nde loo la taän xka tñan nu tlyu la cha' ku'nii. Su'wa ti tyi'iin se'en ndi'iin, cha' su'wa ti ka su'we tiyee lo'oün” ndukwin x'nan msu kan' 'in bra kan'.

22 Chun' ndi'in la mdiyan xka msu nu mda x'nan tukwa mi tñi plata 'in. “X'ñaän” ndukwin msu kan', “mdaa tukwa mi tñi plata 'ñaän, lo'o ni, wa mjwi tyukwa mi tñi 'ñaän cha' y'niin tñan lo'o tñi kan' 'iin.”

23 “Su'we 'a tñan nu y'nii” ndukwin x'nan msu kan' 'in. “Ska tñan xuwe ti mdaän 'iin nu ngwa xkan'; nu ka nde loo la taän xka tñan nu tlyu la cha' ku'nii. Su'wa ti tyi'iin se'en ndi'iin, cha' su'wa ti ka su'we tiyee lo'oün” ndukwin x'nan yu 'in yu bra kan'.

24 Chun' ndi'in la mdiyan xka msu nu mda x'nan ska mi ti tñi 'in. “X'ñaän” ndukwin msu kan', “jlyo tiän' cha' nten tiji 'a lkaa, cha' ndo'o tya 'iin se'en y'ni xka la nten tñan kan'; ngwaña'an nskwa' nu nskwa' xka la nten, kan' lka nu kaja 'iin.

25 Kan' cha' ytseän 'iin. Kan' yi'aän msu'waän kutsiin' tñi 'iin ni' yuu. Nde lka tñi 'iin sikwa.”

26 Msin' ti' x'nan msu kan' 'in yu bra kan'. “Ska msu xa'an lkaa” ndukwin x'nan msu kan' 'in yu. “Ndajaa 'aa” ndukwin. “Wa jlyo tii' cha' nxo' kiin tya, ni siya ja ytaän nskwa' kan', ni siya si'i na' nu y'niin tñan kan', ndukwin nu'win.

27 ¿Ni cha' ja mdaa tñi 'ñaän 'in xka nten sikwa, cha' ku'ni ne' tñan lo'o ran? Chun' ndi'in la tya'an sñi' tñi kan' 'ñaän, cha' tyaa 'ñaän xa nu kalaän

xiya'."

²⁸ Ykwi' x'nan msu kan' lo'o xka ta msu bra kan': "Su'we la xñi wan ska mi nsu'wi ya' yu re, ta wan 'in msu nu nsu'wi tii mi 'in.

²⁹ Ngwaña'an lka lo'o nten nu wa nsu'wi chin' cha' 'in, ti taän ka'an la 'in nten kan' si ngi'ni ne' tñan lo'o cha' kan', cha' ka'an la cha' su'we xu'wi 'in ne' kan'; lo'o nten nu chin' 'a cha' nsu'wi 'in, si ja xlyaa ne' ku'ni ne' tñan lo'o cha' kan', kulaän jiin ti cha' nu ti nsu'wi 'in ne' kan'.

³⁰ Lo'o ni, tsaa lo'o wan 'in msu xa'an re, cha' xkwan wan 'in yu re lo jwlyaa, se'en lye 'a nxi'ya ne', lo'o lye 'a nchku li'ya ne' cha' msin' ti' ne', cha' lye 'a ndijin ne' nu ti'í nde kwa."

Ku'ni biya' Ndiose 'in nchga nten chalyuu

³¹ 'Na' nu wa msu'wa Ndiose 'ñaän ndijaän cha' kaän nten, kaän xiya' nde loo la cha' kaän ndloün la ti 'in nchga nten. Su'wa ti kaän lo'o nchga angajle 'ñaän, kan' tyukwaän se'en tlyu la ti, ska se'en luwi 'a. Nde kwa ku'ni biyaän 'in nchga nten bra kan'.

³² Ska se'en ti tyo' ti'in nchga nten ña'aan chalyuu tloün bra kan', cha' ku'ni biyaän' 'in ne'. Bra kan' su'weän 'in nten tukwa se'en, sa ña'an nu ngi'ni nten nu ña'ansiin 'in slya', kwi' ngwaña'an ku'niin; ska la'a tyi'in ska ta slya' 'in ne', xka la'a tyi'in xka ta chivu 'in ne'.

³³ Ngwaña'an ku'niin, cha' la'a se'en kwın 'ñaän tyi'in nchga nten 'ñaän, ña'an ti' ndi'in slya' kan'; la'a se'en kaa se'en tyukwaän, la kan' tyi'in nchga nu ja lka nten 'ñaän, ña'an ti' ndi'in chivu kan'.

³⁴ Bra nu kaän ndloün la ti, chkwıin' lo'o nchga nten nu ndi'in la'a se'en kwın 'ñaän: "Kan wan nde

se'en ndi'in Ndiose nu lka ndloo la ti, nchga wan nu su'we 'a nka tiye Stiin Ndiose ña'an Ni 'wan, cha' wa y'ni xu'we Ni se'en tyi'in wan se'en ndi'in ykwi' Ni, ti bra nu mñan Ni chalyuu.

³⁵ 'Wan ni, wa mda wan nan ykuün cha' mte' tiän' mdi'iin lo chalyuu; xa ngwityi tiän', mda wan tyi'a yi'oün bra kan'. Ja yu'wi lyo wan 'ñaän, lo'o mda wan na'an tyi wan mdi'iin bra kan';

³⁶ cha' ja yu'wi steen' bra nu mdi'iin lo chalyuu, mda wan te' ykuün' bra kan'. Bra nu ngwa ti'iin lo chalyuu, yaa na'an wan 'ñaän bra kan', mdaya' wan 'ñaän; kwi' bra nu mstiin ni' ña'an chkwan, ja ytsen wan yaa wan se'en yu'wiin bra kan'." Ngwaña'an chkwiin' bra nu kaän ndloün la ti.

³⁷ Xkwen ne' nu luwi kan' 'ñaän: "X'naan, ¿ni ña'an bra na'an ba 'iin cha' mte' tii' a? ¿Ni ña'an bra mxku ba 'iin a? ¿Ni ña'an bra mda ba tyi'a yi'oo cha' ngwityi tii' a?"

³⁸ ¿Ni ña'an bra mda ba se'en mdi'iin xa nu ja yu'wi lyo ba 'iin a? ¿Ni ña'an bra mda ba te' ykuu' bra nu mda'aan ti'yu tii a?

³⁹ ¿Ni ña'an bra yaa na'an ba 'iin xa nu ngwa ti'ii a? ¿Ni ña'an bra yaa na'an ba 'iin xa nu yu'wii ni' ña'an chkwan a? Ja jlyo ti' ba, X'naan."

⁴⁰ Lo'o na' nu lkaän ndloo la ti, chkwiin' xiya' lo'o ne' kan': "Chañi cha' nu nchkwiin' lo'o wan ni, cha' bra nu mdaya' wan 'in ska ne' ta'aän nu ndi'in cha' 'in lo'oün, ni siya ti'i 'a ne' ta'aän, kan' ngwa ña'an ti' si mdaya' wan 'ñaän" —ndukwin Jesús 'in ne'—.

⁴¹ 'Lo'o chkwiin' lo'o xka ta nten nu tyi'in la'a se'en kaa 'ñaän: "Tyaa lya wan, 'wan nu ja nsu'wi se'en tyi'in wan se'en ndi'in Ndiose. Yaa lya wan se'en nu ja ndyuwi' 'a kii', cha' su'wa ti tyi'in wan

lo'o nu lka x'nan kune' xa'an lo'o nchga nu ngi'ni tñan 'in, nchga kwi'in kuxi; si'ya kune' xa'an kan' mxu'u Ndiose kii' kan'.

⁴² 'Wan ni, ja mda 'a wan nan kuñn bra nu mte' tiñn' mdi'iin lo chalyuu; ja mda 'a wan tyi'a ko'oñn bra nu ngwityi tiñn';

⁴³ lo'o ja mda wan se'en mdi'in wan tyi'iin bra kan', cha' nu ja yu'wi lyo wan 'ññañ; ja mda wan te' kuñn xa nu mda'añn ti'yuñn tiñn'; ja yaa na'an wan 'ññañ bra nu ngwa ti'iin, lo'o ja yaa na'an wan 'ññañ xa nu yu'wiin ni' ña'an chkwan."

⁴⁴ Xkwen ne' kuxi kan' 'ññañ bra kan': "X'naan" chkwi' ne' kan', "¿ni ña'an bra na'an ba 'iin cha' mte' tii' a? Bra nu ngwityi tii', xa nu mda'aan ti'yu tii', bra nu ngwa ti'ii, xa nu yu'wii ni' ña'an chkwan, ¿ni ña'an bra ja mdaya' ba 'iin a? Ja jlyo ti' ba cha' kan'."

⁴⁵ Lo'oñn cha' kañn ndloo la ti, chkwiin' lo'o ne' xa'an kan' xiya' bra kan': "Chañi cha' nu nchkwiiin' lo'o wan ni, cha' ja mdaya' wan 'in ska nu ti'i nu ndi'in cha' 'in lo'oñn, kan' cha' nchkwiiin' lo'o wan cha' ja ska ya' mdaya' wan 'ññañ."

⁴⁶ Ndi'in cha' tyaa ne' kan' lo jwlyaa se'en nu ja tyii 'a cha' tyijin ne' nu ti'í bra kan'; lo'o ne' nu luwi ni, kaja chalyuu nu ja tsaa tii 'a 'in ne' kan' —ndukwin Jesús 'in ne' bra kan'.

26

Mnan ti ngwa su'wa cha' 'in ne' lo'o ta'a ne' cha' xñi ne' 'in Jesús

¹ Bra wa mdyii ykwi' Jesús nchga cha' kan', ykwi' yu chin' lo'o ne' nu ngi'ni xa'an cha' 'in yu:

² —Jlyo ti' wan cha' tyukwa ti tsan ti ji cha' ka ta'a siin pascua. Tsan kan' xñi ne' xa'an 'ñaän nu wa msu'wa Ndiose 'ñaän ndijyaän cha' kaän nten. Tsaa lo'o ne' 'ñaän cha' kujwi ne' 'ñaän lo wsi bra kan'.

³ Ti kwi' ti bra nu nchkwi' Jesús, bra kan' ndyo' ti'in tyun sti jo'o nu lka ndloo, lo'o mstru nu ndu'u cha' jo'o 'in nten, lo'o yu kula 'in ne' judío; ndyo' ti'in ne' se'en ndi'in Caifás nu ngwa x'nan nchga sti jo'o kwa.

⁴ Kan' y'ni su'wa ne' cha' 'in ne' lo'o ta'a ne' sa ña'an ku'ni ne' cha' xñi mnan ti ne' 'in Jesús, cha' kujwi ne' 'in yu.

⁵ —Ja su'we xñian 'in yu tsan ta'a —ndukwin ne' kan'—. Kasin' 'a ti' nchga nten nu ndi'in tsan ta'a, tlyu 'a cha' wsuun ka bra kan' —ndukwin ne' kan'.

Mda'an ska nu kuna'an tyi'a xi tyi'i ke Jesús

⁶ Ngwa ska tsan mdi'in Jesús kichen Betania, na'an tyi Simón nu yu'wi kicha ngatsu' kuna' 'in mdi'in yu.

⁷ Kan' mdiyan ska nu kuna'an se'en ndi'in Jesús nu mda'an lo'o ska te'én lyu' ti nu ndya' lo'o kee alabastro; msa'an te'én lyu' ti kan' nsu'wi tyi'a xi tyi'i nu ka'an nga'an. Lo'o mslu tukwa nu kuna'an kan' tyi'a xi tyi'i lo jlyu'we Jesús se'en ndukwa yu tu'wa msaa.

⁸ Bra nu na'an ne' nu ngi'ni xa'an cha' 'in yu sa ña'an nu y'ni nu kuna'an kan', msin' 'a ti' ne' 'in nu kuna'an kan' bra kan'.

—¿Ni cha' mslu ji nu kuna'an kwa tyi'a xi tyi'i kan' chun' yu? —ndukwin ne' kan'—.

9 Ka'an 'a nga'an tyi'a xi tyi'i kwa. ¿Ni cha' ja yjwi' ne' 'in ran cha' kaja tñi ta ne' 'in ne' ti'i? —ndukwin ne' nu ngi'ni xa'an cha' 'in yu.

10 Bra nu mgii ti' Jesús cha' nu nda'an tiye ne' kan', ykwi' yu lo'o ne' bra kan':

—¿Ni cha' msin' ti' wan 'in nu kuna'an re? —ndukwin Jesús 'in ne' kan' bra kan'—. Ska cha' su'we 'a y'ni nu kuna'an re lo'oŭn.

11 Nchga tsan ndi'in ne' ti'i lo'o wan lo chalyuu cha' taya' wan 'in ne', lo'o na' ni, wa tyii ti tsan nu ndi'iin lo'o wan.

12 Wa mslu nu kuna'an re tyi'a xi tyi'i chuŭn' bra nu wa ndla ti kajaän, cha' ku'ni xu'we tyukwi ña'aän cha' katsiŭn'.

13 Chañi cha' nu chkwiŭn' lo'o wan ni, cha' nchga se'en nu kanen cha' 'ñaän ña'aan chalyuu, bra kan' kunan ne' nchga cha' nu y'ni nu kuna'an re ni, cha' tyu'wi ti' ne' cha' su'we 'a tñan nu y'ni nu kuna'an re tsan ni.

Y'ni Juda trisiyun 'in Jesús lo'o ne' nu lka ndloo

14 Lo'o Juda Iscariote ni, ta'a nda'an nu tii xka yu nu ngi'ni xa'an cha' 'in Jesús, mdo'o yu ndyaa yu se'en ndi'in sti jo'o nu lka ndloo bra kan'.

15 —¿Ni nkwa tñi ta wan liya' 'ñaän si kwa'uŭn tuwiin 'wan, cha' tsaa sñi wan 'in Jesús kan' a? —ndukwin Juda 'in sti jo'o kan'.

Mda ne' kalatyii tñi plata 'in Juda bra kan'.

16 Ti bra kan' mda'an naan yu sa ña'an ka taya' yu 'in ne' kan', ni ña'an bra ka 'in yu kwa'u mnan ti yu tuwiin 'in ne', cha' tsaa ne' se'en ndi'in Jesús.

Xiya' ti yku siin Jesús lo'o ne' nu ngi'ni xa'an cha' 'in yu

17 Bra nu ngwa tsan ykwi' ta'a xa nu nchku ne' jaxlya nu ja yu'wi skwan tiye', kan' mdiyan ne' nu ngi'ni xa'an cha' 'in Jesús se'en ndi'in yu. Mnicha' ne' 'in yu bra kan':

—¿La nde ya' nchka tii' cha' ku'ni xu'we ba nan kuun siin cha' 'in ta'a pascua re? —ndukwin ne' 'in Jesús.

18 —Tsaa wan lo kichen se'en ndi'in ta'a su'we nsu'wiin kan'. Chkwi' wan cha' re lo'o yu: “Ndukwin mstru 'ñaan cha' wa ndla ti tiya bra 'in yu. Lo'o ni, nchka ti' ti kwi' yu kula kan' ku siin ta'a pascua na'an tyii lo'o ne' nu ngi'ni xa'an cha' 'in yu.”

19 Mdo'o ne' nu ngi'ni xa'an kan' ndyaa ne' lo kichen, y'ni ne' nchga tñan nu wa ngulo Jesús 'in ne'; y'ni xu'we ne' nchga nan nu kunanjo'o 'in ne' cha' ku siin ne' ta'a pascua.

20 Xa wa msiin, bra kan' mdiyan Jesús na'an kan'. Nde kwa mdukwa yu lo'o ne' nu ngi'ni xa'an cha' 'in yu tu'wa msaa, yku siin ne'.

21 Mdyisnan ykwi' Jesús lo'o ne' bra kan':

—Chañi cha' nu nchkwii'n' lo'o wan ni, cha' ndiya ska yu ta'a wan nu ku'ni trisiyun 'ñaan ya' ne' xa'an —ndukwin Jesús 'in ne' kan'.

22 Xi'in 'a ti' ne' bra nu ynan ne' cha' kan'. Bra ti mdyisnan ne' mnicha' ne' 'in Jesús:

—X'naän, ¿ta na' nu tyaän 'iin ya' ne' xa'an a? —ndukwin ska yu 'in Jesús.

—¿Ta na' a? —ndukwin xka yu bra kan'.

Lo'o ngwaña'an ndukwin xka ta ne' kan'.

23 Mxkwen Jesús 'in ne' bra kan':

—Ndi'in ska yu ta'a nchkuan siin ni, nu ska ti ni' ka'nan nchkuun lo'o yu, kan' lka nu ku'ni trisiyun 'ñaan lo'o ne' xa'an kan'.

24 Sa ña'an nu ndukwa cha' lo kityi 'in Ndiose, ngwaña'an ndi'in cha' ka 'ñaän, na' nu wa msu'wa Ndiose 'ñaän ndijyaän cha' kaän nten. ¡T'nan 'a nten nu tya 'ñaän ya' ne' xa'an! Su'we la ka 'in yu ni siya ja ngula yu chalyuu siya' ti.

25 Lo'o Juda nu ku'ni cha' kuxi kan', lo'o yu kan' mnicha' yu 'in Jesús bra kan':

—Mstru —ndukwin Juda kan' 'in Jesús—, ¿ta na' lkaän nu tyaän 'iin ya' ne' xa'an a?

—Kwii' —ndukwin Jesús 'in Juda bra kan'.

26 Laja nu nchku ne', bra kan' msñi Jesús ska jaxlya, ndya xu'we 'in Ndiose, msu'we jaxlya kan'. Mda yu yu'we jaxlya kan' 'in ne' nu ngi'ni xa'an cha' 'in yu bra kan'.

—Ku wan jaxlya re, cha' ña'an ti' kunaän', ngwaña'an lka re —ndukwin Jesús 'in ne' kan'.

27 Chun' ndi'in la msñi Jesús ska basu mñun, ndya xu'we 'in Ndiose. Kan' mda yu basu mñun kan' 'in ne' nu ngi'ni xa'an cha' 'in yu.

—Nchga wan ko'o wan mñun re —ndukwin Jesús—,

28 cha' ña'an ti' tneän, ngwaña'an lka re. Lka re ska cha' nu kwa'u ñi 'wan cha' xiya' skan' Ndiose cha' lo'o nten chalyuu, xa nu kalu tneän lo wsi. Ngwaña'an kulaa Ndiose 'in ka'an 'a ta'a nten wan, bra nu ku'ni Ni cha' tlyu ti' 'wan ki'ya nu ndukwi wan.

29 Chañi 'a cha' nu chkwiin' lo'o wan ni, cha' ja ko'oän 'a mñun ni, sa ña'an ya' nu tiya tsan kan' nu ko'oän 'in ran su'wa lo'o wan se'en ndi'in Stiin Ndiose nu lka ndloo la ti.

Chkwi' Tyu tloonten cha' ja nsu'wi lyo yu 'in Jesús siya' ti

30 Bra nu yla tu'wa ne' ska kantu 'in Ndiose, bra kan' mdo'lo ne' ndyaa ne' lo ki'ya Olivos.

31 Kan' ykwi' Jesús lo'lo ne' kan':

—Ka jyu'u ti' nchga wan ña'an wan ñaän tla nda'a. Kan' ka sa ña'an ndukwa cha' lo kityi 'in Ndiose nu ngwa s'ni. Nde lka cha' kan': “Bra nu kujwiin 'in nu ña'ansiin 'in slya', xnan nchga slya' kan', tyaa i' bra kan'” ndukwin kityi kan'.

32 Lo'lo na', bra nu tyu'uün xiya', bra kan' tsa'aän Galilea kulo ndukwa la. Tsa naan wan 'ñaän nde kwa bra kan'.

33 Ykwi' Tyu lo'lo Jesús bra kan':

—Ja kulaa yaän' 'iin siya' ti —ndukwin Tyu bra kan'—. Ni siya nchga ne' xnan ne' 'iin, na' ni, ja xnaän 'iin.

34 Mxkwen Jesús 'in Tyu bra kan':

—Chañi katsaän' 'iin ni —ndukwin yu—, cha' bra nu ti ji xi'ya la kwe'e tla nda'a, snan ya' chkwii' lo'lo nten cha' ja nsu'wi lyoo 'ñaän; jlyo tiän' cha' ngwaña'an chkwii' lo'lo ne'.

35 Xiya' ykwi' Tyu bra kan':

—Ni siya su'wa kajaän lo'oo, ja chkwii' lo'lo nten cha' ja nsu'wi lyoün 'iin —ndukwin Tyu bra kan'.

Kwi' ngwaña'an mxkwen nchga ne' nu ngi'ni xa'an cha' 'in Jesús bra kan'.

Ykwi' Jesús lo'lo Ndiose nu lka Sti yu ni' lyo'oo Getsemaní

36 Chun' ndi'in la mdiyan Jesús lo'lo ne' nu ngi'ni xa'an cha' 'in yu, yten ne' ska ni' lyo'oo se'en naan Getsemaní, nu ndi'in tu'wa kichen.

—Tyukwa wan chin' nde kwa ti —ndukwin Jesús 'in ne' kan!—, bra nu tsa'aän nde kwa la chin' cha' chkwiin' lo'o Stiin Ndiose.

³⁷ Ti ndyaa la Jesús ti chin' se'en lo'o Tyu lo'o ta'a tyukwaa sñi' Zebedeo bra kan'. Ngwa xi'in 'a ti' Jesús si'ya cha' tnun nu wa tyukwa ti yu.

³⁸ Lo'o ykwi' Jesús lo'o ta'a snan ne' kan':

—Ni' kasiya 'ñaän nsu'wi ska cha' xi'in nu tlyu 'a. Ja taloün cha' xi'in 'a tiän'. Kanun wan nde ti, ndii ti ti' wan tyi'in wan lo'oün.

³⁹ Ti ndyaa la yu chin' nde kwa bra kan'. Mdyisti yu nde tloo yu cha' xi'in 'a ti' yu. Ykwi' yu lo'o Ndiose, nde lka cha' nu ykwi' yu bra kan':

—Stiin, ¿ta ja nsu'wi 'a xka ña'an nu ku'niin tñan tnun re 'iin a?, cha' ja tyijiin 'aän nu ti'í si'ya cha' tnun re —ndukwin Jesús 'in Ndiose Sti yu—. Ska ti cha' nchka tiän' ku'niin ña'aan tñan nu kuloo 'ñaän. Si'i na' kulooün tñan.

⁴⁰ Chun' ndi'in la mxitukwi yu ndyaa yu se'en ndi'in ta'a snan ne' kan'. Laja' 'a ne' bra kan'. Lo'o ykwi' Jesús lo'o Tyu kan':

—¿Ta ja nchka tyi'in wan ndii ti tii' wan lo'oün ni siya ska bra ti a? —ndukwin Jesús 'in yu—.

⁴¹ ;Ndi ti ti' wan tyi'in wan ni sikwa! Chkwi' wan lo'o Ndiose cha' ja ku'ni kune' xa'an kanan 'wan. Jlyo tiän' cha' tyukwi ti tiye wan nchka ti' wan ku'ni wan tñan re 'ñaän. Lo'o ja ndalo wan, kan' cha' ndla 'a yija' wan.

⁴² Xiya' ndyaa Jesús bra kan', cha' chkwi' yu lo'o Ndiose:

—Stiin —ndukwin yu—, cha' ja ndiya xka ña'an ku'niin tñan 'iin, su'we la tyijiin nu ti'í sikwa, cha' nchka tiän' ku'niin nchga tñan nu ndloo 'ñaän.

43 Xiya' mxitukwi yu ndyaa yu se'en ndi'in ne' kan' bra kan'; lo'o na'an yu 'in ne' cha' laja' ne' xiya', cha' lye 'a yu'wi sla ne'.

44 Mxnun yu 'in ne' bra kan', ndyaa yu cha' chkwi' yu lo'o Ndiose xiya'. Ti kwi' cha' nu ykwi' yu ti tsan, ti kwi' cha' kan' ykwi' yu xiya'; wa mda'a snan ya' ykwi' yu lo'o Ndiose nu lka Sti yu bra kan'.

45 Chun' ndi'in la mxitukwi yu ndyaa yu xiya' se'en ndi'in ne' nu ngi'ni xa'an cha' 'in yu.

—¿Ti laja' wan a? —ndukwin Jesús 'in ne' bra kan'—. ¿Ja ya tyo'o sla wan a? Xaa ti' wan ni, cha' wa mdiya bra nu xñi ne' xa'an 'ñaän, na' nu wa msu'wa Ndiose 'ñaän ndijyaän cha' kaän nten.

46 Tyituun wan cha' tyaan, cha' wa mdiyan yu nu ta 'ñaän ya' ne' xa'an kan'.

Ndyaa lo'o ne' 'in Jesús presu

47 Bra nu ykwi' Jesús cha' kan', bra ti mdiyan Juda se'en ndi'in ne'. Ti kwi' ta'a ne' nu ngi'ni xa'an cha' 'in Jesús ngwa Juda kan'. Lo'o ka'an 'a nten mdiyan lo'o yu, nu ndiya xtyi wsuun 'in, nu ndiya yka 'in; mdiyan ne' xa'an kan' tñan nu ngulo sti jo'o nu lka ndloo, ti kwi' tñan nu ngulo nchga yu kula nu lka ndloo, mdiyan ne'.

48 Lo'o Juda ni, kan' lka nu wa ta ti 'in Jesús ya' ne' xa'an kan'. Nde lka cha' nu wa ytsa' Juda 'in ne' ti tsan:

—Ska ti yu nu xñiñ si' ta'a ba lo'o, kan' yu xñi wan.

Ngwaña'an ykwi' Juda lo'o ne' ti tsan,

49 kan' cha' ndyaa yu kan' se'en ndi'in Jesús cha' xñi si' ta'a yu lo'o.

—¿Ni rsun ndaa ni, Mstru? —ndukwin Juda 'in Jesús.

Msñi Juda si' Jesús.

⁵⁰ Lo'o ykwi' Jesús lo'o Juda bra kan':

—Ta'a su'we nsu'wiin ngwa nu'win ti xkan' —ndukwin Jesús—. ¿Ni tñan ndijyaan re ni a?

Lo'o msñi ne' xa'an kan' 'in Jesús, cha' tyaa lo'o ne' 'in yu bra kan'.

⁵¹ Lo'o ska nten nu mda'an lo'o Jesús, bra ti ngulo yu xtyi wsuun 'in yu, mdijin ku' yu jin nxkan msu 'in x'nan sti jo'o bra kan'.

⁵² Bra ti ngulo Jesús tñan 'in yu kan':

—Tyukwan xtyi wsuun kwa 'iin —ndukwin 'in yu kan'—. Nchga nten nu nxuun lo'o xtyi, kwi' ngwaña'an kaja ne' kan' lo'o xtyi.

⁵³ ¿Ja jlyo tii' a? Bra nu jñaän 'in Stiin, bra ti kulo Stiin tñan cha' kan' tii tyukwa ta angajle 'in Ni, cha' taya' ne' 'ñaän.

⁵⁴ Lo'o ja nchka ti' ba ngwaña'an. Ndi'in cha' ka ña'aan cha' nu ndukwa lo kityi kula 'in Stiin Ndiose.

⁵⁵ Lo'o ykwi' Jesús lo'o ña'aan ta nten xa'an nu ndijyan cha' xñi 'in yu:

—¿Ni cha' ndijyan wan lo'o xtyi wsuun 'wan, lo'o yka 'wan, cha' xñi wan 'ñaän a? —ndukwin Jesús 'in ne'—. ¿Ta ne' nu y'ni kunan lkaän, xke' ti' wan a? Tyun 'a tsan mdi'iin ni' lyaa tnun 'wan, ngwa'uun cha' 'in Ndiose 'in nten, lo'o ja msñi wan 'ñaän bra kan'.

⁵⁶ Sa ña'an nu ngwa'an ne' lo kityi nu ngwa s'ni, ne' nu ykwi' cha' 'in Ndiose lo'o nten, ngwaña'an ngi'ni wan lo'oün ni.

Kan' mdo'o nchga ne' nu ngi'ni xa'an cha' 'in yu, msnan ne' bra kan'.

Ne' nu lka ndloo 'in ne' judío y'ni biya' 'in Jesús

57 Chun' ndi'in la mdiyan lo'o ne' xa'an kan' 'in Jesús tloo Caifás, x'nan sti jo'o. Tu' na'an tyi yu kan' wa ndyo' ti'in nchga mstru nu ndu'u cha' jo'o lo'o nchga yu kula nu lka ndloo.

58 Lo'o Tyu kan' ni, tijyu' ti nda'an ña'an yu chun' ne' nu msñi 'in Jesús, sa ña'an ya' nu mdiyan ne' tu lo'oo 'in x'nan sti jo'o kan'. Kwi' yten Tyu ni' lyo'oo kan', su'wa ti ndukwa yu lo'o ne' policía, cha' nchka ti' yu ña'an yu sa ña'an ku'ni lyo'o ne' 'in Jesús.

59 Nchga ne' wsiya, lo'o nchga sti jo'o nu lka ndloo, lo'o nchga yu kula kan', ndyaa naan ne' sa ña'an ka xtya ne' ki'ya 'in Jesús, cha' nchka 'a ti' ne' kujwi ne' 'in yu, lo'o ja mjwi 'a nten nu kujwi' xu'wa 'in yu ya' ne' nu lka ndloo kan'.

60 Ja mjwi ña'an ku'ni ne'. Ka'an 'a nu kwiñi yan se'en ndi'in ne' nu lka ndloo kan', cha' xtya ne' ki'ya 'in Jesús; lo'o ja su'wa cha' nchkwi' yu kwiñi kan'. Xa wa tyii ti cha' bra kan', mdiyan tukwa nu kwiñi nu ykwi' cha' re:

61 —Nde lka cha' nu ykwi' nu ki'yu kwa: “Ka 'ñaän ku'ni tyiïn laa tnun re 'in Ndiose, lo'o ka 'ñaän kwiñaän 'in ran xiya'; chun' snan tsan ti tyii tya' laa 'ñaän” ndukwin Jesús kwa —ngwaña'an ndukwin nu kwiñi kan'.

62 Mdyituun x'nan sti jo'o bra kan', ykwi' yu lo'o Jesús:

—¿Ni cha' mstyá ne' re ki'ya 'iin? —ndukwin sti jo'o kan'—. ¿Ni cha' ja xkween 'in ska cha' nchkwi' ba?

63 Ja ska cha' mxkwen Jesús 'in sti jo'o. Chun' ndi'in la ngulo sti jo'o kan' tñan 'in yu:

—Chabiya' 'in Ndiose nu lu'u ndloŷn tñan re 'iin ni: Katsaa'lyaa 'wa si chañi cha' Krixtu lka nu'win, si lkaa ska ti nu lka Sñi' Ndiose.

64 —Kwiin' lkaän, sa ña'an nu ndukwiin cha' lkaän —ndukwin Jesús bra kan'—. Lo'o xka cha' katsaän' 'wan ni, cha' nde loo la ña'an wan 'ñaän xa nu tyukwaän la'a se'en kwin se'en ndukwa Stiin Ndiose, nu nchka 'in nchga tñan, na' nu wa msu'wa Ni 'ñaän ndijyaän cha' kaän nten. Lo'o ña'an wan xa nu kaän xiya' laja ko bra kan'.

65 Lo'o x'nan sti jo'o kan' ni, ti ykwi' ti yu msaa' yu ste' yu bra kan', cha' msin' 'a ti' yu.

—Kwiñi 'a yu re, cha' kuxi nchkwi' yu re 'in Ndiose —ndukwin sti jo'o kan' 'in ña'aan ta ne' nu lka ndloo bra kan'—. Ja ndi'in cha' xtya xka nten ki'ya 'in yu re, cha' wa ynaan cha' tnun 'a cha' kuxi ykwi' yu re, xa nu ndukwin yu cha' Sñi' Ndiose lka yu.

66 ¿Ni sa ña'an nka tiye wan ni a?

Bra ti mxkwen ne' 'in x'nan sti jo'o kan':

—Ndi'in cha' kaja yu —ndukwin ne' kan'.

67 Chun' ndi'in la msu'wa sne' ne' tloo Jesús; mji'in ne' 'in yu. Lo'o xka ta ne', kan' ykwan' tloo Jesús.

68 Lo'o ykwi' ne' lo'o yu bra kan':

—Nu'win ndukwiin cha' Krixtu lkaa, kwi' ndukwiin cha' Ndiose msu'wa 'iin ndijyaan chalyuu. Su'we sikwa. Katsaa' ñi 'wa: ¿Ni sa ña'an naan yu nu mykwan' 'iin a? Si chañi cha' ndii tii' —ndukwin ne' kan' 'in Jesús.

Ndukwin Tyu cha' ja nsu'wi lyo yu 'in Jesús

⁶⁹ Lo'o Tyu kan' ni, chun' na'an ti mdukwa yu kan'. Kan' mdiyan ska nu kuna'an msu 'in sti jo'o se'en ndukwa yu.

—Lo'o nu'win nda'aan su'wa ti lo'o Jesús, ne' Galilea kwa —ndukwin nu kuna'an kan' 'in Tyu bra kan'.

⁷⁰ Lo'o kwen mxkwen Tyu 'in nu kuna'an kan', cha' kunan nchga nten bra kan':

—Ja nchka biya' tiän' cha' nu nchkwii' —ndukwin Tyu 'in nu kuna'an kan'.

⁷¹ Bra ti mdo'o tsu' Tyu mdyituun yu kwi' se'en ti tulo'oo kan'. Chun' ndi'in la na'an xka nu kuna'an nu lka msu 'in sti jo'o, ykwi' lo'o nten nu nduun kwi' se'en ti:

—Su'wa ti nda'an nu ki'yu re lo'o Jesús Nazaret kwa —ndukwin nu kuna'an kan' bra kan'.

⁷² Xiya' ykwi' Tyu xka cha' kwiñi, cha' si'i kan' lka yu:

—Ja siya' yu'wi lyoñ 'in nu ki'yu kwa —ndukwin Tyu 'in ne' bra kan'.

⁷³ Chun' ndi'in la chin' mdiyan xka ta nten nu nduun nde kwa ti cha' chkwi' ne' lo'o Tyu bra kan':

—Chañi cha' ta'a nda'an nu ki'yu kwa lkaa —ndukwin ne' 'in yu—, cha' su'wa ti nnen cha' nu nchkwii' lo'o ta'a kichen tyi yu kwa.

⁷⁴ Lye 'a ykwi' Tyu xiya' bra kan', cha' ta Ndiose nu ti'í 'in yu si cha' kwiñi lka nu nchkwii' yu.

—Ja siya' yu'wi lyoñ 'in nu ki'yu kwa —ndukwin Tyu 'in ne'.

Bra ti msi'ya la kwe'e bra kan'.

⁷⁵ Kan' ndyaa yu'wi ti' Tyu cha' nu ykwi' Jesús lo'o yu ti tsan: “Bra nu ti ji ti xi'ya la kwe'e tla ni, snan ya' chkwii' lo'o nten cha' ja nsu'wi lyoo

'ñaǎn." Ngwaña'an ndukwin Jesús 'in yu ti tsan la, kan' cha' mdo'o yu ndyaa yu bra kan'; nganan 'a yu ndyaa yu cha' xi'in 'a ti' yu bra kan'.

27

Ndyaa lo'o ne' 'in Jesús tloo Pilato

¹ Bra nu ngwi'ya xaa xka tsan, xiya' ndyo' ti'in nchga sti jo'o nulka ndloo lo'o nchga yu kula 'in ne' judío, cha' ka su'wa cha' 'in ne' lo'o ta'a ne', sa ña'an ka kujwi ne' 'in Jesús.

² Mskan' ne' 'in Jesús bra kan', ndyaa lo'o ne' 'in tloo Poncio Pilato, nu ngwa gobernador romano.

Ngujwi Juda

³ Lo'o Juda nu y'ni trisiyun 'in Jesús ya' ne' xa'an kan', na'an yu cha' wa kujwi ti ne' 'in Jesús; ngwa xi'in 'a ti' yu bra kan'. Bra ti ndya yu kalatyii tñi plata kan' 'in yu nu lka ndloo kan' xiya'.

⁴ —Ndi'in ki'ya 'ñaǎn —ndukwin Juda kan' 'in yu nu lka ndloo—, cha' wa yjwiin' ska nten luwi 'wan, cha' kujwi wan 'in —ndukwin.

Mxkwen yu nu lka ndloo kan' 'in Juda bra kan':

—Si'i cha' 'wa lka cha' kan' —ndukwin ne' nu lka ndloo—. Si ndi'in ki'ya 'iin, cha' 'iin lka kan'.

⁵ Kan' cha' mslu Juda tñi plata kan' ni' lyaa tnun tloo yu nu lka ndloo kan', mdo'o yu ndyaa yu bra kan'. Lo'o Juda kan', ti ykwi' ti yu yjwi yu 'in yu; mskan' yu ti su ynin yu, lo'o nguun yu ti su lo yka, mskan' tukwi yu 'in yu, ti ykwi' ti yu. Kan' mxyuu loo yu lyuu, ngujwi yu bra kan'.

⁶ Msñi sti jo'o nu lka ndloo tñi kan' bra kan'.

—¿Ni sa ña'an ku'nian sikwa a? —ndukwin sti jo'o 'in ta'a ne'—. Ja ndiya chabiya' xtyaan tñi re

lo'o lomstan nu wa mda nten 'in Ndiose ni' lyaa re, cha' tñi nu mjwi 'in yu cha' y'ni yu trisiyun 'in ska nten lka tñi re —ndukwin sti jo'o kan'.

⁷ Lo'o ngwa su'wa cha' 'in ne' lo'o ta'a ne', cha' xi'i ne' ska lo'oo 'in nten lo'o tñi kan', se'en mñan ne' katun' nu ngwa s'ni; kaja se'en ni' lyo'oo kan' katsi' ayman 'in ne' xka la'a tsu'.

⁸ Kan' cha' nchkwi' ne' cha' 'in yuu kan' ni: Ni' lyo'oo se'en ngalu tnen nten, ngwaña'an naan yuu kan' 'in ne' sa bra ni.

⁹ Ayman Jeremías nu ykwi' cha' 'in Ndiose lo'o nten nu ngwa s'ni, wa ngwa'an yu cha' re cha' 'in tñi plata kan' lo kityi, ska cha' nu ka nde loo la: “Kalatyii tñi plata (sa kwa nsu'wi lyo ska nten, ndukwin ne' Israel ta'aan).

¹⁰ Lo'o msñi ne' tñi kan', msi'i ne' ska lo'oo 'in nten nu mñan katun' nu ngwa s'ni. Kan' ngwa tñan nu ngulo Ni 'ñaän, Ndiose nu nka X'naan” ndukwin Jeremías.

Mduun Jesús tloo Pilato

¹¹ Chun' ndi'in la mdiyan lo'o ne' 'in Jesús tloo nu nka gobernador kan', mnicha' nu lka ndloo kan' 'in Jesús bra kan':

—¿Ti kwii' lkaa ree 'in ne' judío a? —ndukwin nu lka ndloo 'in Jesús.

—Ti kwiin' lkaän ti kwi' sa ña'an nu ndukwiin cha' lkaän —ndukwin Jesús bra kan'.

¹² Lo'o tyun sti jo'o nu lka ndloo lo'o yu kula kan', mstyia ne' ki'ya 'in Jesús; ja mxkwen 'a Jesús 'in ne' kan'.

¹³ Chun' ndi'in la xiya' ykwi' Pilato lo'o Jesús bra kan':

—¿Ta ja ynaan cha' kuxi nu nchkwi' ne' kwa 'iin a? —ndukwin nu lka ndloo kan' 'in Jesús.

¹⁴Ja mxkwen 'a Jesús 'in ne'; ja ska cha' ykwi' yu, kan' cha' nduwe 'a ti' Pilato kan' na'an yu 'in Jesús.

Mda Pilato chabiya' cha' kujwi sndaru 'in Jesús

¹⁵Nchga yijan bra nu nchka ta'a kan', ndlaa nu nka gobernador 'in ska presu, ti kwi' presu nu jñan ne' judío 'in.

¹⁶Tsan kan', ndi'in ska yu ki'yu nu naan Barrabás ni' ña'an chkwan, ska nten nu ndukwi 'a ki'ya ngwa yu kan'.

¹⁷Lo'o ka'an 'a ne' judío ni, ndyo' ti'in ne' tu' na'an 'in gobierno, lo'o mnicha' Pilato 'in ne' bra kan':

—¿Ti lka nchka ti' wan cha' kulañ ni a? ¿Ta su'we la lyaa Barrabás a? ¿O ta su'we la lyaa Jesús nu nchkwi' wan cha' lka Krixtu a? —ndukwin Pilato 'in ne'.

¹⁸Jlyo ti' Pilato, cha' ti'í 'a ti' ne' nu lka ndloo kan' ña'an ne' 'in Jesús, kan' cha' msu'wa ne' kan' 'in yu ni' ña'an chkwan.

¹⁹Ti nduun nten ka'an kan' se'en ndi'in Pilato, lo'o ti ndukwa Pilato kan' lo yka xlya tnun se'en ngi'ni biya' yu cha' 'in nten. Kan' mdiyan ska msu se'en ndukwa yu, ytsa' msu cha' re nu wa ykwi' kwilyo'o Pilato: “Ja ska cha' ku'nii lo'o yu ki'yu kwa, nten su'we lka yu kwa” ndukwin nu kuna'an kan' 'in Pilato. “Tyukwi tla lye 'a mda'an cha' tiyeēn cha' 'in yu kwa. Wa ykwi' slañ cha' 'in yu kwa.”

²⁰Nchga sti jo'o nu lka ndloo lo'o yu kula kan', wa ykwi' ne' lo'o nten ka'an kan', cha' jñan ne' chabiya' 'in Pilato cha' kulaa yu 'in Barrabás nu

ndi'in ni' ña'an chkwan kan', lo'o kujwi Pilato 'in Jesús bra kan'.

21 Chun' ndi'in la mnicha' gobernador kan' 'in ne' kan' xiya':

—¿Ti ka kulaän sikwa a? —ndukwin Pilato 'in ne'.

—'In Barrabás —ndukwin nten ka'an bra kan'.

22 —¿Ni ña'an ku'niin lo'o Jesús nu nchkwi' wan cha' nka Krixtu sikwa a? —ndukwin Pilato bra kan'.

—jwi'in ka'an wan 'in yu lo wsi! —ndukwin nchga nten bra kan'.

23 —¿Ni cha' lka nchka ti' wan cha' kujwiin 'in yu re? —ndukwin Pilato bra kan'—. ¿Ni ki'ya ndukwi yu a?

Kwen 'a msi'ya lo'o ne' 'in Pilato bra kan':

—jwi'in ka'an wan 'in yu lo wsi! —ndukwin ne'.

24 Bra nu na'an Pilato cha' tlá 'a ngi'ni tloo ne', cha' msin' 'a ti' ne', jlyo ti' yu cha' ja xlyaa 'a ne' kunan ne' cha' nchkwi' yu lo'o ne' bra kan'. Kan' cha' ngulo yu tñan 'in ska msu cha' kan lo'o msu kan' ska si'yuu tyi'a. Mna' yu tloo nchga nten bra kan'.

—Luwi kanun yaän' —ndukwin yu—, cha' si'i cha' 'ñaän kaja yu nu ja ska ki'ya ndukwi re —ndukwin Pilato 'in ne'—. Cha' 'wan lka cha' kan'.

25 —Su'we —ndukwin nchga nten kan'—. Ni siya kanun ki'ya chun' ba, nchga ba lo'o sñi' ba, ndi'in cha' kaja yu re.

26 Lo'o ngulaa Pilato 'in Barrabás kan', mji'in ne' 'in Jesús lo'o ti su. Kwi' ngulo Pilato tñan 'in ne' sndaru cha' tsaa lo'o ne' 'in Jesús bra kan', cha' jwi'in ka'an ne' 'in yu lo wsi.

27 Lo'o sndaru nu nduun kwan se'en ndi'in gobernador kan', msñi ne' 'in Jesús bra kan', ndyaa lo'o ne' 'in yu ni' ña'an 'in gobierno; ytsa' ne' 'in nchga sndaru nu ndi'in ni' ña'an kan', cha' tyo' ti'in ne' se'en nduun Jesús.

28 Lo'o ngulo ne' ste' Jesús, mxku' ne' ska te' nga'a 'in yu.

29 Kan' mxkwan ne' ti kiche' cha' ka ska sne'; mstyia ne' sne' kan' ke Jesús, kwi' mstyia ne' ska kii ya' la'a se'en kwin. Mduun xtyin' ne' tloo Jesús bra kan', cha' xtyi lyo'o liye' ti' ne' 'in yu; kan' cha' y'ni ne' ngwaña'an, sa ña'an si lka yu ska ree lo chalyuu.

—¡Ngi'ni tnun ba 'iin! ¡Nu'win lkaa ree 'in ne' judío! —ndukwin sndaru 'in Jesús bra kan'.

30 Lo'o msu'wa sne' ne' tloo Jesús; msñi ne' kii kan', mji'in ne' ke Jesús bra kan'.

31 Bra wa mdyii mstyia lyo'o liye' ti' ne' 'in yu, bra kan' ngulo ne' te' nga'a kan', xiya' mxku' ne' nu lka ste' ka yu. Mdo'o sndaru bra kan', ndyaa lo'o ne' 'in Jesús tu'wa kichen cha' jwi'in ka'an ne' 'in yu lo wsi.

Mstyia ne' 'in Jesús lo wsi

32 Tuwiin se'en ndyaa ne', ndyukwa ta'a ne' lo'o ska yu ki'yu nu naan Simón bra kan'; ne' Cirene lka yu kan'. Kan' ngulo sndaru tñan 'in Simón kan', cha' kwi'ya yu wsi nu ndi'ya Jesús.

33 Lo'o mdiya ne' ska lo nten nu naan Gólgota. Nde lka Gólgota cha'tñan 'ñaan: Ki'ya se'en ndiya tijyan ke jyo'o.

34 Kwi' mda ne' mñun mxtiyaa' lo'o ska tyi'a lyaa' cha' ko'o Jesús; xa nu yi'o biya' yu 'in ran, ja mslyaa 'a yu ko'o yu mñun kan' bra kan'.

35 Xa wa mstyaa ne' 'in yu lo wsi lo'o klavu, mdi'in jya sndaru cha' yaa kanan ta'a yu ti ka nu ku'ni kanan ste' Jesús bra kan'. Ti kwi' cha' ngwa cha' nu wa ngwa'an ayman nu ykwi' cha' 'in Ndiose lo'o nten nu ngwa s'ni: “Mtsa ne' steen' lo'o ta'a ne' laja mdi'in jya ne'.”

36 Ti kwi' sndaru kan' mdi'in kwan kiya' wsi.

37 Mstyaa ne' letra ke wsi nu nchkwi' sa ña'an ki'ya ndi'in 'in Jesús: “Yu re lka yu Jesús, ree 'in ne' judío.” Ngwaña'an ngwa letra kan'.

38 Ti kwi' tsan kan' mstyaa ne' 'in tukwa nten nu wa y'ni kunan lo tyukwa wsi se'en nduun wsi 'in Jesús; ska ndukwi la'a se'en kwin 'in Jesús, lo'o xka ndukwi la'a se'en kaa 'in yu.

39 Lo'o ka'an 'a nten mdijin se'en nduun wsi kan', mxtiyi lyo'o ne' 'in Jesús bra kan'.

40 —Yu re lka nu ku'ni tyii 'in laa tnun 'ñaan, ndukwin yu; lo'o ndukwin yu cha' kwiñan yu xka chun' snan tsan ti. Kulaa 'in ti ykwii' ti sikwa —ndukwin ne' kan' 'in Jesús—. Si chañi cha' nu'win lkaa ska ti nu lka Sñi' Ndiose, ki'yaa lyaa lo wsi kwa sikwa —ndukwin ne' 'in Jesús.

41 Lo'o sti jo'o nu lka ndloo, lo'o mstru nu ndu'u cha' jo'o, lo'o yu kula 'in ne' judío, nchga ne' nda'an na'an kwi'ya ne' 'in Jesús se'en ndukwi yu lo wsi, cha' xtyi lyo'o ne' 'in yu bra kan'.

42 —Ngulaa yu 'in xka ta nten; lo'o ja nchka 'in yu kulaa yu 'in yu, ti ykwi' ti yu —ndukwin ne' nu lka ndloo kan'—. Ree 'in ne' Israel lka yu, ndukwin

yu. Su'we la si ki'ya yu lo wsi kwa ni, cha' tsaan' ña'an tian' 'in yu bra kan' —ndukwin ne' kan' 'in ta'a ne'—.

⁴³ Ndi'in ta yu 'in Ndiose cha' taya' Ni 'in yu, ndukwin yu; su'we la si kulaa Ndiose 'in yu ni, si chañi cha' su'we 'a nka tiye Ndiose ña'an 'in yu, cha' “Sñi' Ndiose lkaän” ndukwin yu re.

⁴⁴ Lo'o yu nu y'ni kunan, ta'a mstyia ne' 'in yu lo wsi, lo'o yu kan' mstyia lyo'o yu 'in Jesús bra kan'.

Ngujwi Jesús

⁴⁵ Chun' ndi'in la ngwa tla chalyuu snan bra; ti ndi'ya kwan mdyisnan cha' kan', sa bra wa snan siin mdyii cha' kan'.

⁴⁶ Ti kwi' bra wa snan siin, kan' kwen 'a msi'ya Jesús:

—Elí, Elí, ¿lama sabactani? —ndukwin yu. Nde lka cha' kan' cha'tñan: Ndiose Stiin, Ndiose Stiin, ¿ni cha' lka ngulaa yaa' 'ñaän ni?

⁴⁷ Bra wa ynan nten nu nduun kwi' se'en ti, ykwi' ne' lo'o ta'a ne':

—Msi'ya yu re 'in ayman Elías —ndukwin ne' bra kan'.

⁴⁸ Bra ti msnan ska nten ndyaa y'ya ska kiche, ngucha' yu 'in ran lo'o mñun tiye'. Lo'o mskan' yu 'in ran lo yka tukwin cha' xtya yu 'in ran tu'wa Jesús cha' ko'o yu bra kan'.

⁴⁹ Lo'o xka ta nten ndukwin:

—Kataan si chañi cha' kan ayman Elías cha' kulaa 'in yu —ndukwin ne' kan'.

⁵⁰ Chun' ndi'in la, kwen 'a msi'ya Jesús xiya'; mdo'o kasiya 'in yu, ngujwi yu bra kan'.

⁵¹ Ti kwi' ti bra mdaa' te' tlyu nu ndukwi loo jo'o ni' lyaa tnun. Nde tukwin ran mdaa' ran; sa ku'

ti mdaa' ran, sa la lyuu ndi'in ran. Lo'o tyun kee tnun ngwa'a ran, chun' lye 'a mñan chalyuu.

⁵² Kwi' ngwaña'an, ngalaa kwaa se'en mtsi' ayman, lo'o tyun ayman nu mdi'in cha' 'in lo'o Ndiose nu ngwa s'ni, ndyu'u ayman kan' xiya',

⁵³ mdo'o ne' ni' kwaa bra kan'. Chun' ndi'in la, xa wa ndyu'u Jesús xiya', ndyaa ne' kan' lo kichen Jerusalén, kichen nu ndiya la ti' Ndiose. Lo'o tyun nten na'an 'in ne' nu ngwa ayman kan', cha' wa ndyu'u ne' xiya'.

⁵⁴ Lo'o sndaru nu ndi'in kwan 'in Jesús, lo'o capitán 'in sndaru kan', yuwe 'a ti' ne' bra kan'; lye 'a ytsen ne' xa nu na'an ne' sa ña'an ngwa cha' kan', sa ña'an ngwa xa nu lye 'a mñan chalyuu.

—Chañi cha' ska ti nu lka Sñi' Ndiose lka ayman re —ndukwin sndaru kan'.

⁵⁵ Tyukwi bra nu ngwa cha' kan', tijyu' ti mduun tyun nu kuna'an. Ne' ta'a mda'an Jesús ngwa ne' kan'; wa mdo'o ne' Galilea lo'o yu cha' mdaya' ne' 'in yu. Mduun ti nu kuna'an kan', na'an kwi'ya ne' ndukwi Jesús lo wsi;

⁵⁶ lo'o Liya Magdalena, lo'o Liya jya'an Santiago jya'an Se, lo'o nu lka jya'an sñi' Zebedeo, na'an ta'a ne' kan' sa ña'an ngwa 'in Jesús.

Mtsi' ayman Jesús

⁵⁷ Bra wa msiin la mdiyan ska yu kuliya' nu naan Se, ska ne' kichen Arimatea lka yu. Lo'o Se kan' y'ni xa'an yu cha' 'in Jesús.

⁵⁸ Ti tsan la wa yaa yu se'en ndi'in Pilato, mjñan yu chabiya' cha' tsaa lo'o yu 'in ayman Jesús cha' katsi'. Mda Pilato chabiya' 'in yu bra kan', ngulo Pilato tñan 'in sndaru cha' ta ne' ayman kan' 'in Se.

⁵⁹ Kan' mxiin Se ska te' luwi chun' ayman kan', ndyaa lo'o yu 'in ayman kan' cha' katsi' bra kan'.

⁶⁰ Mtsi' yu 'in ayman kan' ni' ska tukee nu tka ngulu ti ne' si' yuu, cha' ka kwaa se'en katsi' ti kwi' Se bra nu kaja yu, mske' ti' yu. Mdukun' Se tu'wa kwaa lo'o ska kee tlyu, mdo'o yu ndyaa yu bra kan'.

⁶¹ Lo'o Liya Magdalena lo'o xka Liya, ndukwa ne' kwi' se'en ti tu'wa kwaa kan'.

Mduun ne' kwan tu'wa kwaa se'en mtsi' ne' 'in ayman Jesús

⁶² Wa ngwa xka tsan ni, wa mdyii y'ni ne' judío tñan 'in ne', cha' ku'ni xu'we ne' ta'a se'en nxitña' ne'. Kan' ndyo' ti'in nchga sti jo'o nu lka ndloo lo'o ne' fariseo kan' se'en ndi'in Pilato bra kan'.

⁶³ Ykwi' ne' lo'o Pilato bra kan':

—Yu kula —ndukwin ne' 'in Pilato—, nsu'wi ti' bare cha' nu ykwi' yu kwiñi kan' xa nu ti lu'u yu: “Xa mda'a snan tsan, bra kan' tyu'uñ xiya” ndukwin yu.

⁶⁴ Kan' cha' su'we la si kulo wan tñan cha' ku'ni sndaru kwan tu'wa kwaa kan' snan tsan, cha' ja ta 'a chabiya' 'in ne' nu y'ni xa'an cha' 'in yu, cha' ja tsaa 'a ne' kan' ku'ni ne' kunan 'in ayman kan'. Ja kaja ña'an chkwi' ne' cha' kwiñi cha' wa ndyu'u ayman kan' xiya' bra kan'. Wa msñi nten cha' kwiñi nu ykwi' ayman kan' nu ngwa xkan'; lo'o ni, si tsaa ña'an ti' nten cha' wa ndyu'u ayman kan' xiya', tlyu la cha' kwiñi ka si xñi ne' cha' kan'.

⁶⁵ Lo'o mxkwen Pilato 'in ne' nu lka ndloo kan' bra kan':

—Ndiya sndaru 'wan —ndukwin Pilato—. Yaa lya wan lo'o sndaru kan', cha' tukun' su'we wan

tu'wa kwaa kan' sa ña'an nu nchka ti' wan, ti ykwi' ti wan.

⁶⁶ Mdo'o ne' nu lka ndloo bra kan', ndyaa ne' lo'o ska ta sndaru 'in ne', mdukun' tsaa ne' tu'wa kwaa kan' lo'o ska lo kiña' tla nu yu'wi sello 'in ne', cha' ja kulo 'a nten kee tlyu nu nchkun' tu'wa kwaa kan'. Lo'o ngulo ne' tñan 'in sndaru kan', cha' ku'ni yu kwan tu'wa kwaa bra kan'.

28

Ndyu'u Jesús xiya'

¹ Xa wa mdyii tsan nu nxitña' ne', wa ki'ya ti xaa tsan kulo 'in smnan, bra kan' ndyaa Liya Magdalena lo'o xka Liya kan', chun' nchka ti' ne' ña'an ne' se'en ngatsi' ayman Jesús.

² Lye 'a mñan chalyuu bra kan', cha' ngwi'ya ska angajle 'in nu nka X'naan nu ndi'in nde ni' kwan, ngwi'ya lo yuu tu'wa kwaa kan'. Kwi' ngulo angajle kan' kee tlyu nu ngwa'an tu'wa kwaa, ndyaa tukwa chun' kee kan' bra kan'.

³ Ña'an ti' xaa ndyuwi, ngwaña'an ña'an xaa tloo angajle kan', kwi' lye 'a ngaten ste' angajle kan'.

⁴ Bra nu na'an sndaru 'in angajle kan', ytsen 'a yu, mchkwan 'a yu bra kan'; mlyuu yu lyuu sa ña'an ka si wa ngujwi yu, ngwaña'an msu yu cha' ytsen 'a yu.

⁵ Ykwi' angajle lo'o nu kuna'an kan' bra kan':

—Ja kutsen wan —ndukwin 'in nu kuna'an—. Jlyo tiñan' cha' nda'an naan wan 'in Jesús nu ngujwi lo wsi.

⁶ Ja ndi'in yu kan' nde re cha' wa ndyu'u yu xiya', sa ña'an nu ykwi' yu lo'o wan nu ngwa xkan'. Kan wan, kan na'an wan se'en yu'wi ayman kan'.

⁷ Bra wa na'an wan, tyaa ytsa' wan cha' re 'in ne' nu ngi'ni xa'an cha' 'in yu kan': "Ja nsu'wi 'a ayman kan' ni' kwaa re, cha' wa ndyu'u yu xiya'; wa tsa'a ti yu Galilea kulo ndukwa la 'wan, la kan' ña'an wan 'in yu". Sa kwa ti cha' ndi'in cha' katsaän' 'wan —ndukwin angajle 'in nu kuna'an kan'.

⁸ Bra ti mdo'o nu kuna'an kan' tu'wa kwaa, ndyaa ne'. Lo'o su'we 'a ngwa tiye ne', ni siya ytsen ne' chin'. Msnan ne', ndyaa ytsa' ne' 'in ne' nu ngi'ni xa'an cha' 'in Jesús.

⁹ Tuwiin ndyukwa ta'a Jesús lo'o nu kuna'an kan', ykwi' yu lo'o ne'. Bra ti mduun xtyin' nu kuna'an kan' se'en nduun Jesús, msñi ne' kiya' yu, y'ni tnun ne' 'in yu bra kan'.

¹⁰ —Ja kutsen wan —ndukwin Jesús 'in ne' kan' bra kan'—. Tyaa ytsa' lya wan 'in ta'aän cha' ndi'in cha' tsa'aän Galilea, la kan' tyukwa ta'aän lo'o ne'. Ngwaña'an chkwi' wan lo'o ne' kwa.

Cha' nu ykwi' sndaru lo'o nten

¹¹ Bra nu ndyaa nu kuna'an kan', lo'o ndyaa sndaru nu mdi'in kwan tu'wa kwaa kan'; ndyaa ne' lo kichen, ndyaa ytsa' ne' 'in sti jo'o nu lka ndloo nchga cha' nu ngwa tu'wa kwaa kan'.

¹² Bra ti ndyo' ti'in nchga sti jo'o nu lka ndloo lo'o nchga yu kula 'in ne' judío, cha' skan' cha' lo'o ta'a ne', sa ña'an cha' chkwi' ne' lo'o nchga nten. Kwi' mda ne' nu lka ndloo kan' ka'an 'a tñi 'in sndaru bra kan', cha' ja chkwi' ne' cha' nu ngwa kan'.

¹³ —Nde ña'an chkwi' wan lo'o nten: "Bra nu yija' ba tla, bra kan' yan ne' nu y'ni xa'an cha' 'in ayman Jesús kan', ngulo mnan ne' 'in ayman kan'."

Ngwaña'an chkwi' wan lo'o nten —ndukwin ne' nu lka ndloo kan' 'in sndaru—.

¹⁴ Lo'o si kunan gobernador nu lka ndloo 'ñaan cha' re, bra ti chkwi' ba lo'o yu cha' ja ta 'a yu nu ti'í 'wan bra kan'.

Ngwaña'an ykwi' ne' nu lka ndloo kan' lo'o sndaru.

¹⁵ Msñi sndaru tñi bra kan'; mdo'o ne' ndyaa ne' cha' chkwi' ne' lo'o nten sa ña'an tñan nu ndi'in cha' chkwi' ne'. Kan' cha' sa bra ni, ti ndyaa ña'an ti' ne' judío cha' ngwaña'an ngwa 'in ayman Jesús.

Mda Jesús ska tñan 'in nten nu wa ngulo suwi yu

¹⁶ Chun' ndi'in la mdo'o tii xka ne' nu ngi'ni xa'an cha' 'in Jesús, ndyaa ne' nde lo yuu 'in Galilea; ndyo' ti'in ne' lo ki'ya se'en ndukwin Jesús cha' tyukwa ta'a ne' lo'o bra kan'.

¹⁷ Bra nu na'an ne' 'in Jesús cha' ndijyan yu se'en ndi'in ne', bra kan' y'ni tnun ne' 'in yu, ni siya ndi'in chin' ta'a ne' nu ja ya tsaa ña'an su'we ti' 'in yu.

¹⁸ Mdiyan Jesús kwi' se'en la, ykwi' lo'o ne' bra kan':

—Wa mda Stiin Ndiose nchga chabiya' 'ñaän cha' lkaän ndloo 'in nchga nan, ni siya nchga nan nu nsu'wi se'en ndi'in Ni nde ni' kwan, ni siya nchga nan nu nsu'wi lo chalyuu —ndukwin Jesús 'in ne'—.

¹⁹ Yaa wan nchga kichen lo chalyuu cha' ku'ni xa'an nchga nten cha' 'ñaän. Kwi' tukwatya wan 'in ne' chabiya' 'in Stiin Ndiose, ngwaña'an chabiya' nu ndi'in 'ñaän cha' lkaän Sñi' Ni, kwi' ngwaña'an chabiya' 'in Tyi'i Ndiose tukwatya wan 'in ne' bra kan'.

²⁰ Kwa'u wan 'in ne' kan', cha' ku'ni ne' nchga tñan nu wa ngwa'uŷn 'wan. Lo'o tyu'wi ti' wan cha' nu ykwiŷn' lo'o wan, cha' na' lkaän nu tyi'iŷn lo'o wan nchga tsan sa ña'an ya' nu tsa tii chalyuu.

Sa kwa ti cha' ykwi' Jesús.

**Cha' su'we nu nchkwi' cha' 'in Jesucristo nu
nka x'naan
New Testament in Chatino, Western Highland
(MX:ctp:Chatino, Western Highland)**

copyright © 1992 Wycliffe Bible Translators, Inc.

Language: Chatino, Western Highland

Translation by: Wycliffe Bible Translators, Inc.

Chatino, Zona Alta Occidental [ctp], Mexico

Copyright Information

© 1992, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Chatino, Western Highland

© 1992, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 18 Apr 2025 from source files
dated 29 Jan 2022
de5120df-8f34-5747-88ef-b19cf963f07d